

შინა
მოსაშვილი

ფუნქციონირის ქარაზი

სახელმწიფო გამომცემლობა
„საბჭოთა საქართველო“
თბილისი
1963

7 A 8. 5(C. 41)

796 . 33 (47 . 922) (092 သက်သေခံ)

၈ 861

წი ნ ა თ ქ მ ა

ეს არის გასაოცარი სახელი... ყველა — ვისაც უყვარს ფეხბურთი, ვისაც ერთხელ მაინც უხილავს მწვანედ მოქარვულ ხალიჩაზე შერკინებული ფეხბურთელები და ვისაც თავის სიცოცხლეში არც კი გაუხედავს სტადიონის კოშკურებისაკენ, ყველა — იქნება ის „ციებცხელებიანი“ გულშემატკივარი თუ ფეხბურთისადმი ნეიტრალურად განწყობილი პიროვნება, სასოებით წარმოთქვამს ამ სახელს, რომელიც ქართველი კაცის მარადიული სიჭაბუკის, გაუცვეთავი გონებამახვილობის და ყოჩაღი ბიჭობის უკვდავი სიმბოლო გახდა. ეს არის გასაოცარი სახელი... იგი სხვადასხვაგვარად ეღერს... ვინ როგორ იტყვის... ხან ჰგავს — ქუხილს უღრუბლო, მოწმენდილ ცაზე, ხანაც — ალაზნის ჭალებში ანაზღად მოვარდნილ ავდარს. ეს არის გასაოცარი სახელი... იგი ხშირად თოფის გასროლასავით ისმის:

ბორის პაიჭაძე!

ონიქელის მოჩვენება

.... ვზივარ ახლა ამ სიტყვების ავტორი, მივჯდომივარ ჩემს საწერ მაგიდას და უაზროდ დავცქერი ბატიფეხურ სტრიქონებს, დაუწერელ ქალაღზე აქა-იქ რომ ამოსულან, ქოსა კაცის წვერივით... ვერ შემხვდა საქმე ადვილთაგანი: ძნელი ყოფილა სათქმელად ლეგენდა-კაცის ამბავი... გასაჭირში ვარ: არ ვიცი, როგორ დავწერო, საიდან დავიწყო... დღე დამემ ჩააქრო, დამე დღემ წაშალა, — ფიქრი ფიქრმა მომტაცა, სიტყვა სიტყვამ წამართვა... ამბავს ვერ მივეც სითავე, კალამს ვერ მოვდე ლაგამი... გული გამიტყდა, ერთი პირობა ხელიც ჩავიქნიე და სიტყვებთან ჭიდილში ძლეულმა, საწერ-კალამი დავყარე... „სადაც არა სჯობს, გაცლა სჯობს, კარგისა მამაციისაგან“... მეც გავეცალე და ეწყო ერთ ხანს ჩემს მაგიდაზე—უანგმოდებული კალამი, ამომშრალი სამელნე, დაუწერელი ქალაღი და... თავმოუბმელი ამბავი...

გვრძნობდი, — სადღაც, „აღებული მასალა“ მღალატობდა და კალამს არ მანებებდა ექვნიანი სიტყვებისა და ფრთიანი სტრიქონების გასაჭენებლად... მაგრამ, რაღას ვიზამდი! — დაუწერელი წიგნი ასასივით მომჩერებოდა და მეც, როგორც ძალმიძდა, ისე დავიწყე. უნუგეშოდ მივუჯექე მაგიდას, წყალწყალა სტრიქონების უნიათო ჯირითი გავმართე და ცეცხლივით ამბავი პაიჭაძისა „ანკეტის ენით“ ჩავაქრე. „სახელგანთქმული ქართველი ფეხბურთელი, სპორტის დამსახურებული ოსტატი, სამგზის ორდენოსანი ბორის პაიჭაძე აღიზარდა და დავაუკაცდა ქალაქ ფოთში“... — საცოდავად წრიპინებს ჩემი კალმისწვერი და სტრიქონა „ახმობს“ სტრიქონებს...

უეცრად... ჰრი, საოცრებავ!... ცხადია თუ სიზმარი: ხელი-
დან გამვარდა კალამი და თვალდათვალ გაჰქრნენ ნაცოდვილა-
რი სტრიქონები... ერთ ხანს ისევე თოვლივით თეთრა, უტყვია
ქალაღდი. შემდეგ, სტრიქონების ნაცვლად, სხდებიან: ჯერ
ტყიანი მთები და ნაირფერი მინდვრები, მერე მწვანე გორაკე-
ბი და ჩაის ბუჩქით მოქარგული კორდები, მერე წამოჩიტული
ოდები და პირდაბანილი ეზოები, მერე გაქცეული ორლობეები
და კრამანჭულივით დახვეული ბილიკები, მერე ხასანბეგურა-
სავით მოვარდნილი მდინარეები და სიმონა დოლიძესავით
ამაყი კაცები, მერე იავნანასავით მშვენიერი ქალები და მთელი
სოფელი. ეს ხომ, გურიაა! მწვანეში ჩაფლული, მთებზე ასული,
მთებიდან მთებზე გადასროლილი, ცის ლაყვარლში დაკიდული,
მთებიდან ველებზე დაცემული, ველებიდან ზღვაში შეცურე-
ბული მზეთუნახავი გურია! ჰო, უხილავი მხატვრის მადლიანმა
ფუნჯმა ხელისგულზე გადამიშალა ტყიან მთას ფერდობზე
წაქცეული პატარა გურული სოფელი ონჭიქედი... ონჭიქედი—
ხან ჩახჩახა და ანთებული, ხან ჩამქრალი და მობუღული, ხან
ოქროს სხივებში მობანავე, ხან თეთრ ზეწარში გახვეული...
მზიანი და ნისლიანი ონჭიქედი... დიდხანს შეეცქერი საოცარ
სურათს, თვალს ვეღარ ვწყვეტ ბუნების ჯადოქრობას: რა ფე-
რებია, რა სიმყუდროე, რა გადასახედი! თავი ზღაპარში მგო-
ნია... და უცებ, ბუნების ჰვრეტით გართულს, ფიქრების ბუ-
რანში წასულს,—მესმის, — სოფლიდან ხმას მაწევს ვილაც:

— ყმაწვილო კაცო და პაიჭაძის ამბის მოხრობელო, ოთახ-
ში რო ჩაეტილხარ, ცხვირს გარეთ არ ჰყოფ და სიტყვებს
ნაყავ, რის მაქნისია შენი ნაბუქი!

ამ სიტყვებს, ერთი ლაზათიანი ალიყური მერჩივნა: ავირიე,

დავიბენი, წაუხდი, გავშრი, ჩემი თავი მევე შესირცხვილა და სახე სააღდგომო კვერცხივით შემელემა. მეწყინა, მაგრამ რას ვიზამდი: ცივი წყალი დავლიე და სმენად ვიქეცი. ხმა სოფლიდან, ახლა, მთელი ძალით ბუბუნებდა:

— მანდ უქმად ჯდომას ის გიჯობდეს ჩვენთან მოხვიდე, ჩვენთან იყო, ყურად ილო ჩვენი ნათქვამი, გახდე ჩვენი ხსოვნის ნაცვალი, რომ მერე ყოველ შენ სიტყვას ჰქონდეს ფასი და სიმართლის მარცვალი!

გულმა მითხრა: იღუმალი ხმა კეთილს მირჩევდა. აღარ დავაყოვნე, მზერა უმაღ იღუმაღ ხმას დავადევნე და თვალი სოფლის ბოლოს დავადგი. სახილავი ვიხილე, მისახვედრს მივხვდი და ზღვაში ჩაყვინთული ცხრათვალა გურიის ქედებს ჯერ ისევ ოქროსფრად ლებავდა, რომ ონჭიქედის ზემოუბანში გაეჩნდი.

ხავსმოდებულ ნასახლართან, ხის ვეება მორებზე სამი ყაბალახიანი ბერიკაცი იჯდა. ბერიკაცები დინჯად მარცვლავდნენ სიტყვების კრიალოსანს, შუა სჯა-ბაასში იყვნენ. ჩემი სიახლოვე რომ იგრძნეს, ერთმანეთს შორის ანგელოზი ჩამოატარეს და ერთხანს უსიტყვოდ ისხდნენ. მერე თითქოს კაცი კი არა, მთა დაეყუდა ჩემს წინ — წამოდგა ერთი სამთაგანი, კეხიანი ცხვირი რომ ჰქონდა, ტყესავით ხშირი წარბები და თვალებში არწივის მზერა ედგა, — მომიახლოვდა, თავით ფეხამდე გამზომა, ისე როგორც საჭიდაოდ გამოსული ფალავანი სინჯავს უცხო მეტოქეს, უროსავით ხელი მხარზე დამადო და ნაცნობი ხმით ურიდად შემრისხა:

— დიაკვანივით რო გააბი, ის ჩვენი ოქრო ბიჭი ფოთელებს აჩუქე, ამდენი ტყვილი, ვინ გასწავლა, ძამია?!

მერე იმ ორმა ბერიკაცმაც აიმაღლა ხმა:

— პაიჭაძეების ფოთელობა, სად თქმულა, შვილო, ჯერ ჩვენთვის უნდა გეკითხა და მერე დაგეწყო შენი ამბავი!

ერთბაშად მომეშვა გულზე, რადგან მივხვდი, რა წუხილიც შესდგომოდათ ონჭიქედელ ბერიკაცებს. ჩემი წიგნის გამორის-განაც გამიგია: აქ, ერკეთის თემის სოფელ ონჭიქედში, 1915 წლის თოვლიანი თებერვლის ერთ გადარეულ, ქარბუქიან დღეს — სოლომონ პაიჭაძეს და ოღლა ტულუშს ვაჟიშვილი შეეძინათ... ბიჭს ბორია დაარქვეს... ბორიას, აქვე, ონჭიქედში გაუტარებია თავისი უზრუნველი ბავშვობა... ოჯახის ფოთში გადასახლების შემდეგაც არ დაუვიწყია ონჭიქედი, აქ ატარებდა თურმე საზაფხულო არდადეგებს... ონჭიქედში — თავის სამშობლო სოფელში... ეს არის და ეს... ასე რომ, ონჭიქედის გარშემო „აღებული მასალა“ იმდენად ძუნწი გამოდგა, წიგნის დაწყება ისევ ფოთის ამბებიდან გადავწყვიტე. ახლა კი, სრულიად მოულოდნელად, ხელსაყრელი შემთხვევა მეძლეოდა. ჩემი გამორის სიყრმეს უფრო ვრცლად გავცნობოდი და „მეპოვნა“ შესაფერი თხრობის სათავე.

ერთხანს ისევ წარბშეკრულნი შემეცქეროდნენ ბერიკაცები. მერე შუბლი გაიხსნეს, გამიღიმეს, რისხვა აღერსით შემიცვალეს და მითხრა ერთმა სამთაგანმა: ახლა ჩვენ ვივლით, შენ უკან გამოგვეყვიო. იარეს, ბებერი მგლებივით გადაიარეს სოფელი, მომატარეს ონჭიქედი — ზემოუბანი და ქვემოუბანი, გუბაზოულის პირი და სუფსა-ხევა, ყველა-წმინდა და სარკოია. გავიციანი იქაურები: პაიჭაძეები და გოგოლაძეები. მინდაძეები და ცინცაძეები, ჩხაიძეები და დოლიძეები. სიტყვაა არავინ დამეზარა: მოხუცებმა ადრინდელი გაიხსენეს, ბორიას

თანატოლებმა კი უფრო გვიანდელი მოიგონეს, ზოგმა რა მიაშ-
ბო, ზოგმა რა. საგზაო ბლოკნოტები სამგზის ამივსეს ენაწყ-
ლიანმა გურულებმა. ისეთები გავიგე — ბევრიც ქექოს უურ-
ნალ-გაზეთები, კაცი ვერსად წააწყდება:

სამი დღის შემდეგ, როცა ონკიქედის ჩამქრალ ცაზე პირ-
ველი ვარსკვლავები სხდებოდნენ,—დავემშვიდობე ჩემს გულ-
ლია მასპინძლებს, ავიკარ საწერ-კალამი და შთაბეჭდილებე-
ბით დამძიმებული გამოვეშურე თბილისისაკენ.

...ავტობუსი ჭიქურ შებრუნდა მოსახვევში და უკანასკნე-
ლად მომესალმა ქედზე შემჯდარი, ტყიან ფერდობზე წაქცე-
ული ონკიქედი... ხან ჩახჩახა და ანთებული, ხან ჩამქრალი
და მობუდული, ხან ოქროს სხივებში მობანავე, ხან თეთრ ზე-
წარში გახვეული... მზიანი და ნისლიანი ონკიქედი...

მოდით, ჩვენც ონკიქედიდან დავიწყოთ...

ონკიქედური სურათები

ფეხბურთი ხურდება ტრიალ მინდორზე და ყიჟინა მიჰყვება
მდინარის ნაპირებს: ბორია!.. ბორია!.. ბორია!..

დაჰქრის ბორია, მინდორს მისთელავს, ჯერ ერთს ატყუებს,
მერე მეორეს, მერე მესამეს, მერე სამს ერთად, ბურთს არ
ანებებს თანატოლებს და არის ერთი: ჰაი, ბურთი და ჰაი, ბო-
რია!

ათი წლის თარსი ბაჰია ბორია, ფეხმალი, ილათიანი, ატაც-
ნილი, დაუდგარი... ამაოდ დასდევს, ამაოდ იცვეთს ფეხის-
გულებს ეს ამოდენა სოფლის ბიჭობა, ქარი მინდორში ვის
უჭერია!.. ხმელია ბორია, გამხდარი, ტანმორჩილი, მაგრამ
კაჟივით მაგარი, მშვილდივით მოზიდული, ჩახმახივით შემარ-

თული. ბრინჯაოსფრად შეღებილი ტანი აქვს ბორიას, ელვიანი თვალები და ზღვასთან შეზრდილი ბიჭის შორი მზერა.

ფეხბურთი ხურდება ტრიალ მინდორზე და ყიჟინა მიჰყვება მდინარის ნაპირებს: ბორია!... ბორია!... ბორია!...

ასე მეორდება ყოველდღე, ყოველი ზაფხულის ყოველ დღე ცისმარეს: ნიავეიანი დილიდან აღმურიან შუადღემდე, ნარნარი სალამოდან დაბინდებამდე. მხოლოდ შუადღისას, როცა ბღღვრიალა მზე ორთავა ქედზე წამოჭდება, ცეცხლად დაიღვრება, ბალახს ყვითლად დაფერავს, გაანმობს, ოხშივარს აადენს, გახურებულ მიწას ბუღს გაადენს, გარშემო ჭრიჭინებს აამღერებს, — ყუჩდება და ისვენებს — ნაბრძოლი და ნაომარი. ნათელი და ნაბურთალი სარკოიას მინდორი.

* * *

როცა, სარკოიას ბინდი მოერევა და ონჭიქედის ორღობეებში ბნელი ჩაწვება, — სოფლის ბიჭობა ბურთს დაეხსნება, მდინარის პირას ილაჯგაწყვეტილი დაეყრება, ცოტას სულს მოითქვამს, ტანს გაიგრილებს, მუხლს დაასვენებს და მერე სიმღერით, შაირით, ერთი ჰაიპუით ბრუნდება შინისაკენ...

ბორია შუა გზაშივე გვერდს შეუქცევს ამხანაგებს, შეუღმნევლად გამოეყოფა მობურთავეებს, მთელი დღის ნარბენი სიქაგაცლილი ბიჭი ჩუმად შეუყვება ბნელ ორღობეებს, სახლის შორიანლო გაჩერდება, ფრთხილად დაზვერავს ნაცნობ ეზო-კარს და გულის ფანცქალით მიაყურებს თავისიანებს... თუ მამას ვერსად მოლანდავს, მისი რისხვა ხმა არ შეესმება — გულზე მოეშვება, რიდი მოეხსნება, ღობეს კივილით გადაევილება და ეზოში სიმღერით შეფრინდება. დედა გაუწყრება. პაპა დატუქსავს, ბებია შეიცხადებს, ფისო დაიკნავლებს, თო-

ლია ერთ-ორს დაიყუფებს, ქათმები აკრიახდებიან და ყველა-
ფერი ამით გათავდება. მაგრამ, თუ... ღმერთი გაწყრება და...
მამა შინ დახვდება... იმის მჭექარე ხმას გაიგონებს... წახდება
და ზეზეურად გათავდება... თვალეში შიში ჩაუდგება, წელში
ოთხად მოიხრება, სახლუკან ლობეზე გადაძვრება, ეზოზე
ლანდივით გაივლის, ოთახში ქურდივით შეიპარება და წიგნე-
ბით სავსე კარადას მიუჯდება დედის უცოდველი შვილივით.

ოო, ძაან მკაცრი მამა ჰყავს ბორიას! სოლომონ პაიჭაძე —
ორმოცდაათ წელს მიღწეული, სახელიანი ვაჟკაცია ონქიქედ-
ში. ზვიადი, ფიცხი და ურიდი. მტერ-მოყვარე და ავ-კარგიანი.
მეოჯახე და სტუმრის მოყვარული. აკარაკი კაცის დამწუნე,
კაცური კაცის გამტანი, ტყუილი ღრეჯვის მოძულე, ერთთავად
შებლშეკრული და ძვირად ღირსიანი. ერთი გულქართლი.
მაგრამ უჯაათი და ახირებული კაცი... ყოჩალი ბიჭის სახელი
ჰქონია გავარდნილი ახალგაზრდობაში და იმისი ბადალი მო-
ბურთავე არა ყოფილა სარკოიაზე. ახლა ცოტა მოტეხილია
სოლომონი. ჩაუქრა ის შუქიანი თვალები, რომლებითაც ყმაწ-
ვილ ქალებს ნუსხავდა თავის ჯეღ ბიჭობაში, სახე დაეღარა,
თმაც დაეთრთვილა აქა-იქ, მაგრამ მაინც სოლომონ პაიჭაძეა,
ისევ ყოჩაღად არი და სამსახურიდან შინ რომ ბრუნდება, ისევ
ძველებურად თავაწეული, ყელმოღერებული, ჯარისკაცივით
წელში გამართული ამოივლის ხოლმე ზემოუბნის ყალყზე
შემდგარ აღმართზე... ეს ერთი ხანია, ფოთის ნავსადგურში
მუშაობს ბორიას მამა. შინ გვიან ბრუნდება, კარგა დაღამე-
ბულზე: დაქანცული, მოშივეებული, აღრენილი, გუნებაწამხდა-
რი. და ამ გაჯავრებულ გულზე, თუ თავის ერთა-ვაჟს თვალს
შეასწრებს ნაბურთალს: არ შეარჩენს, ერთს საშინლად დაიგ-

რგვინებს, დაიჭუხებს, მერე დაიკაპიწებს მორგვევით მკლავებს. და შავ ღღეს დააყენებს... იცის ბორიამ, იცის მამის ამბავი და ფრთხილად იქცევა. ისიც იცის „მამა გვიან მოვა“ და დაბინდებამდე ეძლევა თამაშს, ვერ ელევა ბურთაობას.

მაგრამ, ერთ შარიან ორშაბათ ღღეს, კოკა მაინც წყალზე გატყდა. დილით მარცხენა ფეხზე ადგა ბორია, მთელი ღღე ნავსიანად იარა, არაფერმა გაუმართლა და უქმურად დაუღამდა. ჯერ კოჭი წააგო კოსტაიას ტყუპებთან, მერე სარკოიაზე დამარცხდა ქვემოუბნელებთან, მერე ფეხმა კრუნჩხვა უყო მდინარეში, მერე ჩხუბი მოუვიდა ტულუშების ორლობეში, მერე როგორც იყო, შინ დაბრუნდა და... მამა დაუხვდა სახლში... გულზე შემოენთო გაძვალტყავებული ბიჭის მხილველ სოლომონს. იფეთქა მამამ, სულ ცეცხლი ყარა თვალთაგან და ხელი დარია ვაჟიშვილს. ერთი თუ ორი, ერთი თუ ორი... კიდევ ითამაშებ ბურთს?! შე მამა... ჭერმა მალლა აიწია და კედლებს შეუდგათ კანკალი... ერთი თუ ორი, ერთი თუ ორი... მაპატიე, აღარ ვიზამ, მამა!.. ერთი თუ ორი, ერთი თუ ორი... ვაიმე, დედავ, მიშველეთ!.. მერე აბობოქრდა, ქონაგად დადგა მთელი ოჯახი. ცალკე დედა გაავდა, ცალკე პაპა ამბოხდა, ცალკე ბებია გაწიწმატდა და დალილაგებული ბიჭი ძლივს გამოგლიჯეს რისხვაატანილ მამას... ერთ ხანს უნუგეშოდ ზღუქუნებდა გატყეპილი ბიჭი, მერე დედამ მიუალერსა, პაპამ გაუღიმა, ბებიამ დაუყვავა, ფისომ დაუკრუტუნა, თოლიამ კუდი დაუკაკუნა და... უარესად ამოუჯდა გული ბორიას. მერე ისევ მამამ დასჭყივლა და თავისი დანთებული ცეცხლი თვითონვე გაანელა. გაიტრუნა, გაინაბა, გაილურსა ბორია, უსიტყვოდ მიუჯდა წიგნებიან კარადას. „რა უსამართლონი არიან ეს მამე-

ბი. თვითონ ყნრაზე გადადიან ახალგაზრდობაში, ჩვენ კი ბურ-
თის თამაშსაც არ გვანებებენ... გუშინ მიშიკო გაიტყიბა... იმის
წინ კიდევე ლევარსია გაზნიქა მამამ... — ფიქრობდა ბორია და
ცრემლიანი თვალებით მიშტერებოდა საყვარელი წიგნების
ნაცნობ საგვერდულებს... ცოტა რომ დამშვიდდა, დაშოშმინდა,
სლოკინი დაუცხრა, გული იგულა საგულეში — ხელი მიჰყო
წიგნებს, აირჩია საკითხავი. წამოწვა მერე განიერ პაპისეულ
ტახტზე, ჭრაქი აანთო, წიგნი გადაშალა, ფიქრი დაატრიალა,
ოცნებები გაშალა, მეზღვაურის ტანსაცმელი ჩაიცვა, ხელში
თოფი აიღო, მკერდზე ღურბინდი დაიკიდა, გვერდზე დამბაჩა
მოიგდო, აფრებიანი ხომალდის გემბანზე დადგა და თავის
„15 წლის კაპიტანს“ შუალამემდე დაჰყვებოდა შორეულ
ზღვებსა და ოკეანეებზე, უკაცურ კუნძულებსა და გაუვალ
ტყეებში, უცხო ქვეყნებსა და სახელმწიფოებში. ხან თეთრკა-
ნიანებთან იყო, ხან შავკანიანებთან, ხან წითელკანიანებთან,
ხან ყვითელკანიანებთან, ხან ღვთისნიერ ხალხში იყო, ხან
კაციქამიებთან. ხან სად იყო, ხან სად!

რა კარგია ზღვა! გემი, თავგადასავლიანი, ხიფათიანი, ფა-
თერაკიანი მოგზაურობა. რა კარგია ცხოვრება გემზე: გადალა-
ხავ ზღვებსა და ოკეანეებს, შემოივლი ქვეყანას! დიდი რომ
გაიზრდება, აუცილებლად მეზღვაური გახდება!... ფეხბურთი?
ფეხბურთს რომ ველარ ითამაშებს? ჰო, მართლა, ფეხბურთი,
სულ დაავიწყდა!.. არა, კი არ დაავიწყდა. ფეხბურთს, აბა, რა
დაავიწყებს, სარკოიაზე ბურთის გაგდებას რა სჯობია, მაგრამ...
ზღვა, მაინც სულ სხვაა, არაფერია იმისი ფასი!.. არა, დიდი
რომ გაიზრდება, აუცილებლად მეზღვაური გახდება!..

შუალამემდე ბოლავდა ჭრაქი: ხან ავაზაკ ნეგოროს ებრძო-

და, ხან ნიანგების ლაშქარს იგერიებდა, ხან კაციჭამიებს უმკლავდებოდა, ხანაც გასაჭირში ჩაყარდნილი, კეთილ ზანგ დევკაცს ჰერკულესს მოუხმობდა დასახმარებლად. შუალამემდე ბოლავდა ჭრაქი, შუალამემდე მიჰყვებოდა საყვარელი წიგნის სტრიქონებს: მერე როცა კაციჭამიებმა დაატყვევეს, ხელ-ფეხი შეუტარეს, თავის „15 წლის კაპიტანთან“ ერთად ჯურღმულში ჩააგდეს, ამოდენა განსაცდელს ველარ გაუძლო, დაიღალა, დაიქანცა და ძიღმა მოჰპარა თვალები... სიზმარში ნახა: სარკოიაზე იჯდა მდინარის პირას და სოფლის ბიჭობას დაწვრილებით მოუთხრობდა ზღვებისა და ოკეანეების, უკაცური კუნძულებისა და გაუვალი ტყეების, უცნო ქვეყნებისა და სახელმწიფოების, ნიანგებისა და ვეშაპების, ბოროტი ნეგოროსა და კეთილი ჰერკულესის, კაციჭამიებისა და თავისი უმატაცესი „15 წლის კაპიტანის“ გრძელ ამბავს... ონჭიქედელი ბიჭები პირდაღებულები ისხდნენ, გაგონილს ჰკვირობდნენ და ერთხმად იძახოდნენ: ეს რა ბიჭი ყოფილა, პაიჭაძეების ბორიო!... ბორიას თავი მოსწონდა, ეამაყებოდა და ლამის ონჭიქედის ორთავა ქედზე აფრენილიყო სიხარულით. პაი, რომ ბიჭია, და მერე ეგეთი? — ჯერ დიდი გაიზარდოს: მეზღვაური გახდება, გემზე დაიდებს ბინას, ზღვებსა და ოკეანეებს გადალახავს, შემრიგლის ქვეყანას!

* * *

სოლომონ პაიჭაძე თავის ნათქვამა კაცია: იტყვის და აღარ დაიშლის, შეაგდებს ქვას და თავს შეუშვერს... ჰოდა, ერთხელ თქვა და არ გადათქვა სოლომონმა: ატყდა, აიშალა, აღარ დადგა, სოფელი აითვალწუნა, ქალაქი დაიჩემა და ფოთს გადასვლა აიჩემა. წინ აღუდგა ოჯახობა — სიტყვა შეუბრუნა, ნააზრევი

არ შეუქო, არჩევანი დაუწუნა. სოფელს ვერ შელეოდნენ, — ვერც დედა, ვერც პაპა, ვერც ბებია, ვერც ბორია. არაო და არაო. აირია ოჯახი. ცალკე დედა აწუწუნდა, ცალკე პაპა აღუდ-
ლუნდა, ცალკე ბებია აკრუსუნდა, ცალკე ბორია ახტა-დახტა. სოფელი ქალაქზე არ გაიცვლებათ, — უარობდა ოჯახი... მაინც არ გატყდა სოლომონი: სიტყვა პირზე დაიჭირა, ნააზრევზე მაგრა დადგა, შეუვალ ჰყო არჩევანი. ჯერ დედა აიყოლია, მერე ბებია დაიყოლია, მერე პაპა ატეხა, მერე ბორიას მოაკე-
ტინა, ბოლოს მთელი ოჯახი დაითანხმა და შერეკილი მარტის ერთ ფხუკიან დღეს გამგზავრების თადარიგი დაიჭირა...

ალიონს დაასწრო. პაიჭაძეების ოჯახმა, დღე აყრაში გალია და უკვე მოსაღამოვებული იყო, როცა ბარგი-ბარხანით დატ-
ვირთული ურმები ბარბაცით, კოჭლობით, ერთი ოხვრა-კენესით და ვაივაგლახით გაუდგნენ ქვა-ლორლიან შარაგზას... სინანუ-
ლით გააცილეს პაიჭაძეები ონჭიქედლებმა. ქვეყნისა შეიყარა გამცილებელი. გზადაგზა კიდევ იმრავლეს, სოფლის ბოლომდე იარეს, შარაგზის გასაყართან შედგნენ, — გზაში ბედი უსურ-
ვეს, მომავალი უდღეგრძელეს, ოჯახი დაულოცეს, უკანასკნე-
ლი მშვიდობა უთხრეს სოლომონ პაიჭაძეს... ისევ დაიძრნენ ურმები და განშორებით გულამომქდარმა სოფლის ბიჭობამ კიდევ ერთხელ შესძრა იქაურობა: ჰაი, ბორია და ჰაი, ბორია! ქალაქელი რო გახდებოდე. არ დაგვივიწყებდე სოფლელებს, ზაფხულობით მაინც ჩამოხვიდოდე ონჭიქედში!.. თვალეში ნისლი ჩაუდგა ბორიას, გული დაემდულრა. უნდოდა მშვიდო-
ბისა ეთქვა რამე, მაგრამ ენა გაუხდა ლოდვიით, სიტყვა რამ ვერ დასძრა და მხოლოდ სევდიანი მზერა აკმარა გზაჯვარე-
დინზე შეყრილ ბიჭებს. აბა, რა დაავიწყებს მაგათ თავს, ონჭი-
ქედს, სარკოიას... ნახვამდის, ბიჭებო!..

წინ ორუღელა ურემი მიჭრიალებს, უკან ცალუღელა მიიზ-
ლაზნება: ბუკისციხე, დაბლაციხე, ერკეთი და ბეოლიეთი...
წინ ორუღელა ურემი მიგორავს, უკან ცალუღელა მიცოდვი-
ლობს: ნაბელლავი, ვაზიანი, სამება და ზენობანი... ცალუღელა
ურემზე ოჯახობა დამსხდარა. ორუღელაზე ქვეყნის ხაბაკი
აწყვია, ზედ ბორია დასკუპებულა და ვეება სახრეს რიგრიგო-
ბით უნაცვლებს დორბლმორეულ ხარებს: გულიანი, მოედანი.
ქვიანი და ნიგვზიანი... ჩაიარეს სოფლები... უკან დარჩა გუ-
რია... საცაა ფოთი გამოჩნდება.

• • •

პაიქაძეების ფოთში გადასახლების იმ დაუვიწყარი დღი-
დან—ძვირი სტუმარი, უცხო ხილი გახდა ონჭიქედელი ბიჭები-
სათვის ბორია. ახალ მთვარესავით გამოჩნდებოდა ხოლმე ონჭი-
ქედში... მხოლოდ ზაფხულობით თუ ჩამოხედავდა მამულ-პა-
პეულს, მშობლიურ სოფელს გაქალაქელებული ბიჭი...

და როცა ონჭიქედში: მარტი გაგიუდება, აპრილი თეთრად
გაიშლება, მაისი აჩახჩახდება, ზაფხული გახურდება, ორლო-
ბეებში პაპანაქება ჩამოდგება, სარკოიას მინდორს ბული აუდ-
გება, სოფელს აღმური მოედება, პატარა მდინარეს სიცხე
შეაწუხებს, გაანახევრებს, დააშრობს, მკერდზე დაწყობილ
ქვა-ლორღს მალა ამოუყრის და გაძვალტყავებულ კაცს დაამ-
გვანებს, — მოუთმენლობა აიტანს ონჭიქედელ ონავარებს:
როდის ჩამოვა ბორია?... დაეყრებიან ნაბურთალნი სარკოიაზე
და არიან ერთ მარჩიელობაში: როდის ჩამოვა ბორია?... სამხ-
რობისას გავლენ სოფლის ბოლოს, რას არ ითამაშებენ, გულს
ამოიგდებენ, ქანცს გაიგდებენ, მერე ბალახზე გაგორდებიან.

დახვეულ შარაგზას ესვრიან მზერას და გააბამენ გაუთავებელ მარჩიელობას: როდის ჩამოვა ბორია?..

ჰმ, ბორია! რა ბიჭი წაუვიდათ, რა ბიჭი! უიმისოდ არც ბურთაობასა აქვს მადლი, არც რიკ-ტაფელას, არც ლახტაობას, არც კოჭაობას, არც ფირალობას, და არც რას! ნეტავ, როდის ჩამოვა ბორია? უკვე შუაზაფხულია და რაღას უცდის! თუმცა, ვინ იცის, ესენი აქ ელოდებიან დიდის ამბით, იმან კი იქნებ წლეულს სხვაგან მოიზაფხულოს, ონჭიქედისაყენ არც მოიხედოს. რატო რა, ყველაფერია მოსალოდნელი... მაგრამ... არა... ბორია ვერ უღალატებს ონჭიქედს, წლეულსაც აქ გაატარებს არდადეგებს... და თუ ასეა, სად არის ამდენ ხანს, ის კაი კაცი, რას იწვება იმ დასაწვავ ქალაქში!.. არა, ახლა, ალბათ, დიდხანს აღარ ალოდინებთ, მალე ჩამოვა და თან ნამდვილ „ქალაქურ“ ბურთსაც ჩამოიტანს... ეჰ, ძნელი ყოფილა ბურთიანი ბიჭის ლოდინი!.. უბურთოდ რომ ჩამოვიდეს?.. უბურთოდ?.. ბიჭოს, მაგას ვინა ჩივის, ან ეგ რა სათქმელია: ჩამოვიდეს, ოღონდ ჩამოვიდეს და ბურთები აქაურიც ეყოფათ!

— თქვენ ეგ ლოდი დამარტყით, თუ ბორიამ ხვალ ონჭიქედში არ ამოყოს თავი, — თქვა ერთხელ ჭორფლიანმა ჯანუკიამ, რომელსაც ძალიან უყვარდა „რამეების გამოცნობა“.

ონჭიქედელი „მისანი“ მხოლოდ ორ დღეში მოტყუვდა. სამი დღის შემდეგ, ივლისის ერთ მოგუდულ საღამოს, ონჭიქედელ გოგო-ბიჭებში თოფივით გავარდა:

— ბორია ჩამოვიდა!..

ქარი შეუდგათ სოფლის ბიჭებს: აიშალნენ, აიყარნენ, ორლობეები აახშიანეს, ოდები შეაწუხეს, ზემოუბნის აღპართი გატეხეს ყიუინით და პაიჭაძეების ეზო-კარს მიადგნენ ძახილით:

— ბორია!.. ბორია!.. ბორია!..

• ოთხკედელშუა რა დააყენებდა ამის გამგონე ბორიას. წამოხტა იმათ თავს მონატრული ბიჭი, წამოფრინდა, აივანზე გამოფრინდა, ბიჭებს გაუმარჯოსო — შესძახა და მალლა შემართა ბურთიანი მარჯვენა... მოინუსხა ასის მზერა, ცქერად იქცა ასი თვალი: ახალთახალი ბურთი იყო, ფეხდაუკარები, ნამდვილი, „ქალაქური“. ერთ ხანს ღუმელი იწვა ეზოში. ეს ამოდენა სოფლის ბიჭობა განაბული მისჩერებოდა ვეება ტყავის ბურთს, შორი ხილვით ტკბებოდა იმისი უცხო მშვენიერებით. იფ, რა ბურთია? აი, ამით კი მართლა ღირს სარკოიაზე განავარდება!... მერე თითქოს გონს მოეგნენ, გამოერკვნენ, გამოფხიზლდნენ, ისევ აინთნენ, ისევ აღიგზნენ, თამაშის დაუოკებელმა უინმა მოუარათ და... აღტაცებით დაიგრიალა ეზომ. ეს გრიალი ჯერ მჯლობელმა ოდებმა გაიმეორეს, მერე ორლობეებმა მოიტაცეს, ეზო-ეზო მოატარეს და მთელს ზემოუბანში დაცალეს:

— ბორია პაიჭაძეს გაუმარჯოს!

• • •

და ისევ: ფეხბურთი ხურდება სარკოიაზე და ყივინა მიჰყვება მდინარის ნაპირებს: ბორია!.. ბორია!.. ბორია!..

ახლა თორმეტ-ცამეტი წლისაა ბორია, ფეხმალი, ილათიანი, ატაცნილი, დაუდეგარი. ამაოდ დასდევს, ამაოდ იცვეთს ფეხისგულებს ეს ამოდენა სოფლის ბიჭობა! გაგიჟონია? ქარა მინდორში ვის უჭერია!

ფოთური სურათები

ერთი პირობა — ბურთი გაჭირდა იმ ტიალ ფოთში და „დიდი ეზოს“ პატარა ბიჭობა კარგა ხანს ქესატად იყო. კაცს სანთლით რომ ეძებნა, მთელი ქალაქი გადაექეჭა, გადაებრუნებინა, — წამლად ვერ იშოვნინდა ბურთს — ვერც ტყავისას, ვერც რეზინისას.

ჩამოსხდებოდნენ ყორეზე სალამობით „დიდი ეზოს“ პატარა ბიჭები: იმნაძე კაკოია, ბერძენიშვილი ვალოდია, გაგუა გრიშაია, ჯორბენაძე გვაჩაია, პაიჭაძე ბორია, — ჩამოსხდებოდნენ გუნებააშლილნი, ყურებჩამოყრილნი, ფეხზე ქავილი ასტეხოდათ და ცხვირზე ძმარი სდიოდათ. მაშ, არადა დალხინებულიები იქნებოდნენ. აბა, რა ჰქონდათ გასახარის თამაშის გწყუროდეს და ბურთი ვერსად მოხელო, მოდი და გული ნუ მოგივა! — ბოღმა ახრჩობდათ „ორგოლობანას“ გადაყოლილ ბიჭებს... ჰო, მართლა... „ჭინჭის“ ბურთი?... არა, აბა, ეგ როგორ შეიძლება! შარშან, კიდევ გამოდგებოდა, ახლა კი... ბავშვები ხომ არ არიან, ამოდენა ბიჭები „ჭინჭის“ ბურთს ხომ არ დაუწყებენ დევნას... რას იფიქრებს ხალხი, რას იტყვის ქვეყანა!... ისხდნენ დაღამებამდე „დიდი ეზოს“ პატარა ბიჭები, მოშივებული თვალებით შესცქეროდნენ გამვლელ-გამომვლელს: კაცნი ვართ, ეგების მოხდეს სასწაული, გამოჩნდეს ვინმე ღვთისნიერი და გვიწილადოს ბურთით. ისხდნენ ყორეზე გულხელდაკრეფილნი და ბედნიერი შემთხვევის მოლოდინში, უკიათი მოთმინებით ლევდნენ შემოდგომის უღლეურ საღამოებს.

მაგრამ, გაჭირვება მიჩვენე და მუხლს გიჩვენებო, ხომ გაგიგონიათ?—იმთაც ისე მოუვიდათ, იმთაც აევსოთ ლოდინის თასი და მოთმინების ფიალა. ერთ დღეს, თამაშის ეშხმარომ სძლიათ, — თავი ველარ შეიკავეს და „ჭინჭის“ ბურთი კი არა, გვაჩაია ჯორბენაძემ ნამუს-სირცხვილი სხვას მიაბარა და უკისრებელი იკისრა: წავიდეთ, ღორებზე ვინადიროთ, იქნებ ბუშტი მაინც მოვხელოთო სადმე... რაო? ღორებიო?! ფეხბურთი და ღორები?! ტყავის ბურთი და ღორის ბუშტი?! ეს რა დაახეთქა ამ გვაჩაია გადარეულმა! — კაკოიამ პირი დაალო, ვალოდიამ თვალები დააჭყიტა, გრიშაიამ ყურები დაიბერტყა, ბორია სიცილად ატყდა. გაიკვირვეს, გაიოცეს, იუცხოვეს გვაჩის თქმული: ნეტავ, რას აფრენს, ეს ბიჭი, ამ უბურთობაში ხომ არ გაგიჟდაო?!

მაგრამ, მულამ ფიქრიანი, აზრიანი გვაჩაია — ახლაც თავის ჭკუაზე იჯდა და არც აპირებდა გაგიჟებას. ის კი არა, წელანდელი ნამუს-სირცხვილისა არ იყოს, გაგიჟებასაც სხვას გადაულოცავდა, თუ საქმე — საქმეზე მიდგებოდა. ასე რომ, თქვენ ფიქრი ნუ გაქვთ, ბიჭებო! მართალია, ძალიან ძნელია, მაგრამ ისე არ წაახდენს უბურთობა გვაჩაიას — ჭკუას გადავიდეს და ანგარიში აერიოს. არც ისეთი შეუშტვინე ყოფილა ოდესმე გვაჩაია, — რაც ენაზე მოადგება, დასცხოს და დააბუქოს. არა, თქვენ ფიქრი ნუ გაქვთ, გვაჩაია ისევ ის გვაჩაიაა. აი, ახლაც, ათი იფიქრა, ათი იაზრა და ერთი თქვა, შერე გაგანდოთ თავისი გულისნაღები. დაუჯერეთ, კვერი დაუპარით გვაჩაიას! ადექით, უკან გაპყევით, ქუჩა-ქუჩა იარეთ და საიდანაც ღორის ჭყვივლი შეგესმებათ, თქვენც იქით დაადეთ თავი. ცდა ბედის მონახევრეაო, რა იცით, იქნებ მართლაც იშოვნოთ სადმე ბუშტი

და ამ უბურთობაში ერთ ხანს როგორმე იოლას გახვიდეთ. დაუჯერეთ გვაჩაიას!

ბიჭებმაც აიღეს და დაუჯერეს, საქმეს მოჰკიდეს ხელი. ადგნენ, ქუჩა-ქუჩა იარეს, ეზო-ეზო მოიარეს და საიდანაც გაიგონებდნენ დანის პირზე დადებულ ღორის ჭყვივს, იქით მოჰკურცხლავდნენ ქარზე უმაღლესად... მერე ერთ მოღობილ ეზოში ბედმა გაუღიმათ. ბლალოჩინივით ჩასუქებულმა ძიამ, ჩაწითლებული თვალები რომ ჰქონდა, მოზვერივით კისერი და ბავშვივით კეთილი ღიმილი, — ჯერ ისევ თბილი, სისხლიანი ღორის ბუშტი გადმოუგდო მთელი დღის ნარბენ ბიჭებს დამათ მადლში ჩადგა. რაც იმათ მაშინ გაიხარეს! — ისე გაიხაროს იმ კეთილი „ბლალოჩინის“ ოჯახმა. წამოიღეს ღორის ბუშტი სიმღერით და სიცილით. წინ გვაჩაია მოუძლოდათ, გაბერილი და გაბლენძილი გვაჩაია, მოუძლოდათ კვეხნით, ბრეკვით, თავის ქებით: შემომხედეთ, დამინახეთ, რა ვარ, ბიჭი, გვაჩაიაო!

ჯერ ზღვას მიაშურეს: სისხლიანი ბუშტი აქაფებულ ტალღებზე შეაგდეს, კარგა ლამაზად აბანავეს, ლაპლაპი დააწყებინეს და კროცი კაკალივით გახადეს. მერე თავიანთ ეზოში დაბრუნდნენ, თავიანთ მობურთავეებს მოუხმეს, მეზობელი ეზოს ბიჭებიც შეყარეს, იმათთან ბრძოლა ისურვეს, ის ღორის ბუშტი წინ გაიგდეს, „ორი გოლი“ გააჩაღეს და ოჯახებს სამხრობის სიმშვიდე დაურღვიეს: მიდი, გვაჩაია!.. ჩქარა, კაკოია!.. ე, ბიჭო, ვალოდია!.. მოცელე, გრიშაია!.. დაარტყი, ბორია!.. გაჰქონდათ და გამოჰქონდათ ღორის ბუშტი, იყო ერთი მიდი— შვიდი.

... იმ ბურთის ქესატობაში — მუხლი გაიძღეს, ფეხისგულე-

ბი დაიცხრეს, სისხლი აიმდერეს — „დიდი ეზოს“ პატარა ბიჭებმა: იმნაძე კაკოიამ, ბერძენიშვილმა ვალოდიამ, გაგუა გრიშაიამ, ჯორბენაძე გვაჩაიამ, პაიჭაძე ბორიამ.



და იმ ბურთის უნახაობაში, იმ ღორის ბუშტაობაში „დიდ ეზოში“ მაინც მოხდა სასწაული. უცოლშვილოდ დაბერებულ კალისტე ლანჩავას, მეორე სართულზე რომ ცხოვრობდა, ერთი უენო, ბეჩავი კაცი, — თბილისიდან საყვარელი ძმისწული ეწვია და თან ბურთი ჩამოიტანა. ძმისწულიო?! — დატრიალდა კალისტე და დაყრუებულ ოთახებს ხმა აღირსა. ბურთიო?! — აწრიალდა „დიდი ეზო“ და მოსვენება დაკარგა. ცალკე მარტოხელა ბიძამ გაიხარა, ცალკე იმ უშოვნელს დახარბებულმა ბიჭებმა.

ამირანი ერქვა, — ბიჭად კი არაფერი იყო, ერთი „ხოზო“ და ღონდლო.. მაგრამ, ბურთი... ბურთი... ტყუილია... არა, ძმაო, ძან ბურთი ჰქონდა... იმისი ფასი არაფერი ენახათ „დიდი ეზოს“ ბიჭებს. ბურთი იყო, მაგრამ რა ბურთი! კაცი იმის დამნახავი, მობურთავეც რომ არ ყოფილიყო, მეტი-მეტი ნდომისგან ენას დაიკვნეტავდა, — ტყავისა იყო, ნამდვილი, „ქალაქური“, ახალთახალი, ფეხდაუკარები, ლამის თვითონ ათამაშებულები, სულ ნაპერწყლებსა ჰყრიდა და კარგა მოწეული ჰახ-ჰახა საზამთროსავით წითლად ლუოდა. თუმცა, რა გინდა, — დიდი ყმითი ვიღაცა ჩანდა ბურთის პატრონი. ეზოში ჩამოსვლას თაკილობდა, იქაურ ბიჭებში გარეგანს უკადრისობდა, და აქაო და თბილისელი ვარო, აქაო და წითელი ბურთი მაქვსო,

თავი ერთი ვინმე მოხელე-ნაჩაღნიკივით ეჭირა. იჯდა ერთ-თავად აივანზე — მოყამული, დაძმარული, ხელში თავის კოხტა ბურთს ათამაშებდა გამომწვევად და ეზოში გამოფენილ ბიჭებს ისეთი მავნე თვალებით გადმოსცქეროდა, თითქოს ამბობდა: ბიჭიკ მე ვარ, ფეხბურთელიც, ამირანიც მე მქვიაო... ვერაფერი შეილი ამირანი ის იყო, იმისმა თავის გახეთქვამ. ამირან — ტარიელისა რა მოგახსენოთ და, უფრო კი იმ ავ ძაღლსა ჰგავდა, თვითონ რომ არა ხეთქავს და არც სხვას აქმევს.

რა იცით, იქნებ ჩვენი გაფუჭება არ უნდაო, — თქვა გვაჩაიამ. რაც უნდა იყოს, მაინც თბილისელია, კარგი თამაში ეცოდინებო, — კვერი დაუკრა ვალოდიამ. ალბათ, ისეთი მხეცი მოთამაშეა, ყველას აგვამატავენს, ხალხში თავს მოგვჭრის. შეგვარცხვენს და გაგვაწითლებს თავის ბურთივითაო, — იშიშა კაკოიამ. ხუმრობა-ხუმრობაში, ბიჭებს, ერთი პირობა, რიდიც შეუდგათ, ჩუმი შიშიც ბურთის პატრონისა. მაგრამ იფეთქა ბორიამ, სიმართლე თქვა და სამართალი დაამყარა: თავი ძლივს დააქვს, ტანი და ფეხები, მაგ თოხლო-ბიჭის რა მცოდნიაო!.. ჩამოვიდეს, გვეთამაშოს, ეგ ლობიო, შავი ტანი და თეთრი ტანი აბანოში გამოჩნდებო, — გაწიწმატდა გრიშაია. მერე ყველა გაგულისდა: უპ, მაგისიო და უპ, ეგ ასეთ-ისეთიო! მკერდზე მჭილს იცემდნენ, ჩუმად დუღლუნებდნენ, მაგრამ „ბურთის ხათრით“ ხმამალალს ვერას უბედავდნენ კალისტე ლანჩავას აივანზე მუხრანბატონივით წამომჯღარ ქალაქელ ბიჭს, — სულ არ დავაფრთხოთო!

ერთხელ, ამ წითელმა ბურთმა თავისი რომ დამართათ, — თვალი მოსჭრათ, მზე დაუბნელათ, გონება წარსტაცათ, — ველარ მოითმინეს, გაბედეს და ქვემოდან ზემოთ სიტყვა შეაწიეს:

ჩამოდი, გვეთამაშე, შენც გაიხარე, ჩვენც გაგვახარეო!.. „პირველი სიტყვა იმათა თქვესო“, — გაიბერა კალისტე ლანჩავას ძმისწული. ერთ ხანს აგრე იჯდა გაბადრული, განაზული. მერე ის ბუქურაულის ძაღლივით დასტამბო თავი გვერდზე გადახარა, მამალი ინდაურივით ღაბაბი სამად დაკეცა, ეზოს ირიბად გადმოხედა, ყვითელი კბილები გადმოყარა და ბიჭებს სამადლოდ გადმოუგდო: თამაში თუ იცითო!... გაგიყენენ ბიჭები. ვაჰმე ჩვენო, — მკერდებზე ბაგუნი აიტეხეს, ეზოდან უსიტყვოდ გაიკრიფნენ და ყორეზე ჩამოსხდნენ დახოცილები...

ოღონდ, თქვენ ნუ დამიღონდებითო, — გვაჩაიამ და საქმე უმალ „დაკლანა“. ყველაფერს ის აჯობებს, მაგ უცხო ჩიტს საკენკი დავუყაროთო, — გაანდო ძმაბიჭებს. რა საკენკიო?.. რაო და... აბა, ეგ როგორ იქნება, უარესად დაგვცინებს, უფრო მეტად აგვიგდებსო... თქვენ გულით ითამაშეთ და მერე ნახეთ იმის მუხლის კანკალიო... არა და არაო!... დამიჭერეთ, მე არ ვიყო გვაჩაიამო!..

დაუჯერეს და მეორე დღეს იმ უცხო ჩიტს საკენკი დაუყარეს: გამოიტანეს ის ოხერი გაჭირვების ღორის ბუშტი, გააგორეს და გამოაგორეს, გაახურეს და ცეცხლი წაუკიდეს, გაახურეს და „ორგოლობანა“ გააჩაღეს. გაჰქონდათ და გამოჰქონდათ ღორის ბუშტი, იყო ერთი მიდი-შვიდი... უყურა, უყურა თოხლო-ბიჭმა და იმასაც შეუდგა ბურთის გერემა — კოკის ქავილი, მუხლის კანკალი. მაშ როგორ! — თოხლო იყო თუ ლობიო, მაინც ბიჭი ერქვა, ბურთი ჰქონდა კლაპიტონისა და ამირანს ეტყოდნენ სახელად. გაგორდა აივნოდან, ჩამოგორდა კიბეებზე და შემოგორდა ეზოში: აი, ჩემი წითელი ბურთი, მეც მათამაშეთო. ბიჭებმა ჯერ თვალს არ

დაუჯერეს, მერე გვაჩაიას ჭკუა ირწმუნეს, სიხარულით ცას ეწვივნენ, მთვარეს მისწვდნენ და ვარსკვლავებს დაუწყეს თამაში. თუმცა, თავი დაიჭირეს, ნირი არ იცვალეს, არაფერი შეიმჩნიეს და ცივი უარი უთხრეს: ახლა გვიან არი, შუა თამაშში ვართ, ვერ მიგიღებთო. დაიწვა, დაიფუტქა თოხლო-ბიჭი—ამ გაუთლელებმა ქალაქელ ბიჭს, ეს რა სიტყვა მაკადრესო!.. როგორ თუ არ მიმიღებთ, განა ჩემი წითელი ბურთი, მაგ თქვენ ღორის ბუშტს არ ჯობიაო?!... ჯობდა და მერე ეგრე? მაგრამ, ბიჭები გვაჩაიას „პლანზე“ ისხდნენ და ერთ ხანს კიდევ გაინაზნენ: ამ ღორის ბუშტს ნუ დასცინი, უცხო ხილიაო, ჩვენებური არ გეგონოს, ზაგრანიჩნიაო!.. ვაო?! — პირი დაალო თოხლო-ბიჭმა. მაშ, რა გეგონაო!.. მათამაშეთ, რაო!.. არ მოხერხდებაო!. დაიღრიჯა თოხლო-ბიჭი, დაპაბი დაქაჩა, ყანყრატო დაიგლიჯა მუდარით, თითო ცრემლი გადმოაგდო, მაგრამ, გაკერპდნენ, გაჯიუტდნენ ბიჭები... მე გვაჩაიამ: რას მიჭქარავთ, მუდრეგებო, მეტი არ მოგვივიდესო, ეგ ბურთი არ წაიღოს, სულ არ გაგვექცესო!.. დაუჯერეს გვაჩაიას, და ნებას ჩამოვიდა ბორია: ყაბულსა ვართ, გათამაშებთ, მაგ შენ წითელ ბურთითაო!

ის ღორის ბუშტი დამალეს, მეზობელი ეზო გამოიწვიეს, იწილადობილეს, საქმე გაინაწილეს, თოხლო-ბიჭი გოლკიპერად გაიმეტეს, გვაჩაია ბეკად დანიშნეს, ვალოდიას შუა დაცვა მიანდეს, გრიშაიას ხაზბეკობა მისცეს, კაკოიას გარემარბობა უთხრეს, ბორია ცენტრად დააყენეს, კაპიტნად აირჩიეს, წითელი ბურთი გაიგდეს, ეზოს ყიყინა დასცეს, სახლები ააკანკალეს, მეზობლებს გული გაუწვრილეს, ის ბურთი ლამის შექამეს და ნამდვილი ფეხბურთი გააჩაღეს ნამდვილ ბურთს

მოწყურებულმა ბიჭებმა. მერე თანდათან იმძლავრეს, მეტოქეს კარზე დაასხდნენ, „ცალგოლობანა“ გამართეს, თავის გოლკიპერს ბურთი არ გაუჭაჭანეს, საქმე წაართვეს და მოთმინება დაუღიეს.

შუა თამაშში, ბურთი რომ გატკბა, დაღლა გაქრა, გაქცევა გაადვილდა, — აუჯანყდათ თოხლო-ბიჭი, აღარ დადგა გოლკიპერად: გოლკიპერობა თქვენო, ცენტრობა მეო, კაპიტნობაც მეო, ყველაფერი მეო. საცემი იყო, მაგრამ, რას იზამდნენ, — „ბურთის ხათრით“ დამორჩაღდნენ და წინ მიუშვეს სათამაშოდ. ერთი უნიათო ვიღაცა გამოდგა. უქმად ირბინა, დათვივით იძუნძულა და დაწყვიტა ბიჭები სიცილით... კალისტე ლანჩავას ძმისწულმა იხტიბარი არ გაიტეხა: ბურთის ტარება არ ვიცი, მარა დარტყმა მაქვს მაგარიო!.. „ბურთის ხათრით“ არც ამაზე დაზარდნენ. წამოვიდა ბორია, სამი ერთად მოატყუა, მეკარესაც „აჭამა“ და ცარიელი კარის გასწვრივ გაუგორა ბურთი თოხლო-ბიჭს — ჰა, შეაგდე, გაიხარე, ოღონდ, შენ არ გაგვიწყრეო. მოტრიალდა თოხლო-ბიჭი, ახლა გაჩვენებთ თბილისურ „შუტსაო“, მოიქნია მარჯვენა ფეხი, ააცდინა, თავი ველარ შეიკავა, ტანი ველარ დაიმავრა. ყირამალა გადაიქცა და ამოდენა მოზვერს მიწაზე მოსძვრა ბრაგვანი... დააყარეს სიცილი. წამოდგა რის ვაი-ვაგლახით. დაბეგვილი და წელმოწყვეტილი, შერცხვენილი და დაღრეჯილი: ეს ამბავი თქვენ მომიწყუტ, თქვენ გაქვთ ბრალი ამაშიო, ჩემი ბურთი დამიბრუნეთ, აღარ მინდა თამაშიო!.. ბურთს ხელი დაავლო, სლუკუნით გაგორდა ეზოდან და ოხვრა-კენესით აგორდა კიბეებზე.

ვაი, ჩვენს თავსაო — იტკიცეს შუბლში ბიჭებმა, მაგრამ

რაღა დროსი იყო სინანული, წამხდარ საქმეს რაღა ეშველე-
ბოდა!.. და დარჩენენ ისევ ფეხმოცარულნი, ხელცარიელნი, ხა-
ხამშრალნი — იმ თავისი ღორის ბუშტის ანაბარა.

* * *

იმ „გაუხარელ“ და „ჩვეულებრივ“ დღეებში, როცა საბურ-
თავი არა ჰქონდათ მოსახელი ან სხვა რამე სათარსავი, — ზღვა
იყო იმათი იმედი, ნუგეში, უღალატო მეგობარი.

მზე რომ გახუნდება — ელვარება დაეღევა, სხივები გაეც-
რიცება და ეს ამოდენა ცეცხლადქმნილი საოცრება დედამიწას
დაემალება... გახურებულ ქვიშას სამხრობის პირველი გრილი
რომ დასუნთქავს და წყლის მრუდე სარკეს ნელი ზღვაური
გადაფარცხნის... — ზღვაში შეცვივდებიან, თავს მისცემენ
აქაფებულ ტალღებს, ჯერ უბურთობით დამდულრებულ გუ-
ლებს გაიგრილებენ, მერე ყოჩაღ ბიჭობას გაიხსენებენ და
ერთმანეთს ილათს გაუსინჯავენ ცურაობაში, ყვინთაობაში,
ნიჩბოსნობაში, აღერებას შემდგარი „დიდი ეზოს“ ბიჭები:
იმნაძე კაკოია, ბერძენიშვილი ვალოდია, გაგუა გრიშაია, ჯორ-
ბენაძე გვაჩაია, პაიჭაძე ბორია... კაკოიას გრიშაია აჯობებს
გაგუა, გრიშაიას ვალოდია გატეხავს ბერძენიშვილი, ვალოდიას
გვაჩაია სძლევს ჯორბენაძე, გვაჩაიას ბორია დაჯაბნის პაიჭაძე
და ყველას ბორია დაჯაბნის პაიჭაძე. ყვინთაობაშიც, ნიჩბის
მოქნევაშიც. იხვივით დაცურავს ბორია...

მერე ყველაზე ძნელს იზამენ: ვინც ტალღებს სწორს დაუ-
ღებს, სივრცეს არ შეუდრკება, ზღვაში დაიკარგება და პატარა
წერტილად გამოჩნდება ნაპირიდან, საბოლოო გამარჯვებაც

იმისი იქნება. ამაშიც პირველობას ბორია დაიჩემებს პაიჭაძე. იხვივით დაცურავს ბორია.

ყრიან ნაპირზე ტიტლიკანა ბიჭები და პირდაღებულები გასცქერიან შორს, ლურჯ უსაზღვროებაში პაწაწინა წერტილად ქცეულ უშიშარ მეგობარს. მაშ, ცოდვა არ იქნება ეგ ბიჭი მეზღვაური არ გახდეს, ბურთის დევნაში დალიოს დღენი და ხმელეთმა შექამოს?! არა, ბორია ზღვისათვის არის გაჩენილი და იმისი სიკაბუკე — ახალგაზრდობაც ზღვას ეკუთვნის, ზღვამ უნდა შეიწიროს. ალბათ, აგრეც იქნება: დაამთავრებს გაისად საშუალოს და საზღვაო სასწავლებელს მიაშურებს. მერე რა ვუყოთ, რომ გზები გაეყრებათ: ბურთსაც დაივიწყებს. ღორის ბუშტსაც და იმით თავსაც. სამაგიეროდ, კაცად ივლის ამ ქვეყანაზე...

სხედან ქვიშაზე ტიტლიკანა ბიჭები და განცვიფრებულები გასცქერიან პატარა წერტილს, რომელიც თანდათან მსხვილდება, დიდდება, უახლოვდება ნაპირს.



კარგა რომ მომწიფდნენ, მზერა აემღვრათ, იერი ესხვაფერათ, ხნა გაუტყდათ, საწვერულვაშოზე პირველი ღინღლი აეშალათ, ბავშვური შემოელიათ და სიკაბუკური მოერიათ — იკადრა დიდმა ფეხბურთმა, მოწყალემა გაიღო, იმათ პატარა ქალაქშიაც შემოიხედა. იმ ხანებში, ფოთის მშვენიერ სტადიონზე თითქმის ყოველდღე იდგა ხოლმე გაგიჟებისა და თავდავიწყების ბედნიერი, დაუვიწყარა, სანეტარო წუთები. სწორედ ეგ იყო უბურთობით „გალახული“ „დიდი ეზოს“ ბიჭების ხსნა.

სხვათა თამაშობით იცხრობდნენ გულის სიღრმეში ატეხილ ტკივილს... მაგრამ, ეს ოხერი, ფასიანი იყო ყველა დასწრება, და საწყალ ბიჭებს სადა ჰქონდათ იმდენი შეძლება, ყოველდღე ერბინათ სტადიონზე.

თამაშები კი, მართლა საინტერესო იყო, — დაძაბული, შეუპოვარი, დაუნდობელი. ხშირად ერთი დავიდიარბით, გაწევგამოწევით, კეტების ტრიალით მთავრდებოდა. ხან ვის დაამტვრევდნენ თავ-პირს, ხან ვის დაუზელავდნენ გვერდებს, ხან მოთამაშეები ზარალდებოდნენ, ხან მსაჯები იწირებოდნენ მსხვერპლად, ხანაც მაცქერალნი დაერეოდნენ ხოლმე ერთმანეთს...

ფოთის გუნდების მეტოქეები — ან ადგილობრივ ნავსადგურში მდგარი უცხოეთის გემების მეზღვაურები იყვნენ, ან მოსკოვის, ლენინგრადის, თბილისის, ნოვოროსიისკისა და დონბასის ფეხბურთელები. ასე რომ, ძაან თამაშები იყო! — მოსკოველების მრისხანე იერიშები და ფრანგების აჟურული თამაში, ლენინგრადელების გაძოუცნობი კომბინაციები და ინგლისელების ურიდი შეტევები, თბილისელების ტემპიანი გარღვევები და თურქების გონებამახვილური ფინტები. რას არ ნახავდა კაცის თვალი!... და ფოთის მშვენიერ სტადიონზე თითქმის ყოველდღე იდგა ხოლმე გაგიჟებისა და თავდავიწყების ბედნიერი, დაუვიწყარი, სანეტარო წუთები... ჰოდა, რაღა თქმა უნდა, იქ არ წასვლა, იმ თამაშებზე ვერ დასწრება — ყველა მიწიერი და ზეციერი სატანჯველის ტოლი იყო „დიდი ეზოს“ ბიჭებისათვის. არა და, რა ქვას იხლიდნენ, ამოდენა ფული სად ეშოვნათ: ან იმნაძე კაკოიას, ან ბერძენიშვილ ვალოდიას, ან გაგუა გრიშაიას, ან ჯორბენაძე გვაჩაიას, ან პაიჭაძე

ბორიას. არც ერთი იყო მორგანის შვილი, არც მეორე — როკ-ფელერას მემკვიდრე. რა ოხრობიდან „დაეჩითათ“, ქალღმერთიდან ხომ არ გამოსჭირდნენ და!.. გამოსავალი ერთი-და რჩებოდათ: უბილეთოდ შეძრომა. ამას კი მოთქვება უნდოდა, ჭკუის „დანჯღრევა“, საქმის „გაიმასქნება“, „დაბლანვა“ და, რაც მთავარია, „შანციანობა“. თუმცა რა, იქ არა ჰყავდათ „შანცის ერთი“ გვაჩაია? — დაჯდებოდა, იფიქრებდა და რასმეს „გაიმასქნებდა“. მეტი რა საქმე ჰქონდა, არ ვიცო!..

... ერთ კვირა დღეს ქალაქი ფეხზე დადგა, შორიანლო სოფლები აიყარა და სტადიონის ჭიშკარს ქვეყნის ხალხი მიაწყდა. სად იყო ან ბილეთი, ან ადგილი, ვისა სცხელოდა წვრილფეხობისათვის! ხუმრობა საქმე ხომ არ იყო: ფოთი მოსკოვს ეთამაშებოდა!

მთელი ღამის უძინარ ბიჭებს, დილიდანვე წაუხდათ გუნება, დაეკარგათ მოსვენება. რა გვეშველებს, რა ვიღონოთ, რა მანქანებით შევალწიოთ სტადიონზე? — უტრიალებდათ აღმოდებულ გონებაში და ერთ ადგილზე ვერ ჩამეშხლათ. ბედგამწყურალებივით დალაჯუნობდნენ და ცოდვილებივით წარამარა შესცქეროდნენ საათებს.

დათქმული ღროც მოვიდა: შუადღე რომ გადავიდა, მზე ზღვისაკენ დაიწვერა და კარზე მომდგარმა ფეხბურთმა ქალაქს სუნთქვა შეუგუბა, — სადღაც სტადიონის შორიანლო, რიონის პირას შეიყარნენ გასაჭირში ჩავარდნილი ბიჭები. სიკვდილმისჯილებივით ისხდნენ ერთ ხანს, დანა პირს არ უხსნიდათ. მერე თანდათან დაეტყოთ სიცოცხლის ნიშანწყალი, თავები მალა აიღეს, ფერდაკარგულებმა გვაჩაიას დაადგეს უძინარი თვალე-

ბი: აბა, ბიჭო, გვაჩიო, შანცი ნუ დაგვიწყნიაო, სტადიონზე მოგვაყუჩე, უნდა გვიხსნა აწიაო!..

წამოდგა გვაჩია, ჯერ სტადიონს გახედა, არეშარე დაზვერა, მერე შუბლზე თითი მიიღო, ბრძნული გამომეტყველება მიიღო, იფიქრა, იფიქრა და... ვერაფერი ზოიფიქრა...

ღროს მოთმინება ელეოდა... საცაა თამაში დაიწყებოდა. ბიჭები ღელავდნენ: ფიქრი კი არა, ახლა, მოქმედება იყო სა-
ჭირო. სწრაფი საზრიანობა, გაბედული მოქმედება. მაგრამ მოქმედება თავკაცს მოითხოვდა, და აი, ისიც, გამოჩნდა: პაი-
ჭაძე ბორია...

თითქოს ვიღაცის დაყურებასა შიშობსო, ჩუმად გაანდო ბიჭებს ათჯერ გაზომილი და ერთხელ მოჭრილი. ხელაღებულ იყო გეგმა, რისკიანი ბიჭის ნააზრი, მაგრამ მარტივი და ღლე-
სავით ნათელი: ჯიქურ მისვლა სტადიონზე, ან როგორც იქაუ-
რები იტყოდნენ — „ნაურა“ შევარდნა — არ გამოდგებოდა, რადგან ურთადერთ შესასვლელს ფხიზლად დარაჯობდა „უბი-
ლეთობის“ დაუნდობელი მტერი — ჩოხაახალოხიანი მრისხანე მილიციელი, უღვაშა ალე გაბისონია. სამაგიეროდ, სტადიონს ერთმხრივ რიონი ჩამოუდიოდა, და ბორიას გეგმის „ამოსავალი წერტილიც“ სწორედ ამაში მდგომარეობდა.

— თუ გულდაგულ გავყვებით დინებას, რიონი ათიოდე წუთის შემდეგ სტადიონზე შეგვიყვანს, — დაამთავრა ბორიამ და მისი სიტყვები აღფრთოვანების ძახილმა დაფარა.

არ დააყოვნეს, ტანსაცმელი გაიძრეს, თავზე შემოიხვიეს, რიონში ჩაცვივდნენ და მწყობრი მხარულით გაჰყვნენ დინებას. სტადიონს რომ გაუსწორდნენ, დინებას თავი დააღწიეს, ფაცხაფუცხით ამოცვივდნენ ნაპირზე და თავგებივით შეძვრ-

ნენ მაყურებლებში. ალე გაბისონია კი ამ დროს ულვაშებს იპრეხავდა, ღილ-კილოს ისწორებდა, ადლიან სატევეარს აწვალეზდა და თავაწეული ბოლთაობდა სტადიონის შესასვლელში — ჩიტი რომ ჩიტია, ისიც ვერ შემოფრინდებო.

ფრთები გაშალეს ბიჭებმა და გული იფონეს — მართალია დამარცხდნენ ფოთელები, მაინც ვაჟკაცურად გაუტოლეს მხარი მოსკოველ დიდოსტატებს.

∴ კარგა მოსაღამოვებული იყო, როცა ხილულითა და განცდილით დაქანცულნი, შთაბეჭდილებებით დამძიმებულნი ბრუნდებოდნენ შინისაკენ.

— ჩვენებს არ უნდა წაეგოთ, — თქვა კაკოიამ.

— ჩვენებს არ გაუმართლათ, — თქვა ვალოდიამ.

— „სუდიამ“ დაგვჩაგრა, — თქვა გრიშაიამ.

— ის „პენალტი“ რომ მოეცა, ის „აფსაიტი“... — დაიწყო გვაჩაიამ.

— არა, — გააწყვეტინა ბორიამ, — დღეს ნამდვილად გვაჯობეს, მაგრამ მოვა დრო და ჩვენ ვაჯობებთ!

ჰა, გურთი და ჰა, მოედანი!

„დიდმა ფეხბურთმა“ ამ პატარა ქალაქშიაც გააკეთა თავისი საქმე და მის უწყინარ მკვიდრთ ჯერ გამოუცნობი, უცხო რამ ცოფი შეჰყარა.

მთელი ქალაქი ავად გახდა. მთელი ფოთი ყირაზე დადგა. ჯერ პატარებმა შეუშტვინეს, მერე დიდებმა გააფრინეს. ჯერ გაჩნდა ბურთები, მერე დაიბადა გუნდები. მერე ეზო-ეზოს, ქუჩა-ქუჩას, უბანი-უბანს, ცოლიანი-უცოლოს, წვერიანი-

უწვევროს, უღვაშა-ქოსას დაეტაკა და... გაგიჟდა, გადაირია ქალაქი. მყუდრო ზღვისპირა ქალაქი შფოთმა შესძრა და კართებამ აშალა. ფეხბურთმა გამოიღარა ფოთში. უბურთობის ავდარი წარსულს უსახელოდ ჩაბარდა და კოლხეთის ბერი ქალაქი ფეხბურთის დიდმა ამინდმაც გამოაღვიძა... დღენი იდგნენ სიჩაუქის. ახლა ბურთიც მრავლად იყო და მოედანიც მობურთაღნიც დაუთვლელნი. ჰოდა, ვისაც თავი შესწევდა, მუხლი ერჩოდა, გული ედგა, ბურთი შეეძლო, შნო ჰქონდა და ბიჭობა რაჰისა — არ ეთქმოდა სამღურავი.

და იმდენ მჯობნის მჯობნ მობურთავეებში, „დიდი ეზოს“ უკვე დიდმა ბიჭებმა თვალი არ შეიკრთეს, თავ-პატიუი არ დაიწყეს, სიტყვას პირი მოხსნეს და მთელს ქალაქს ურიდად უთხრეს ის თავიანთი დიდი ხნის სათქმელი — მუხლიც გვმუხლობს, გულიც გვგულობს, ძალიც შეგვწვევს ქადილისაო! გამოდით, ტოლნი ვინცა ხართ და სწორი დაგვიდეთო!..

ერთი კი არა, კალისტე ლანჩავას „ლობიო“ ძმისწული! (კიდევ ახსოვდათ!) ჯიბრით — ათი ბურთი იყიდეს, „ზებრა“ მაისურები დაირტყეს, შავი ტრუსები ჩაიცვეს, „იმპორტნი“ კეტები მოირგეს (ბუცებს დაექა მომგონი — ფეხს ამტვრევდათ, ის ოხერი), გუნდი შექარეს, „ქარიშხალი“ დაარქვეს, მინდორ-ველად გაიჭრნენ, თანატოლებს დაერივნენ და ვინც იმათი გაფუჭება ინება, სულ ბღღვინი აღინეს...

ოო, ძაან ბურთი კი იცოდნენ, იმ კაი დედამამიშვილებმა ვალოდია რომ ერთი ბოლოდან დაუნიავებდა — ბურთი მინდვრის მეორე ბოლოში მოიღებდა ხათქანს. გრიშაია რომ დაიძრებოდა — ყველაფერი თან მოჰქონდა. გვაჩაია რომ ბურთს აკენწლავდა — უნდა დამდგარიყავი და გეცქირნა. კაკოია რომ

ფინტებს დაახვევდა — ერთი რამეთა ღირდა. ბორია რომ ბურთს ჩაიგდებდა — წართმევა აღარ გინდოდა? გადიოდა და გამოდიოდა, გაჰქონდა და გამოჰქონდა, იმის ნახვას არაფერი სჯობდა.

მალე მთელს ქალაქში ფალავანთა ფალავნობა დაიჩემეს. ფოთში ხმა დადიოდა: „ქარიშხალი“ დიდებსაც წაახდენსო. ფოთში იმასაც ამბობდნენ: „ვალოდია ბერძენიშვილი ბეკიას პირველი“, „გრიშა გაგუა ხავბეკიას ნამდვილი“, „გვაჩი ჯორბენაძე ინცაიტიაო უჯობნი“, „კაკო იმნაძე გარემარბიაო მოუხელი“, „ბორია პაიჭაძე“... და იმის ხსენებაზე — თვალებს მინაბავდნენ, თითის წვერებს დაიკოცნიდნენ, ტუჩებს ააწრუპუნებდნენ: იფ, იფ, იფო! და ნწუ, ნწუ, ნწუო!

საბრძოლო ნათლობა

როცა 1929 წლის გაზაფხულის ერთ ყალმით დახატულ დღეს, ბორიამ „ხუთიანებით“ და „ოთხიანებით“ დამშვენებული სიმწიფის ატესტატი მოარბენინა სახლში, არც მამას — სოლომონ პაიჭაძეს, არც დედას — ოლლა ტულუშს, არ უმარჩიელიათ, არ უწილადობილიათ და თვალდახუჭულებს თითი თითისათვის არ დაუტაკებიათ, სხვა ონავრების მშობლებივით: „ღმერთო, გვირჩიე, ჩვენი გიჟი ბიჭი, რომელ უმაღლესში მივაბართო“!..

არა, იმათ საამისო არაფერი უჭირდათ. ამ მხრივ სოლომონი და ოლლა ბედნიერი მშობლები იყვნენ: წიგნიც ისევე იოლად ეძლეოდა ბორიას, როგორც მინდვრიანზე ბურთის ქენება და ცხოვრების დიდი გზაც კარგა ხანია ჰქონდა შეთვალეირებუ-

ლი. ზღვა იყო—ბავშვის ლამაზი ოცნება, ზღვა იყო — ჭაბუკის ურყევი არჩევანი. ზღვა, და მხოლოდ ზღვა... მამამაც შეუქო არჩევანი: ჩემი ბიჭი დიდკაცობას უმიზნებს, გემის კაპიტანი გახდებაო. დედამაც მოუწონა მომავალი: ჩემი შვილი ქვეყანაზე თვალს გაახელს, მოგზაური იქნებაო. ჩვენი სიხარული და ბედნიერება ტკბილად დაგვაბერებსო, — უხაროდათ მშობლებს...

და როცა, 1 სექტემბერს, მზიან დილით, ბორიამ ფოთის საზღვაო ტექნიკუმის კარი შეაღო, მომავალ მეზღვაურებს გვერდში ამოუჯდა და ზღვის საიდუმლოების პირველი ანაბანა მოისმინა, — სოლომონ პაიჭაძემ დედამიწა ქალამნად მოირგო. ცა ქულად დაიხურა და ერთი კარგი პურ-მარილიც გაუშალა თავის მეგობრებს: მოდით, დამლოცეთ, სიხარულს მეზიარეთ. ჩემი გიჟი ბიჭი ცხოვრების გზაზე დავაყენეო.

* * *

ნიკოლოზ ნოსოვის, ალექსანდრე კოტლიარევსკის, პავლე ბოგოლიუბოვის, ვლადიმერ პადაპრიგორას საინტერესო ლექციებმა, დაძაბულმა საზამთრო და საგაზაფხულო სესიებმა, შეუმჩნევლად დალიეს ის ორი წელიწადი.

კი არ ისმენდა, ნთქავდა ლექციებს ბორია... ნიკოლოზ ნოსოვი „ზღვის კანონებს“ უხსნიდათ, ალექსანდრე კოტლიარევსკი „ქვაბების“ შესახებ უკითხავდათ, პავლე ბოგოლიუბოვი „საერთო დისციპლინას“ აცნობდათ, ვლადიმერ პადაპრიგორა „შიდა წვის ძრავებს“ ასწავლიდათ. ლექტორების ყოველ

ნათხრობს, ყოველ სიტყვას, ხარბად ეწაფებოდა ცოდნას მოწყურებული ჭაბუკი...

პირველ წელს ცოტა არ იყოს ეძნელა ბორიას, — არც თუ ისე ადვილი გამოდგა საზღვაო ხელოვნების დაუფლება. მეორე წელსაც მოიკოკლებდა აქა-იქ. მაგრამ შრომამ, მონღომებამ, ნიჭმა და ენერგიამ, წიგნებთან ჭიდილში გატეხილმა ღამეებმა. მაინც გაიტანეს ლელო: მესამე სასწავლო წლის ბოლოს, ბორიამ ბრწყინვალედ დაიჭირა საკურსო გამოცდები... ტექნიკურ მის ხელმძღვანელთა განკარგულებით, გემთმცოდნეობის ფაკულტეტის დეკანმა ნიკოლოზ ნოსოვმა სწავლაში წარჩინებულთა სია შეადგინა. სიაში სულ 13 ჭაბუკი იყო მოხსენებული. ისინი პრაქტიკული ცოდნის მისაღებად ფოთის საწარმოებში იგზავნებოდნენ. მათ შორის იყო: მესამე კურსის ფრიადოსანი სტუდენტი ბორის სოლომონის-ძე პაიჭაძე.



ბედმა გაუღიმა ბორიას და იღბალმა გაუცინა: ისეთ კოლექტივში მოხვდა, იმნაირ ხალხში ჩავარდა, — კაცი რომ ინატრებს. კარგი სპეციალისტებიც მრავლად იყვნენ, გულღია საამხანაგო ბიჭებიც და, რაც მთავარია, ბურთაობის მოტრფიალენიც ყოველ ფეხის გადადგმაზე. ეს ვეებერთელა საწარმო, როგორც იტყვიან, — ფეხბურთის ტრფიალს აეტანა. მისი, თითქმის ყოველი მუშა-მოსამსახურე, — ფეხბურთს იყო გადაყოლილი. მაგრამ, რა თქმა უნდა, მხოლოდ თავისუფალ დროს: დაიწყებოდა შესვენება თუ დამთავრდებოდა სამუშაო,

მთელი კოლექტივი ფოთისა და თბილისის, მოსკოვისა და ლენინგრადის, საბჭოთა და უცხოელი, და ვინ გინდა და ვინ არ გინდა ფეხბურთელის არამკითხე მსაჯული ხდებოდა. იყო ერთი ყაყანი, ჯაჯლანი, დავა-კამათი. ხან ეს იყო ჭკვიანი, ხან ის იყო სულელი, ხან ერთი იყო მართალი, ხან მეორე იყო მტყუანი. ისი კაცი ერთად ლაპარაკობდა, ერთად კიოდა და ერთად ყვიროდა, ერთად ამტკიცებდა და ერთად უარყოფდა, ერთად სჭრიდა და ერთად ჰკერავდა. ქარხანაში ყველა — მთლად უფროსიდან დაწყებული მთლად უმცროსით დამთავრებული, ფეხბურთით იყო დაავადებული. ავად იყო საქარხნო კომიტეტის თავმჯდომარე — ვანიჩკა ალანიაც.

ვანიჩკა ალანია იმ დროისათვის უკვე სრულიად საქართველოს მასშტაბის ავადმყოფი გახლდათ და იმისი დაუჯერებელი ამბები მოდურ ანგდოტებად დადიოდა ამერ-იმერ, თბილისსა და ქუთაისში. ფოთში ხომ იცნობდნენ და იცნობდნენ. მთელი ფოთი და ვანიჩკა ალანია. ქალაქის სტადიონზე თამაშის დროს, თუ ბურთი მასპინძელთა ბადეში აფართხალდებოდა და ვინმეს გული გაეპარებოდა, თუ სტუმრების კარში გოლი გავიდოდა და ვინმე დაჭრილი დათვივით აბღავლდებოდა, თუ მსაჯი საქმეს გააჭირებდა და იმის საცემად მოედანზე ვინმე თავზეხელადებული გავარდებოდა, — იტყოდნენ ხოლმე ფოთელები: „ეგაც რა ვანიჩკა ალანია გამიხდაო“... თქვენ, ვანიჩკა ალანიას ოთახი უნდა გენახათ ქარხანაში და იმ კაცის ასავალ-დასავალს მაშინვე გაიგებდით. საქარხნო კომიტეტის ოთახი — სტადიონის დირექტორის კაბინეტს ან „გულშემატკივართა კლუბს“ უფრო ჰგავდა, ვიდრე მუშა-მოსამსახურეთა უშუალო ხელმძღვანელის ადვილსამყოფელს. კედლებზე სხვადასხვა საფეხ-

ბურთო პირველობათა გათამაშების აღმნუსხველი ცხრილები ეკიდა ერთთავად. რას არ ნახავდა, აქ, კაცის თვალი: საკავშირო, რესპუბლიკის, რაიონის, ქალაქისა და უბნების, ქუჩების, ეზოების პირველობის ცხრილებსაც კი. მათ შორის მჭლომი ვანიჩკა ალანია ლამის თვითონაც ზეპირ საფეხბურთო ცხრილად გადაქცეულიყო და კისერზე თავის ნაცვლად ბურთი გამობმოდა. ეს კაცი ფეხბურთით სუნთქავდა, ფეხბურთით აზროვნებდა, ფეხბურთით საზრდოობდა, ფეხბურთით ცხოვრობდა ამ ფეხბურთით სავსე ქვეყანაზე.

ვანიჩკა ალანიას მძიმე ავადმყოფობას, ჩანს, უქმად არ ჩაეგლო და რიცხვმრავალ გულშემატკივრებს გარდა საწარმოს კარგა მაგარი გუნდიცა ჰყავდა. მუშები ხუმრობით „პარახოდი, ვანიჩკა და ალანიას“ ეტყოდნენ სახელად, რადგან ამ გუნდის დამაარსებელი, „მფარველი ანგელოზი“, — ფეხბურთისათვის თავდადებული, ფეხბურთისათვის თავგანწირული ვანიჩკა ალანია იყო.

... ერთ დღეს, დილაადრიან, საქარხნო კომიტეტის ოთახში ტელეფონმა დაიწკრილა, სათქმელი თქვა და თავმჯლომარე ააწრილა. ვანიჩკა ალანიამ უმალ ფერი იცვალა, თავი მაღლა ასწია, თვალეში მუგუზლები ჩაიყარა, ოთახი იპატარავა. გარეთ გამოვარდა, ხელები გაშალა, ხმა აიმაღლა, ყოველი სამჭრო სათითაოდ შემოირბინა და ქარხანა ფეხზე დააყენა... მეორე დღეს, ქარხნის ეზოში ერთი უშველებელი აფიშა გაჩნდა — მუშებს ფეხბურთი აუწყა, ფოთის „დინამოსა“ და „პარახოდი, ვანიჩკა და ალანიას“ ორთაბრძოლა საქვეყნოდ გამოაცხადა და დიდ-პატარას სტადიონისაკენ მოუწოდა... მესამე დღეს, დაიწყო თუ არა შაბაშობა, მთელი ქარხანა აიყარა,

ჯარად დაეწყო, საკუთარი გუნდის გასამხნეველად სტადიონისაკენ სიმღერით დაიძრა და ჭადრებს შეფარებულ ტრიბუნებზე გუგუნით გაიშალა.

ბორიაც, რაღა თქმა უნდა, აქ იყო. უჩვეულოდ გამოიციქირებოდა. უქეიფობა ეტყობოდა ნირზე და იერზე. ჭაბუკს შუბლი შეეკრა, წარბები შეეყარა, თვალებში ნაღველი ჩაედვარა, მინდორზე ჰქონდა მზერა, მაგრამ ფიქრით სხვაგან იყო. „კაცი კაცად არა მთვლის... ჯერ ისევ ბავშვი ვგონივარ ქვეყანას... მერე რა ვუყოთ, რომ ჩვიდმეტი წელი მხოლოდ ახლა შემისრულდა... ხამი ხომ არა ვარ და ბურთის უნახავი... ბურთი როგორმე მეც მითამაშია და დრო იყო ქალაქი ჩემზე ლაპარაკობდა... რა მოხდება, ერთხელ მაინც მცადონ, ეგების გამიმართლოს და გამომივიდეს თამაშით...“ არც ხალხის გაბმული ყიყინა ეყურებოდა, ვერც მინდვრის შუაგულისაკენ დინჯი ნაბიჯით მიმავალ მსაჯებს ამჩნევდა. ფიქრში გართულმა ჭაბუკმა ვერც ის შენიშნა: ჭარხნის გუნდი მინდორზე გამოსვლას რომ აგვიანებდა და გასახდელიდან რა დაფეთებული ამოვარდა საქარხნო კომიტეტის თავმჯდომარე ვანიჩკა ალანია...

...ამ დროს გასახდელში ერთი ამბავი იყო. „ვანიჩკა და ალანია“ გუნდის მარცხენა გარემარბმა კუკა მაქაცარიამ გუნდი დააღალატა — სადღაც ძმაკაცებს შეეყარა, ზედმეტი გადაჰკრა და თამაშზე არ გამოცხადდა. კურდღელი რომ გამოვარდა, ჩემს მეძებარს ძილი მაშინ მოუნდაო — სწორედ ისე იყო იმათი საქმე. ბიჭები თმებს იგლეჯდნენ, ვანიჩკა ალანია გადარეული დარბოდა... ბორია ვათამაშოთო, პაიჭაძე, — უცებ გამოსავალი იპოვა ვანიჩკამ, სახე გაეზადრა და ისევ კაცს დაემგვანა... ბორიაო?! — ფეხბურთელებმა, გაიცინეს და ხელი

ჩაიქნიეს... მაგრამ, ვანიჩკა ალანიას საცინლად არ ჰქონდა საქმე. ფოთის „დინამო“ ისედაც ძლიერი იყო, და ახლა, ათი თერთმეტის წინააღმდეგ, აბა, რას გააწყობდა! ვანიჩკამ წამითაც აღარ დააყოვნა. ტრიბუნებზე კაცები აფრინა — სადაც გინდათ, როგორც გინდათ, ბორია იპოვნეთ და უმალ აქ მომგვარეთო!

იპოვნეს და მოუყვანეს. ჩააცვეს, შეკაზმეს და მოედანზე გაიყვანეს. ნაფიქრი რომ აუხდა, ნატვრა აუცხადდა თვალდათვალ, თავი სიზმრად ეგონა ბორიას. „ვანიჩკა ალანია გულთამხილავი კაცი ყოფილა, ჩემს გულში მჯდარაო“, — ფიქრობდა განცვიფრებული ჭაბუკი და მინდორზე რომ გადიოდა, მთელი ეს უეცარი ამბავი, ჯერაც არა სჯეროდა...

გასვლით კი გავიდა, მაგრამ, ნეტა ფეხი მოსტეხოდა და იმ მინდორზე არ გასულიყო. ხალხი ეხამუშა, მინდორი ედიდა, ტანსაცმელი ეჩოთირა, გეტრები ეუცხოვა, ბუცები ემძიმა, ტყვიასავით გაუხდა ფეხები, ტანი ვერ დასძრა, მუხლი ვერ გაშალა, ბურთმაც უმუხთლა და... უყუვლა იმოდენა ხალხმა, სტვენით აიკლო იქაურობა... ტაიმი ისე დამთავრდა, ბურთი ვერ მოსინჯა ბორიამ.

გასახდელში რომ ჩავიდნენ, ფეხბურთელებმა ნიშანი მიუგეს ვანიჩკა ალანიას — ესეც შენი აღმოჩენაო! ეს კი ველარ შოთმინა ბორიამ. გულზე ცეცხლი შემოენთო თავმოყვარე ჭაბუკს: ეს ბუცები მომაშორეთ, ფეხშიშველა მათამაშეთ, მერე მე ვიცი და ჩემმა ბიჭობამო!.. გაიძრო ბუცები, გაიძრო გეტრები, მოირგო კეტები, დაბრუნდა მინდორზე, მუხლი გამართა, ძველებური გაიხსენა, უცხო ილეთები იკისრა, დინამოელი მცველები ოფლში აბანავა, მოედანი მიხაზ-მოხაზა და

ქვეყანა გააკვირვა. სამი გოლი „გააკეთა“ ბორიამ. ორი თვითონ გაიტანა, ერთიც ცენტრალურ თავდამსხმელს დევიკო ბექვაიას შეაგდებინა...

იხუფლეს ტრიბუნებმა, მთელი ქარხანა მინდორზე გადმოვიდა და ბორია პაიჭაძემ სულ ჰაერში იბურთავა.

— ბორია მე გავხსენი, პაიჭაძე მე აღმოვაჩინე! — ცივი ხმით გაჰკიოდა სადღაც ზღვა ხალხში მოტანებული ვანიჩკა ალანია და გრძელ, გამხდარ ხელებს ისე ასავსავებდა, თითქოს იზრჩობა და შველას თხოულობსო...

... იმ დღიდან მოსვენება დაკარგა ვანიჩკა ალანიამ და ვიდრე ბორია პაიჭაძე ფოთის ნაკრებში არ ჩაარიცხვინა, თავისი დაემართა.

ბამარჯობა თბილისში

1932 წლის ზაფხულში, ფოთელ ფეხბურთელთა ვეტერანმა და თავკაცმა მიტრო ასათიანმა ძველები დაითხოვა, ახლები აიყვანა, ახალი ნაკრები შეკრა, დაცვა თვითონ აკისრა, ნახევარდაცვა ბუჭულია ქვარცხავას ჩააბარა, თავდასხმა შალია მიქელაძეს მიანდო, „ოქროს თადარიგში“ ბორია პაიჭაძე ჩაადგო, გუნდი ჩონგურავით ააწყო, „ნოტებზე“ აათამაშა და ბურთით მოიარა საქართველო...

მიტრო ასათიანის ყოჩაღმა ბიჭებმა ხალხი ალაპარაკეს და საქართველოს ფალავნობა სასწორზე შეაგდეს. იმერ-ფოთი, ამერ-თბილისი. ან ერთი, ან მეორე. ორავ ერთად არ მოხერხდება, გამარჯვების ბეწვის ხიდზე ორივე ერთად ვერ გაივლის. პაექრობა მშვიდობიანად ვერ დასრულდება, პაექრობას ბრძო-

ლამ უნდა დაუსვას წერტილი, უკანასკნელმა და გადამწყვეტ-
მა ორთაბრძოლამ. ან ფოთი, ან თბილისი. აბა, ჰე და აბა, ჰო!...
დაგზავნეს კაცები და აწილადობილეს. ილბალი არ გინდა?! —
თბილისელებს ერგოთ არჩევანი. არც აცივა, არც აცხელა და
არჩევანმა: მოედანი ჩვენით, ბურთი თქვენით. არ ესიამოვნათ
ფოთელებს, მაგრამ, რას გააწყობდნენ. ადგნენ, აიბარგნენ და
თბილისის გზას დაადგნენ.

* * *

თუ არჩევანმა მიტრო ასათიანს, ბუჭულია ქვარცხავას, შა-
ლია მიქელაძეს, დანარჩენ ფეხბურთელებს და იმათ გულშე-
მატყვიერებს — გული დასწყვიტა და გუნება გაუფუჭა, ბორია
პირიქით — გაახალისა და უზომოდ გაახარა. და არა იმატომ,
გუნდის ბედი არ აწუხებდა, თანაგუნდელებისას არ იზიარებ-
და, ან ბიჭები ჰყავდა მწყრალოდ, არა, საქმე სხვა იყო. ჩვილმე-
ტი წლის ჭაბუკს თბილისი ჯერაც არ ენახა და საქართველოს
დედაქალაქს მხოლოდ წაკითხულ — ყურმოკრულით იცნობდა.
ბიჭი შემოვლას უპირებდა დედამიწას, ლიხს იქით კი არ გაეხე-
და. რაო? თბილისში არა ყოფილხარო?! — და გაწითლდებოდა
ხოლმე ამოდენა ბიჭი. რა ექნა! — დედა ძლივს აუდიოდა ოჯახს
და ძვირად გამოდიოდა სახლიდან, მამას ხომ არ ეცალა და არ
ეცალა. სხვა, აბა, ვინ მოატარებდა, ვინ აჩვენებდა, ვინ აღირ-
სებდა თბილის-ქალაქს.

...მატარებელი ძლივს მორჩა ზემო იმერეთს, მთების ჯა-
რას კივილით თავი დააღწია და ქართლის ველზე ლაღად გაი-
ვაკა...

პატარა რომ წამოიზარდა, თბილისში გაპარვის სურვილი

შეუჩნდა. „რა დიდი ბედენაა, დავებორწიალები თბალისის „სასტავს“ და ერთ დღეში ქალაქში ჩამახრიგინებსო“, — ფიქრობდა ბორია და გულის გასამაგრებლად, ნაცნობი ონავარი ბიჭების მაგალითებს იხსენებდა წარამარა. განა, ასე არ მოიქცნენ კოწიე ლაფაჩის ზურია, ვარინკა ხოშტარაას დათული და არდალიონ სიგუას ჩერჩილა? — დაადეს თავი და თბილისში იყვნენ მეორე დღეს. მერე კი, იცოცხლე, იმათ დღე დაადგათ! — ყოველ შაბათს ტყეპავდნენ. თუმცა, რა გინდა, თბილისობა კი შერჩათ და! არა, ერთ ცემად ღირს თბილისში გაპარვა. მართალია გცემენ, კარგა მაგრა დაგზელავენ, მარა სასიკვდილოდ ხომ არ გაგამეტებენ, რაც უნდა იყოს, მაინც დედ-მამაა. ისე, რომ, აიტანს კაცი!... დიდი იყო ცდუნება, მაგრამ დედის ხათრი აკავებდა და, რაც მთავარია, მამის შიში უბორკავდა ხელ-ფეხს. ჩასვლით, როგორ არ ჩავიდოდა იმ თბილისში, მაგრამ უკან დაბრუნება აღარ უნდოდა? სად დაემალებოდა, რა გადაურჩებოდა მამის რისხვას.

...მატარებელი დრიხინდრიხინით გადადიოდა ქსანის ხიდზე...

ახლა კი, როცა აღმოსავლეთით გაქვნიებული მატარებელი მის ოცნებასა და ნატვრას ფრთებს შეასხამს, საცაა, დღემდე უნახავ. მაგრამ საყვარელ ქალაქში შეფაგრიალებს,—როგორ არ გაიხაროს, გული არ აევსოს სიხარულით.

...მარცხნივ — ხრიოკი, ნაცრისფერი გორაკები უკურბიან... მარჯვნივ—ვერცხლის სარტყელშემოვლებული შიშველი სწორი ტრიალებს... მიჰქრის მატარებელი...

დერეფანში მიტრო ასათიანი გამოვიდა, ნაძმინარევი თვალები მოისრისა და ფანჯრასთან გარინდულ ჭაბუქს ესროლა მზერა.

...მარცხნივ — პატარა და მრავალსართულიანი შენობების დოღია... მარჯვნივ-ქანგისფერი ვაგონების გაუთავებელი რიგი... რახ-რახ, რახ-რახ... სახლები და ვაგონები, სახლები და ვაგონები... მიჰქრის მატარებელი....

— თბილისში შევდივართ, — მიტრო ასათიანმა ჰაბუქს მხარზე ხელი მოხვია და ფიქრა მოსტაცა.

ბორია გამოერკვა, ფანჯრის რაზა ჩამოსწია და ბრინჯაოსფრად გარუჯული სახე, უჩვეულოდ ანთებული თვალები მტკვრის ხეობიდან მონაბერ ნიავს შეაგება.

...მტკვრის ვეება ქვაბულში შედიოდა მატარებელი.. .

აი, თბილისი... თბილისი!.. რამოდენა ყოფილა, რა ლამაზი ყოფილა თბილისი!.. და უეცრად, დიდად მშობლიური განწყობილება დაეუფლა ბორიას. სწორედ ისეთი — ონკიქედში ან ფოთში ჩასვლისას რომ ეწვეოდა ხოლმე. ისეთი გრძნობა ჰქონდა, თითქოს ენახოს ოდესმე ეს ქალაქი, ყოფილათ ამ ქალაქში. თითქოს აქ დაბადებულიყოს, აქ აედგას ფეხი, აქვე გაზრდილიყოს.

...მატარებელმა ჯერ ჰენება შეაჩერა, მერე სვლას უკლო, ბორბლების მწყობრი, ნელი ნაღურით ჩაუარა ბაქანს და მაღალი, შუშაბანდიანი შენობიდან წარწერამ გაიღიმა: „თბილისი“.

ჯრუანტელმა დაუარა, გული ამოუჯდა, ყელში უცხო ყვირილი ჩაუდგა ბორიას. სწორედ ისე — აი, ონკიქედში ან ფოთში ჩასვლისას რომ ემართებოდა ხოლმე.

მატარებელი გაჩერდა, მაგრამ ბორია ერთ ხანს კიდევ იდგა ღია ფანჯარასთან და თვალმოუშორებლად მისჩერებოდა ბაქანზე აფუსფუსებულ ზღვა ხალხს.

გამარჯობა, ჩემო თბილის-ქალაქო!

მეორე დღეს — თამაშის დღე შეარჩიეს, მატჩის დასაწყისი დათქვეს, მსაჯი დანიშნეს, ასპარეზი აირჩიეს, თბილისისა და ფოთის ნაკრები გუნდების გადამწყვეტი ორთაბრძოლა „დინამოს“ ძველ სტადიონზე გადაწყვიტეს. მესამე დღეს — ქალაქში აფიშები გააკრეს, გაზეთები აახმაურეს, რადიო აალაპარაკეს, ხალხს ფეხბურთის საღერღელი აუშალეს და ბილეთების საფიქრალი გაუჩინეს. მეოთხე დღეს — მატჩის პროგრამები გამოუშვეს, თანამოქალაქეებს მოასპარეზენი გააცნეს და გულელები გაუმაგრეს: დამშვიდდით, ნუ გეშინიათ, ჩვენს გუნდში ლევან აბაშიძე, მიშა ასლამაზოვი, კოლია სომოვი, კოლია ანიკინი, ვანია სომოვი ითამაშებენ და შავი დღე ელითო ფოთელებს. მეხუთე დღეს — მთაწმინდა და სოლოლაკი, ავლაბარი და ორთაქალა, ვერა და ვაკე, ნაძალადევი და საბურთალო, ღრმადელე და ავჭალა, „კიროჩნი“ და ჩუღურეთი, ბილეთაახი და უბილეთო, ყველა რიგიანი და გზააბნეული — ერთად აიყარა, პლენხანოვზე ჩამოლაგდა, „დინამოს“ მიაწყდა, შესასვლელი კარი ჩამოიღო და „ნაურა“ შევიდა სტადიონზე.

...პირველი ტაიმის ნახევარი საათი, „ოქროს თადარიგის“ სკამზე გაატარა ბორიამ... მაგრამ, როცა თბილისელებმა „შეჭამეს“ და ლამის „გამოხრეს“ ფოთელები, როცა ვანია სომოვმა „ამოკეტა“ შალია მიქელაძე და სტუმრების სახელიან ცენტრფორვარდს ბურთი არ აღირსა — მიტრო ასათიანს მოთმინება დაეღია, შალია მიქელაძე დაითხოვა და ბორია პაიჭაძე მოიხმომინდორზე... ფოთელებს მაინც არ ეშველათ. ვანია სომოვი არც ბორიას ჩამოუვარდა, ლანდივით აედევნა, ტკიპივით

აეკრა და ყველგან გზა უყელა. გამწარდა ბორია, ხან ჭიქურ მიეჭრა, ხან აქედან მოუარა, ხან იქიდან მოუარა, რა არ იღონა, რა არ იიღეთა და... ვერაფერი. ნაცად მეურვეს ალლო ვერ აულო, თავი ვერ გაართვა... პირველ ტაიმში ორი „მშრალი“ ბურთი მიიღეს და გამაყრუებელ ღრიანცელში თავჩაღუნულეებმა დატოვეს მოედანი.

პანაშვიდური განწყობილება იყო გასახდელში. ნამდვილი გლოვა იდგა. ჭირისუფლებივით ისხდნენ დაღლილი ბიჭები და უნუგეშოდ შესცქეროდნენ ერთმანეთს. შალაა მიქელაძე განზე გამდგარიყო შერისხულივით. ბუჭულია ქვარცხავა თავში იშენდა. მიტრო ასათიანი ერთ ადგილას ვერ ისვენებდა, ბოლთას აეტანა. ბორია თვალს ვერ უსწორებდა, მზერას არადებდა ამხანაგებს. ისეთი სახით იჯდა, თითქოს გუნდის მარცხი მხოლოდ მისი ბრალი ყოფილიყოს. მაგრამ, განა მართო დამარცხება აგაიებდა? სხვაც აღონებდა ბორიას. კარგად იცოდა — ძმები არიან მოგება და წაგება, ხან ერთი გაგისხენებს, ხან მეორე მოგაკითხავს. არა, წაგებას ვინა ჩივის, თანაც ასეთ ძლიერ მეტოქესთან. არა, საქმე ის არის, — ერთი ვერ დაარტყა, ერთი ვერ გაატაცა, უხეიროდ იბორიალა, უთავბოლოდ ითამაშა და საქვეყნოდ შერცხვა. კმარა, სირცხვილად ესეც ეყოფა! მორჩა. გათავდა, ფეხს აღარ გასდგამს მოედანზე!... შემთხვევა რომ იხელთა, შესჩივლა გუნდის თავს: ძია მიტრო, გამომცვალე, ვანია სომოვის სულ ერთია ვერსად გავექვევიო!.. „ძია მიტრომ“ დაამშვიდა, დაარაგა, თამაში გაუჩიო, ვანია სომოვის სუსტი მხარეების „რალაც — რალაცეები“ უთხრა, და აბა შენ იციო!

ბორიას გულზე მოეშვა, სითამამე მოერა, და მოედანზე რომ გადიოდნენ, სჯეროდა — ვანია სომოვის თავის დღეში არ

გაცივებდა. აგრეც მოხდა — ბორიამ მეორე ტაიმში თავი მოიქაჩლა, ვანაა სომოვს სიციოცხლე გაუმწარა და როცა მსაჯი წამზომს დასცქეროდა, ანგარიში „დაასველა“. ისეთი ბურთი გაიტანა, ტრიბუნები გოლის უნახავებივით აბლავლა.

1:2 — მართალია, დამარცხდნენ ფოთელები, იმათ ფალავნობაში ეჭვი არავის შეჰპარვია.

კვიცი გვარზე ხტინო

ფეხბურთს გადაყოლილ ხალხს მუდამ ალმაცერად უცქეროდა სოლომონ ჰაიჭაძე და ქუდი რომ შეეგდოთ, არ შევიდოდა სტადიონზე. დიდი ფეხბურთის დღეებში, როცა ქვეყანა სტადიონის გზას დაადგებოდა, ქალაქი დაცარიელდებოდა, ქუჩებში ძე-ხორციელის ჭაჭანება არ იყო, ბუზის გაფრენას გაიგონებდა კაცი, — სოლომონი იმ თავის განიერ მხრებს ერთად შეჰყრიდა და იტყოდა ხოლმე გაკვირვებას ატანილი: მე და ჩემმა ღმერთმა, ამ ხალხისა ვერაფერი გამიგია, ნეტავი მაცოდინა, რა ნახეს იმ დასაქცევ სტადიონზეო!... ჯეელ ბიჭობაში შენც ხომ ბურთს დასდევდიო? — ეტყოდნენ. აბა, ეგ რა მოსატანია, მაშინ სხვა დრო იყო, — იგერიებდა სოლომონი. თავისა ვაჟის ბურთაობისა, თბილისში იმისი მისვლა-მოსვლისა, ბევრი არაფერი იცოდა სოლომონმა, თორემ არ დაუდევდა ასაკ-წლოვანებას და ერთს ძველებურად შეახურებდა ბორიას.

ერთხელ, ჩხირი კედელსაო, და მაინც ესტუმრა სტადიონს სოლომონი. ამხანაგთან ერთად, სამუშაოდან შინ ბრუნდებოდა. სტადიონს რომ გაუსწორდა, ისეთი გრგვინვა მოისმა, თითქოს ცა და დედამიწა ერთმანეთს დაეჯახა და ქვეყნის აღსასრული

დადგაო. სოლომონი არ იყო მხდალი და ჯაბანი, ვერც ვინ დასწამებდა შიშინობას, მაგრამ, ახლა, გული შეუქანდა, ავი ეზმანა. ხასიათი აეშალა, იმ დასაქცევში შესვლა მოუნდა და მშვიდობა უსურვა ამხანაგს: შევალ, ერთი მეც ვნახავ, რა ხდებო...

შევიდა და მთელი ფოთი იქ დახვდა, შევიდა და თვალს არ დაუჯერა. ისეთი წივილ-კივილი იდგა, აღარ იყო ყურთასმენა. აღამიანები ერთმანეთზე ისხდნენ, ერთმანეთზე იდგნენ, ერთმანეთს ეკვროდნენ, ავზნიანებივით ცახცახებდნენ, ხმაწასულები ერთი და იმავე სიტყვებს გაჰკაოდნენ: „მიდი!... დაარტყი!... მიდი!... დაარტყი!... მიდი!... დაარტყი!...“ „ეს რა ცოდვის განკითხვის დღე დაგვდგომიაო“, — გააფიქრა სოლომონმა და შეეცოდა საწყალი ხალხი...

უცებ, „ბორიაო!.. ბორიაო!.. — ამოდენა ხალხმა და ტრიბუნებზე ისეთი ამბავი ატყდა, სოლომონი თავის დღეში არ დაივიწყებს. აღამიანები ეხვევოდნენ, კოცნიდნენ, ლამის ახრჩობდნენ ერთმანეთს, ხტუნავდნენ, ცეკვავდნენ, იცინოდნენ, ტაროდნენ, ბავშვებივით ღრიალებდნენ და თითქოს დარიგებულები არიანო, ყველანი — „პაიჭაძე... პაიჭაძე...“ გაჰკაოდნენ გაბმით.

ჯერ დაიბნა სოლომონი, ვერას მახვდა, მერე აზრზე მოვიდა, მინდორს გახედა, ერთ ხანს უთვალთვალა და.. თავისი ბიჭი დაინახა... გულმა გასცრა სოლომონს. „მე, სწავლობდი მეგონა, კაცი გახდებოდი მეგონა, შენ კი... უუ... შე მამა...“ ჯავრით აივსო, ბოლმით აივსო, წყენით აივსო სოლომონი და... „... შე... მამა... მამა... მამა.. გენაცვალოს, შვილო!.. ხალხო... ეს რა ხდება მინდორზე... ჰოა, დიდება შენდა ღმერთო!..“

...ბორიამ მეოთხესაც აუარა გვერდი, მეხუთეც მოატყუა, მეკარეც წაანდინა და არის! არის!.. იგრილა ხალხმა, გადაცვივდა მინდორზე, პაიჭაძეს ფეხათ გავლა არ აკადრა და ხელში აყვანილი გამოიყვანა მინდვრიდან...

ჯავრი, ბოლმა, წყენა — სიხარულით, ბედნიერებით, სიამაყით შეეცვალა სოლომონ პაიჭაძეს. გზადაგზა მეგობრები, ამხანაგები, ნაცნობები და უცნობებიც აჩერებდნენ. კოცნიდნენ და ულოცავდნენ, აჩერებდნენ და აჩერებდნენ. აღარ ეყურებოდა ვინ კოცნიდა, ვინ ულოცავდა, ძლივს მიაღწია სახლამდე.

იმ საღამოს სოლომონმა დიდხანს ვერ მოისვენა: ოთახიდან ოთახში დადიოდა, ბოლთაობდა და „უყრე შენ, უყურე შენო“ გაიძახოდა. გაკვირვებული შესცქეროდა ოჯახობა — ნეტავ, ამ კაცს რა დაემართათ! სოლომონს კი ფიქრი არ ეხსენებოდა: „ტყუილად არ უთქვამს ხალხს, კვიცა გვარზე ხტისო... სისწრაფეში სულ მე დამმსგავსებია ეგ მამა... მამა ენაცვალოს მაგას...“

— შე კაცო, აღარ იტყვი, რა მოხდა?!

— ქალო, ოლდა, სად ისწავლა ამ ბაღანამ ამფერი თამაში, თუ იცი შენ?!

ცხოვრების საბჭური

1933 წლის 28 ივლისს, ბორიამ უკანასკნელი გამოცდა დაიჭირა, ხოლო ერთი კვირის შემდეგ დიპლომის ხავერდოვანი ყდა გადაშალა და დაუფარავი სიამაყით წააკითხა: „ბორის სოლომონის-ძე პაიჭაძე — საბჭოთა საეკპრო ფლოტის მექანიკოსი“.

სოლომონმა თითო ცრემლი გადმოაგდო და ვაჟს შუბლში

აკოცა. ოლღამ სიხარულის ტირილით იტირა და შვილი გულში ჩაიკრა.

აგვისტოს პირველ რიცხვებში ტექნიკუმში დაიბარეს, პედსაბჭოს სხდომას დაასწრეს და შავი ზღვის სავაჭრო ფლოტის ტუაპსეს ბაზაში გაანაწილეს.

სექტემბრის ერთ ნაღვლიან საღამოს, ზღვა რომ ჭავრობდა, ქვენა ქარი უსტვენდა და სისხლიანი ღრუბლები დადიოდნენ ცაზე—დაემშვიდობა დედ-მამას. ოლღამ ჭალარა თავი შვილს მკერდზე მიაყრდნო და ცრემლად დაიღვარა. სოლომონსაც, ბარე, ყელში ებჯინებოდა გული, მარა ვაჟკაცი იყო და რას იზამდა, რაის პაიჭაძე იქნებოდა, თუკი ცრემლს არ დამალავდა თავს არ დაიჭერდა, ცოლს არ დაუტატანებდა:

— რა გატირებს, ქალო, რას ნავსავ, აი ბიჭს, გადამთიეთში ვგზავნით თუ?! ტუაპსე აქანეა, ა, ორ ნაბიჯზე!

დაემშვიდობა ძმაკაცებს: აბა, თქვენ იცით, არ დამივიწყოთო, ბიჭებო!

— ვინც შენ დაგივიწყოს, დანამ გუუბოს გული, — ძლავს ამოდერლა კაკოიამ, წახდა ყაზახი და ცრემლი მოერია.

— გეტოვებ, ბუკო?! — გაფუჭდა გრიშაიაც.

— ფეხბურთს რას უშობი, ფეხბურთს?! — ამოიკენესა ვალოდიამ, გულიც თან ამოაყოლა და გატყეპილი ბავშვივით აზლუქუნდა.

— ნუ გახდები ახლა თლა „მარიაკი“, — ვითომ ახუმრა გვაჩაიამ, მაგრამ ცრემლით აევსო თვალები.

...ღამე წვებოდა ზღვაზე, როცა „ფლორამ“ დაიღმუვლა და ფოთი ნაპირზე დარჩა.

„მ ვ რ ი კ ი ა“

ტუაპსეში ჩასვლისთანავე შეათვალეირეს, ახედ-დახედეს, ფხა გაუსინჯეს, საქმე მოუწონეს, ნახელავი შეუქქეს და გემ „ტენდრას“ მობრტორისტად დანიშნეს. ბორიამ მუშაობა საათივით ააწყო და უფროს-უმცროსი თავის სასიკეთოდ განაწყო.

ახალი 1934 წელი, ახლებურად გაუთენდა ბორიას: კარგი თვალით შეხედეს, შრომა დაუფასეს, დააწინაურეს და გემ „მეტალისტზე“ მთავარ მობრტორისტად გადაიყვანეს. „მეტალისტის“ კოლექტივს მშობლიური ოჯახივით შეეთვისა ბორია. ბორიაც შეითვისეს და შეიყვარეს. პაიჭაძის გარეშე ვერ წარმოედგინა „მეტალისტი“, გემის კაპიტანს ვლადისლავ ლუკიანოვს.

ერთხელ, ვლადისლავ ლუკიანოვმა ბიჭები გემბანზე შეყარა, საგანგებო მზადება ბრძანა და დიდის ამბით გამოაცხადა: ზეგ ტუაპსედან გეალო, საქართველოს ნავსადგურებს ჩავუვლით, შემდეგ დასავლეთისაკენ ავიღებთ გეზს, სამშობლოს წყლებს დავტოვებთ და ინგლისისაკენ გავწევთო.

„მეტალისტი“ ზეიმით შეხვდა ამ ამბავს. სიხარულით თავი აღარ ახსოვდა ბორიას. ცხადდებოდა დიდი ხნის ოცნება, ხორციელდებოდა სანუკვარი მიზანი — იწყებოდა „დიდი მოგზაურობა“...

იმავე ღამეს ფოთს უღებეშა და საყვარელი მშობლები თავისი ბედნიერების ზიარა გახადა.

* * *

დრომ თავისი გაიტანა: 1934 წლის გაზაფხულზე, ფოთის ნაკრებში თაობის ცვლა „დამრგვალდა“, უკანასკნელი

„მოკიკანებიც“ წავიდ-წამოვიდნენ და საბურთაო სარბიელი მთლიანად ახალგაზრდებს დარჩათ. მიტრო ასათიანი აკაკი ელენტმა შეცვალა და გუნდი ითავა, დანარჩენი „ბებრების“ ნაცვლად კი — კაკო ყალიჩავა, ვანიჩკა კინწურეიშვილი, მიხო გვალია, დათიკო ხორავა, კოსტა გუნია, კაკო იმნაძე, ვალოდია ბერძენიშვილი, გრიშა გაგუა, გვაჩი ჯორბენაძე — ჩარიცხეს ნაკრებში. ბორიალა აკლდათ პაიჭაძე, თორემ გუნდი კი არა, ნამდვილი „თაიგული“ იქნებოდა. მაგრამ, საღლა ჰყავდათ ბორია პაიჭაძე. ვინ იცის, საღ იყო ახლა.



ახალგაზრდობამ იმედები გაამართლა, ყველა მოლოდინს გადააჭარბა, — გოლს გოლი მოჰყვა, გამარჯვება გამარჯვებამ შეცვალა, ქულა ქულას ემატა, და მხოლოდ თბილისელებთან ძლეული ფოთელები, ბათუმელებთან ერთად ცხრილს სათავეში მოექცნენ. პირველი ადგილი — თბილისელების ხვედრი გამოდგა. მეორე ადგილი — გაუთამაშებელი დარჩა. მისი ბედი — ფოთისა და ბათუმის ფეხბურთელთა შეხვედრას უნდა გადაეწ ყვიტა. შეღავათიანად ჰქონდათ საქმე ბათუმელებს. მათ ფრეც აწყობდათ; ფოთელებს — მხოლოდ გამარჯვება. ხოლო გამარჯვებისათვის საჭირო იყო — „გაურღვეველი“ ჰაბიჭია გალდავას „გარღვევა“ და „აუღებელი“ ჭიჭიკო პერტაიას „აღება“. ხოლო ამისათვის საჭირო იყო — პაიჭაძე. „გაურღვეველი“ და „აუღებელი“ ბიჭების მულამი, იმან იცოდა.

გადამწყვეტი ორთაბრძოლა კარზე იდგა. ვიდრე გვიან არ იყო — უნდა რამე ეფიქრათ, ესლაფორთათ, უღონებელი ეღონათ და დროებით, იმ ერთი თამაშისათვის მაინც ჩამოეყვანათ პაიჭაძე. ხმელეთზე უნდა დაბრუნდეს პაიჭაძე, უნდა ითამაშოს პაიჭაძემ, — გულსრულად გადაწყვიტა მთელმა კოლეტივმა. მაგრამ, რა გზით? — დასხდნენ და ითათბირეს. ზოგმა რა თქვა, ზოგმა რა. ასეო და ისეო. იყო ერთი ტვინის ჭყლეტვა, სიტყვების ნაყვა, „შანციანობა“ კი არც ნამცეცი. იქაქანეს, იქაქანეს, მერე ეპო — ხელი ჩაიქნიეს და გულდაწყვეტილები დაიშალნენ.

* * *

ერთხელ, გადამწყვეტი ორთაბრძოლისათვის მზადების იმ გაწამაწია დღეებში, — გვაჩი ჯორბენაძემ დისციპლინა დავიწყა, დაჭურვა გააცდინა და მხოლოდ ვარჯიშის ბოლოს იკადრა მობრძანება. თუმცა, იმას რა მობრძანება ეთქმოდა: მოვარდა დაფეთებული და გულამოვარდნილი, ძლივს აბრუნებდა ენას, მიტკლის ფერი ედო სახეზე...

— სად მამაჩემთან იყავიო, — შეუტიეს. — დამაცადეთ, მათქმევინეთ, რა დროს ეგ არიო, — და გვაჩი ჯორბენაძემ ხელების ქნევით, საიდუმლო ხმით გაანდოთ... საშინელი ამბავი... არა გჯერათო?! — და გვაჩიმ მკერდზე დაიბაგუნა ხელები, — დღეს დილით, აქეთკენ რომ მოდიოდა, ბაზრის გზაზე ბორიას დედას შეხვდა, აქეთურ-იქითური გამოჰკითხა; ყველაფერი შეიტყო, ის დებეშაც საკუთარი თვალით წაიკითხა... თავზარი დაეცათ ბიჭებს: ინგლისისაკენ მიდიოდა „მეტალისტი“ და

თან მიჰყავდა პაიჭაძე... თავში ხელი შემოიკრეს — რა გვეშვე-
ლებო!...

გვაჩი ჯორბენაძე ერთ ხანს ჩუმად იჯდა, ფიქრიანი თვა-
ლებით უცქეროდა იმედდაკარგულ ამხანაგებს. მერე უცებ
სხვანაირად აუთამაშდა წარბები, აქეთ-იქით გაექცა თვალები,
შიგ პატარა ეშმაკები ჩაუჯდა, ოდნავ ირიბმა ღიმილმა შეუ-
ტეხა ტუჩები, მარცხენა შუბლზე მიიღო, მარჯვენა მალა ას-
წია, საჩვენებელი თითი შემართა და ევრიკიაო! — შესძახა
„შანციანმა“ ბიჭმა...

ბიჭები წელში გასწორდნენ, გვაჩის ნიაშტერდნენ, იმედის
შუქმა გადაჰკრათ სახეზე და „ევრიკიას“ მოლოდინში, ლამის
სული გაეპარათ. გვაჩი ჯორბენაძემ თავი დაიფასა, სახე მსა-
ხიობივით დაძაბა, თვალები მინაბა, ჯადოქარივით ალაპყრო,
გულზელი დაიკრიფა, სასწაულმოქმედს დაემსგავსა და დინ-
ჯად დაიწყო თავისი „ევრიკია“.

დ ე კ ე შ ა

უკანასკნელი „გკოცნი“, უკანასკნელი „მალე ნახვამდის“,
უკანასკნელი მშვიდობის სიტყვა, უკანასკნელი შეძახილები
და გამომშვიდობება დამთავრდა. მაგრამ ბაქანზე კიდევ დიდ-
ხანს არ იშლება ახმაურებული ხალხი. კიდევ დიდხანს ირხე-
ვიან ხელები და ფრიალებენ ხელსახოცები. აღელვებული
გამცილებლები თვალს არ სწყვეტენ ვეებერთელა ხომალდს,
რომელიც თანდათან შორდება ნაპირს... „მეტალისტმა“ ერთ

ხანს წასაქცევად იტორტმანა, მერე იმძლავრა, მიყარ-მოყარა ტალღები, თავი მისცა უკიდევანო სივრცეს, და თითქოს ზღვაში დაიძირა ტუაპსე... ლაღად ჩამოუარა საქართველოს და აქა-იქ სული მოითქვა — სოხუმი, ფოთი, და აი, ბათუმიც... უკანასკნელი საბჭოთა ნავსადგური შორეული ნაოსნობის გრძელ და ძნელ გზაზე... აქ „მეტალისტი“ ღამეს გაათენებს, დაისვენებს, ძალას მოიკრებს, დილით ისევ „აშლის აფრებს“ და ჯან-ღონით სავსე, ზღვათა უხილავ შარაგზებს გაკვალავს დასავლეთისაკენ.

გამგზავრების ძნელ მოლოდინში, ზღაზენით დაილია შემოდგომის სავსე ღამე. გათენდა სანეტარო დილა, დამთავრდა უკანასკნელი სამზადისი, გაისმა გემის კაპიტნის სანუქვარი ბრძანება:

— აუშვით ღუზა! სრული, წინ!

„მეტალასტმა“ ხელ-ფეხი გაიხსნა, თავისუფლად ამოისუნთქა და ამომავალი მზის სხივებზე მბზინავი ხომალდი ნება-ნება მიეშვა შუა ზღვისაკენ.

ბორია სამანქანო განყოფილების სამზირიდან გასცქეროდა დილის ბურუსში გახვეულ აჭარის ქედებს, რომლებიც წელა ეშვებოდნენ ლურჯ სტიქიონში.

ნახვამდის, სამშობლო ქვეყანავ!

• • •

სხვა დროს, ალბათ, გავიდოდა გემბანზე, თვალს წყალს დააღვეინებდა, საყვარელი სურათით — ზღვის უსაზღვროებით დატკებოდა. ახლა, კი, საამისოდ სად ეცალა. ხუმრობა

საქმე ხომ არ იყო, ამოდენა ქარახინას მოვლა-პატრონობა. რაც გამგზავრების თადარიგი დაიჭირეს და გემი დაიძრა, სამანქანო განყოფილებიდან თავს ვერა ჰყოფდა. დილაბნელიდან მოყოლებული ერთთავად იმ ჰკვიან მანქანებს დასტრიალებდა, არ შორდებოდა გოლიათ ქვაბებს და პირდაღებულ ღუმელებს. ზვალს არ აცილებდა თავის ხელქვეით მეზღვაურებს. ხელმძღვანელობდა, მეთვალყურეობდა ყოველ მათ მოქმედებას, ამოწმებდა ყოველ მათ ნასაქმარს...

საქმით გართულმა ბორიამ,—რიგით მექანიკოს იგორ გორამიკინის ვერც მოახლოება მოლანდა, ვერც მისი დაყინებულა მზერა. მთავარი მოტორისტი მხოლოდ მაშინ გამოერკვა, როცა მკლავზე უცხო ხელის შეხება იგრძნო.

— რა მოხდა, იგორ, კაპიტანი ხომ არ მიხმობს?! — ისე შესძახა ბორიამ, თითქოს მანქანების გაბმული გუგუნის ჩახშობა უნდაო.

გორამიკინმა არაფერი უპასუხა და ხელით ანიშნა, გარეთ გამოჰყოლოდა... გემბანზე გავიდნენ. ბორიამ მხოლოდ ახლა შენიშნა, — უჩვეულო მღელვარებას შეეპყრო მუდამ მშვიდი რუსი ვაჟკაცი.

— რა მოხდა? — გაუმეორა ბორიამ და მექანიკოსის არეულ მზერას ჭიქურ გაუსწორა თვალი.

გორამიკინმა თავი დახარა და დაბნევით დამარცვლა:

— იქ... დეპეშა... თქვენს სახელზე... კაიუტაში...

ავი უთხრა გულმა ბორიას. უზომოდ გრძელი ეჩვენა კაიუტამდე გასასვლელი დერეფანი. იმ რამდენიმე წამში ათასი იფიქრა და ერთი სიცოცხლე გაათავა.

„...მამაშენი უკანასკნელ დღეშია. დედაშენი ოლდა“.

მკლავებმა იწყეს კანკალი, მუხლებს შეუდგათ ძაბუნი, ნისლი ჩამოწვა თვალებში, იწივლეს გაბმით ყურებმა, აქანაგდა ოთახი, ჭალი ჩაქრა, დაბნელდა და ავის მოქმელი პატარა ქალღმერთი დაეცა იატაკზე.

* * *

„მეტალისტი“ გულწრფელად ეზიარა ბორიას მწუხარებას... დუმლით გააცილეს გულდაწყვეტილმა მეზღვაურებმა... გულისტივილით გამოეთხოვა თავის ყოჩაღ მოტორისტს გემის კაპიტანი... ბარე, ძან არ უნდოდა, ეძნელებოდა მისი გაშვება, მაგრამ რას იზამდა... ვლადისლავ ლუკიანოვი ვაჟაკი კაცი იყო და კარგად იცოდა: ადამიანს ასეთ დღეში ხელის მომართვა წამალივით სჭირდებოდა... დაკოცნა, ერთი-ორი თბალი სიტყვაც უთხრა, მერე ჩასვა სათადარიგო ნავში და ნაპირისაკენ გაისტუმრა მგლოვიარე ჭაბუკი...

* * *

როცა ბათუმიდან წამოსულმა მატარებელმა ფოთს მიაკივლა, უკვე კარგა დაბინდებული იყო...

მშობლიურ უბანს რომ შეჰყვია, — მამა დაუდგა თვალწინ, მწუხარება გაუათქვცდა, დარდმა შეჭამა... გული ამოუჯდა, ცრემლი მოერიო, თავშეუჟავებლად აქვითინდა... ფეხათრევიტ გაჰყვია სახლისაკენ მიმავალ ქუჩას... ო, როგორ ემძიმა ყოველი ნაბიჯი! აქ ხომ თვითეული კუთხე, თვითეული ადგილი, თვითეული სახლი მამას აგონებდა, უცოცხლებდა მის საყვარელ, დაუვიწყარ სახეს... აი, იმ პატარა ბაღში უყვარდა მამას ჯდომა და ნაცნობებთან მასლაათი... აი, იმ სასადილოში შეიყ-

ვანა ერთხელ მამამ, ტოლივით გვერდზე მოისვა, უკვე დიდა
ზარო, — უთხრა და ღვინო დააღვეინა... აი, იმ კუთხეში ნა-
ბურთაღს შეასწრო ერთხელ მამამ და ისეთი მკვახე ალიყური
აჭამა, ქვეყანამ იმათ მოხედა...

სული შეეხუთა, თავბრუ დაესხა და ახლა უკვე, ბარბაცით
განაგრძო გზა. გამვლელ-გამომვლელნი ჩერდებოდნენ და თა-
ნაგრძნობით აყოლებდნენ თვალს უბედურებაშეყრილ ქა-
ბუქს...

აი, ისიც, გამოჩნდა, მშობლიური სახლი... გულისძგერით
მიუახლოვდა ქათქათათარღებიან ფანჯრებს და ხელფეხშე-
ბორკილივით შედგა... აი, ახლა, საცაა გაიგონებს ჭირისუფ-
ლების სესოწარკვეთილ წივილ-კივილს, დედის შემზარავ
მოთქმას, დაიკოს უნუგეშო ტირილს... მაგრამ, ეს რას ნიშ-
ნავს?.. გარშემო კაციშვილი არა ჩანს... სახლის კარი, იმის მა-
გივრად რომ ფარღალა ეგდოს, საგულდაგულოდ არის და-
კეტილი და... შიგნიდანაც არ ისმის ჩამიჩუმი... რა მოხდა?..
იქნებ სოფელში გადაასვენეს მამა... თუმცა არა, დეპეშა ხომ
აქედან, ფოთიდან იყო გამოგზავნილი... ეს გაჩახახებული
ფანჯრები რაღას ნიშნავს... ჩუ... ეს რა ემართება, ნუთუ გონი
აერია და ჭკუაზე შეცდა... ჩუ... აი, კიდევ... ჯერ დედის სიცი-
ლი მოესმა, მერე მამაკაცის გაბნული ხველება... მხოლოდ მა-
მამ იცოდა ასეთი ხველება, მხოლოდ მამამ იცოდა, მხოლოდ
მამამ... ასე მხოლოდ მამა ახველებს... მხოლოდ მამა... არა,
ნამდვილად ჭკუაზე შეცდა...

გაუბედავად დააკაუნა კარზე. ერთ ხანს არავინ უპასუხა.
მერე მოესმა ფეხისხმა... ფეხისხმა!.. მამის ფეხისხმა!.. ფეხის-
ხმა უფრო ახლო განმეორდა, მამის ფეხისხმა, და... კართან

შეწყდა... მამის ფეხისხმვა... ვაიმე, მამავ!.. ჩემო მამავ!.. ლამის ფეხებში ჩავარდეს გული...

კარი ჭრილით გაიღო, და ბორია უღონოდ ჩაიკეცა ზღურბლზე.

— ქალო, ოლდა, ჩქარა, ბიჭი! — დაბნევით შესძახა სოლომონმა, უმალ დაიხარა და ბაღლივით ხელში აიყვანა ამოდენა ვაჟკაცი.

— შვილო, შვილო, ვაა შენს დედას, შვილო! — ლამის მყუდროება დედის გაბმულმა კივილმა დაარღვია...

* * *

— შემოგვხედე, ბიჭო, გონს მოდი, გენაცვალე, ჩვენა ვართ. შვილო, დედაშენი, მამაშენი...

მამაშენი?! — და მაშინ კი, დააჟყიტა თვალები ბორიამ, გიჟივით მიაშტერდა სოლომონს.

რაკი ერთი მობრუნდა, აღარაფერი უჭირდა, ბიჭს თანდათან დაეტყო სააქეთო პირი...

ერთ ხანს ჩუმად ისხდნენ. მერე სული რომ მოითქვეს, სიტყვა ჩამოაგდეს, გაიკვირვეს და გაიოცეს. უი, თავი კი მომიკვდესო, რას ამბობ, შვილო, რომელი დეპეშაო? — შეიცხადა ოლდამ. სიკვდილს ჩემთან რა ხელი აქ, რაც შენ გზაზე დაგაყენე და კაცად გიგულე, ახლა რაღა მომკლავს, რაის სიკვდილი, ბიჭო, კაცი ორი დღე პურ-მარილში ვზივარო! — ჩაიგუგუნა სოლომონმა. ილაპარაკეს, ძილი დაიფრთხეს, სიტყვა დილამდე გააბეს, მაგრამ ამ „საქმეში“ ვისი ხელი ერია, ვერაფერი გაიგეს. ვერც გაიგებდნენ, მეორე დღეს, უთენია, ბიჭებს რომ არ მოეკითხათ ბორია. მოვიდნენ და საქ-

მეც „გასქდა“. მთელი გუნდი ოთახში შემოლაგდა, გვაჩი
ჯორბენაძის გარდა. ათი თავი ხომ არ ება, აქ მოსულიყო!

ეს „შანცი“ თქვენი მოგონილბ ყოფილა, ფუი, ამისთა-
ნა ამხანაგობასაო! — იფეთქა ბორიამ... ესე, ესეა ჩვენი საქმე,
სხვა ვერაფერი მოვიფიქრეთო, — სცადეს თავის მართლება...
ბიჭოს, მე რას მემართლებოდით, სასიკვდილოდ როგორ გა-
მიმეტეთო! — დაუბრიალათ თვალეზი სოლომონმა... ღმერთო,
ეს რა ახალგაზრდობა გვეზრდებოა, — გაშალა ხელეზი ოლ-
ღამ... არ დაიჯერებთ? გვაჩის „გაიმასქნებული“ იქნებოა! —
ექვი აილო ბორიამ... აბა, გვაჩი რა შუაშია, ყველამ ერთად
„გავაიმასქნეთო“, — ხელი დაათარეს „ვერიკიას“ მომგონს...
თქვენ რა თავმდებათ უღგებით, თვითონ სადა ბრძანდე-
ბოა?! — არ ცხრებოდა ბორია... შეუძლოდ არიო, — მიინც არ
„გაყიდეს“ გვაჩი. რა ჭირი შეუდგაო?! — კიდეც დიდხანს
იღუდღუნა ბორიამ, მერე მოლბა თანდათან, ბიჭებს შუბლი
გაუხსნა, გაუღიმა, გაუცინა, იმათაც გაუღიმეს, გაუცინეს,
შერიგდნენ და საქმისა თქვეს...

თამაში როდის არი დანიშნულიო, — იკითხა ბორიამ..
ბიჭებს სახე გაუბრწყინდათ: შე კაი კაცო, თავიდანვე ეგ
გეთქვაო!

ზღვა თუ მწვანე მოედანი?

ბორია დაემორჩილა კოლექტივის სურვილს, რაც უპირვე-
ლესი და დაურღვეველი კანონი იყო მისთვის შემდგომშიაც.

...ფოთისა და ბათუმის ფეხბურთელთა გადამწყვეტი ასპა-
რეზობა გაიმართა თბილისში, ლენინის სახელობის სტადიონ-
ზე და დედაქალაქის ათასობით გულშემატკივარი ახალი

„ვარსკვლავების“ აღმოჩენის მოწამე გახდა. ბრწყინვალედი თამაშის ფოთლებმა: მეკარე დათიკო ხორავამ, ნახევარმცველებმა გრიშა გაგუამ და გვაჩი ჯორბენაძემ, შუამარბებმა კაკო ყალიჩავამ და ვალოდია ბერძენიშვილმა, ცენტრფორვარდმა — თბილისელთათვის უკვე ნაცნობმა ბორია პაიჭაძემ. მიუხედავად ამისა, როგორც ეს ხშირად ფეხბურთში ხდება — ბათუმელებმა შეაგდეს ერთი „ჩინიკი“ ბურთი და ტაიმიც თავის სასარგებლოდ დაასრულეს...

მეორე ტაიმში ფოთელთა ცენტრმა პაიჭაძემ მოედანზე „ცირკი“ გამართა, „გაურღვეველი“ ჰაბიჭია გალდავა ახალფუნადგმული ბავშვივით მიწაზე აფორთხა, „აუღებელი“ ჭიჭიკო პერტია ჯამბაზივით უთავბოლოდ ახტუნავა, ორი „ცხრიანი“ გაიტანა და ბრძოლის ველზე სამართალი დაამყარა...

დაინგრა სტადიონი... ფეხზე მდგარი ხალხი ნახევარი საათის მანძილზე ძახილით მოითხოვდა პაიჭაძის თბილისში გადმოყვანას...

მეორე დღეს, თბილისის ერთ-ერთი გაზეთი წერდა: „ფოთის გუნდმა დამსახურებულად გაიმარჯვა. ეს არც არის გასაკვირი, რადგან მის რიგებში არიან ძლიერი ფეხბურთელები: დ. ხორავა, კ. ყალიჩავა, გ. გაგუა, ვ. ჯორბენაძე, ვ. ბერძენიშვილი და სხვები. გამარჯვებულთა შორის განსაკუთრებით გამოირჩევა სწრაფი, ტექნიკური ცენტრალური თავდამსხმელი ბორის პაიჭაძე, რომელიც ჯერ მხოლოდ 19 წლისაა. იგი ჩვენი ქალაქის საუკეთესო გუნდებსაც კი დაამშვენებდა“.

* * *

თბილისში გამართულმა უკანასკნელმა თამაშმა, ცხოვრების ძნელად გასაკვლევ გზასაყართან მიიყვანა ბორია.

ძნელია, მაგრამ რას იზამ, უნდა აირჩიო — ან აქეთ, ან იქით, ორივე გზას ერთად ვერ გაჰყვება, „ორ ხატზე ერთად ლოცულობდე“, არ მოხერხდება. ერთ-ერთი უნდა გასწირო, დასთმო; მისცე დავიწყებას. არადა, ცალი ფეხი აქეთ გედგას, ცალი იქით,—ვის გაუგია, საქმეს ვერ უთავებ, კაცად ვერ ივარგებ, დაგცინებს ქვეყანა. ნულარ ყოყმანობ, ჰა, აირჩიე: ერთი გზა — საფეხბურთო მინდვრებისაკენ მიემართება, მეორე გზა — შორეული ზღვებისა და ოკეანეებისაკენ მიდის. აირჩიე: ან ზღვა, ან ხმელეთი, კმარა, გეყოფა ყოყმანი, გაბედე არჩევანი...

მშობლებმაც ურჩიეს არჩევანი. დედამ უთხრა: ღობე-ყო-რეს ნუ მოედები, შვილო, ან ერთი აირჩიე, ან მეორე, რა გაშინებს, რა გაღონებს, ერთიც შეგწვევს და მეორეცო. მამამ უთხრა: ბიჭო, შენი სიცოცხლე გაორებული ხომ არ ივლი ამ ქვეყანაზე, ფიქრს ნუ აუტანიხარ, შენს არჩევანს სატევარივით ორი პირი აქვს, რომელსაც უჩვენებ ცხოვრებას, ის პირი გასჭრის, გადაწყვიტე ერთხელ და სამუდამოდ, შენც მოისვენე და ჩვენც მოგვასვენეო...

ძნელმა არჩევანმა მოსვენება დაუქარგა ბოჩიას. არ უწყოდა რა ელონა, რადგან ზღვისაკენაც და საბურთაოსკენაც, ტოლად მიუწევდა გული.

... ერთ საღამოს, მშობლების გაუთავებელ რჩევა-დარიგებას რომ ველარ გაუძლო, გარეთ გამოვიდა, — წავალ, გავივლ-გამოვივლი, ტოლ-ამხანაგს შევეყრები, ამ ჩემ არჯალ ფიქრს გულს გადავაყოლებო. ჯერ ქუჩა-ქუჩა იხეტიალა უმიზნოდ, მერე ისევ თავის თავთან მოუწდა ყოფნა და რო-

ცა პატარა ქალაქმა შუალამეში ჩაყვინთა, ზღვისაკენ გასწია კენტად.

გვიანი შემოდგომის ჩამქრალი ღამე იყო. ბნელით მოცულ-ლი ზღვა ყრუდ გუგუნებდა, წყვილიდიან ნაპირზე სველი ქარი დათარეშობდა. წინ იყო—მხოლოდ უკუნი, უკან—დაძინებული ქალაქის სინათლეები ბეუტავდნენ... ზღვა შარზე იდგა, საჩხუბრად აშლილიყო, ქვეყანას საომრად იწვევდა და უკაცურ ნაპირს ლანძღვა-გინებით იკლებდა.

დიდხანს იდგა ნაპირზე ბორია, გულისტკივილით გასცქეროდა თავის ძველ მეგობარს და იმ მარტო-ღამეში, ტალღების იმ გრგვინვა-ქუხილში, არჩევანის ძნელ ჭარას აბრუნებდა:

ზღვა თუ მწვანე მოედანია? ერთ-ერთი უნდა გაიწიროს!..

და, 19 წლის კაბუქმა ბორის პაიჭაძემ ბავშვობის ოცნებას, სიყრმის ტრფიალს, სიკაბუქის სურვილს — შავ ზღვას,— დაუფარავად უთხრა საბოლოო არჩევანი:

ფეხბურთი, მწვანე მოედანი!

კაბუქმა ფიქრს თავი გაართვა და ისე ამოისუნთქა, თითქოს მძიმე ტვირთი მოხსნესო... დინჯი ნაბიჯით გააყვა ქალაქისაკენ მიმავალ ქვიშიან ბილიკს... უკან დარჩა უკაცური ნაპირი და ბობოქარი სტიქიონი...

თ ბ ი ლ ი ს შ ი

ისიც იცოდა ბორიამ: მხოლოდ ბურთის თამაშით ვერ გაიტანდა ცხოვრების ჭირვეულ ლელოს.

— რაც უნდა კარგი მობურთავე და „ფიზკულტურნიკი“

გამოხვიდე, ცოდვა იქნები უხელობოდ, წუთისოფელი გაგ-
ტანჯავს, შვილო, — უჩიჩინებდნენ მშობლებიც.

ამიტომ, ახალ არჩევანთან ერთად, ბორიამ მტკიცედ გა-
დაწყვიტა სწავლის გაგრძელებაც.

— აბა, შენ იცი, ჩვენო სიცოცხლეც და გამხარებელო,
როგორც ჰკვიანად მოიქცევი, გვასახელებ, გაგვაბედნიერებ
და ტკბილად დაგვაბერებ, — დალოცეს, დაკოცნეს ვაჟიშვილი
და ხაბაკ-ხუბაკით, თბილისის გზას გაუყენეს სოლომონმა და
ოლღამ.

1935 წლის ზაფხულის მიწურულს, ბორია თავის სიყრმის
მეგობრებთან: ვალოდია ბერძენიშვილთან, გრიშა გაგუასთან,
გვაჩი ჯორბენაძესთან ერთად, თბილისს ეწვია და ინდუსტ-
რიალური ინსტიტუტის კარი შეაღო. ინსტიტუტის ფეხბურ-
თის მოყვარული დირექცია ხელგაშლილი შეხვდა თავისი
გუნდის ახალ შევსებას. ფოთელი „ვარსკვლავები“ უგამოც-
დოდ მიიღეს და საერთო — ტექნიკურ ფაკულტეტზე ჩა-
რიცხეს.

• • •

„ზიი“, „ტსპო“, „ლოკომოტივი“, „დინამო“ — ეს ოთხი სა-
ხელი ერთთავად პირზე ეკერათ, ოთხ „მტრულ“ ბანაკად გა-
თიშულ თბილისელ გულშემატკივრებს. გაზაფხულობით და
შემოდგომობით, ქალაქში უძლიერესის სახელისათვის გამარ-
თულ ფიცხელ ტურნირებში — უმთავრესად ეს ოთხი გუნდი
პაექრობდა. ხან ერთი ბანაკი ზეიმობდა, ხან მეორე. მინდვ-
რებზე ფეხბურთელები იბრძოდნენ, ტრიბუნებზე გულშემატ-

კივრები ომობდნენ. ოთხი ერთმანეთის მჯობნი გუნდი, ოთხი „შეურიგებელი“ ბანაკი — ასეთი იყო თბილისის საფეხბურთო სამყარო, მაშინ, როცა ბორია პაიჭაძეს, ვალოდია ბერძენიშვილს, გრიშა გაგუას, გვაჩი ჯორბენაძეს ჩამოსვლა და „გათბილისელები“ არ აცალეს, და ეს „გუშინდელი“ ფოთელები: ეგრევე „გაუთლელად“ ინდუსტრიალური ინსტიტუტის „ზიის“ ნაკრებ გუნდში „მოაყუჩეს“.

„ზიი“, მაინც, თბილისელების ყველაზე საყვარელი გუნდი იყო. „ზიის“ ყველაზე მეტი ქომაგი ეგულებოდა ტრიბუნებზე. „ზიის“ ყველაზე ხმაურიანი და „ჭინჭყლი“ გულშემატკივრები ჰყავდა. „ზიი“ და ეს ამოდენა სტუდენტობა. „ზიი“ და მთელი თბილისის ახალგაზრდობა. როცა „ზიი“ იმარჯვებდა, სტადიონზე მტრელებს აფრენდნენ და გაგიყების წუთები დგებოდა. „ზიის“ ფეხბურთელები: „ლასტოჩკა“ იური კასრაძე, „სვეჩკა“ მიშა მინაევი, „პარავოზა“ მიშა ბალოტინი, „დუხავიკა“ გერმან კირილოვი, „კრასავიკა“ ვალია კოძისი — ჰქუხდნენ მთელს ქალაქში.

მაგრამ, „სტადიონის ხალხი“ ახლა „სხვა რამის ინტერესში“ იყო ჩაყარდნილი. ფოთელი „ვარსკვლავების“ თბილისში გადმოსვლის ამბავი მალე მოედო ფეხბურთის მოყვარულებს და ისინი „ზიის“ ახალი შემადგენლობის ხილვის მოლოდინში იყვნენ. განსაკუთრებით ღელავდნენ „ზიის“ გულშემატკივრები, რომლებიც დღეს დღეზე ითვლიდნენ ქალაქის საშემოდგომო პირველობის დაწყებამდე, როცა მათი საყვარელი გუნდი უცხო „ვარსკვლავებით“ დამშვენებული გამოვიდოდა მოედანზე...

და აი, დადგა ნანატრი დღე. 1 ოქტომბერს გაჩაღდა ტრა-

დიციული ტურნირი და „ზიი“ ნახევარდაცვა-თავდასხმის განახლებული ხაზებით მოევიდნა მეტოქეებს. გრიშა გაგუას და გვაჩი ჯორბენაძეს — ნახევარდაცვა არგუნეს, ვალოდია ბერძენიშვილი — შუამარბად აირჩიეს, ბორია პაიჭაძეს — ცენტრფორვარდობა მიანდეს და 20 წლის ჭაბუკს თავდასხმის მეთაურობა აკისრეს.

„ზიიმ“ წაუბოროძიებლად გათელა მინდვრები, ფარ-ხმალი დააყრევინა მეტოქეებს და უძლიერესობა დაიჩემა ქალაქში. ფოთელმა „ვარსკვლავებმა“ ნდობა გაანართლეს, და მერე ეგრე? ბორიას ლამის ხელით ატარებდნენ, გრიშა, გვაჩი და ვალოდია კი — ლამაზი, ვაჟკაცური თამაშისათვის, სამუდამოდ შეიყვარა მომთხონმა და ჭირვეულმა თბილისელმა მაყურებელმა.

ოქროს წლები

1. მეორედ დაბადება

1936 წლის თებერვლის ერთ ქარბუქიან, გათოშილ დღეს, შორეული მოსკოვიდან მოსულმა უეცარმა ცნობამ გაადვიდა, ააფორიაქა, დედაბუდიანად აშალა „ზამთრის ძილს“ მიცემული თბილისელი გულშემატკივრები.

ჭორი იქნებაო, — ამბობდნენ ერთნი... „ნატური“ ამბავიაო, — იჯერებდნენ მეორენი...

რაკი ერთი გაიგეს, ენა ველარ მოასვენეს, ასი ტყუილი თქვეს, მერე ქალაქში გაავრცელეს, მერე თვითონვე დაიჯე-

რეს და იმ ცნობას ათასი კული გამოაბეს. მაგრამ, გავიდა რამდენიმე დღე, საგაზეთო კიოსკებთან გრძელი რიგები გაიჭიმა, „მუშა“ და „ვეჩორკა“ ხელიდან ხელში გადავიდა, ყველაფერი გამოირკვა და თბილისელმა ბიჭებმა სიხარულით ლამის დაჭამეს ერთმანეთი...

„მიმდინარე საკავშირო შეჯიბრებას ფეხბურთში, საფუძვლად დაედება არა ქალაქთა ნაკრები გუნდების შეხვედრები, როგორც ეს წლევეანდლანდე ხდებოდა, არამედ სპორტულ საზოგადოებათა კოლექტივების ჩემპიონატი, რომელიც წრიული სისტემით გაიმართება. პირველობაში მონაწილე გუნდები, თავისი ოსტატობის დონის მიხედვით დაყოფილ იქნებიან „ა“, „ბ“, „ვ“, „გ“ ჯგუფებად“. დასასრულ, გაზეთები იტყობინებოდნენ, რომ ამ დიდი მასშტაბის ასპარეზობაში ქართული ფეხბურთი წარმოდგენილი იქნებოდა „ბ“ კლასის ერთი გუნდით...

რომელი იქნება ეს გუნდი? — გულშემატკივრებმა ახლა ამაზე ატეხეს დავა-კამათი და „ზამთრის ძილი“ საბოლოოდ დაიფრთხეს, — „ზიი“? „ტსპო“? „ლოკომოტივი“? „დინამო“?

„დინამო“ — დაასკვნეს საქართველოს ფეხბურთის მესვეურებმა და გულშემატკივართა წილადობილას წერტილი დაუსვეს.

მარტი პირველ დღეებს ითვლიდა, როცა „ზიის“, „ტსპოს“, „ლოკომოტივის“ „ნაღები მოხადეს“ და ვინც იყვნენ იმათში მჯობნთა-მჯობნი, მძლეთა-მძლენი, საქართველოს ამ უძველეს გუნდში გადაიყვანეს.

1925 წელს დაარსებული, 1928 წლიდან აღზევებული, 1934 წლიდან დაქვეითებული თბილისის „დინამო“ — წელში

ისევ გაიმართა და 1936 წლის იმ დაუვიწყარ გაზაფხულზე მეორედ დაიბადა.

2. „თერთმეტი უცნობი“

როცა გაზეთმა „კრასნი სპორტმა“ „ბ“ ჯგუფის გუნდების შეჯიბრების დაწყების წინ, გამოაცხადა მკითხველთა კონკურსი „ვინ გადავთ „ა“ ჯგუფში“, — თბილისის დინამოელებს, ანუ როგორც მათ უწოდებდნენ „თერთმეტი უცნობს“, მხოლოდ ორიოდე კაცმა შეაწია ხმა... „წინასწარმეტყველნი“ სასტიკად მოტყუვდნენ ანგარიშში. „თერთმეტმა უცნობმა“ სეზონის № 1 „სიურპრიზი“ მთავრად გულშემატკივრებს: დაუმარცხებლად იბრძოლეს, ყველას აჯობეს, 19 ბურთი გაიტანეს, 4 გოლი მიიღეს, ნაცადი ლენინგრადელები სადღაც უკან მოიტოვეს, ნაქებ მოსკოველებს 4 ქულით გაასწრეს, „ა“ ჯგუფში გადასვლას საოცნებო საგზური მოიპოვეს, და თბილისის „დინამომ“ ერთბაშად დაიჭუხა მთელს კავშირში.

როცა გაზეთმა „კრასნი სპორტმა“, იმავე წლის ზაფხულში, საბჭოთა კავშირის თასისათვის ასპარეზობის დაწყების წინ, გამოაცხადა მკითხველთა კონკურსი „რომელი გუნდები გავლენო ფინალში“ — ჩვენი „დინამოს“ წარმატება „გაზაფხულის გაუგებრობად“ მიიჩნიეს, თბილისელები აინუნშიაც არ ჩააგდეს და ერთი ხმა რა იყო, იმათთვის ისიც არავინ გაიმეტა სამადლოდ... „წინასწარმეტყველნი“ მეორედ მოტყუვდნენ ანგარიშში.. „თერთმეტმა უცნობმა“ სეზონის № 2 „სიურპრიზი“ მთავრად გულშემატკივრებს: უსახელონი სახელიანებს შეუდრეკლად მიეტივნენ, ფინალური სარბიელისაკენ

მიმავალი მოლიპული გზა გაბედულად გაიკვალეს, „გამოვარდნის“ უღმობელ წესს გაუძლეს, მათთვის დაგებულ ფბთერაკში სხვა გააბეს, ძნელად სავალ საცალფეხოზე გავიდნენ და მეოთხედ-ფინალის საბედისწერო გზაჯვარედინზე საშიშ მეტოქეს შეეყარნენ. თბილისის „დინამოს“ წინაშე მთელი თავისი მრისხანებით იღგა ბრძოლებში ნაწრთობი „სპარტაკი“... მოსკოვის „სპარტაკი“!...

„თბილისელებს წირვას გამოუყვანსო „სპარტაკი“, — იცი-ნოდნენ გამარჯვებით განებივრებული მოსკოველი გულშემატკივრები და „სეირის“ მოლოდინში, მეტი-მეტი სიანოვნებისაგან ხელებს იფშვნეტდნენ...

«это будет не матч достойных, а просто на просто «избиение младенцев», — დარწმუნებული იყო მთელი მოსკოვი.

და „წინასწარმეტყველნი“ მესამედ მოტყუვდნენ ანგარიშში.

3. „საუკუნო მატჩი“

ამ მატჩზე ბევრი თქმულა, ბევრი იწერება და, ალბათ, მომავალშიც, ბევრს იტყვიან. არც რაა გასაკვირი: ეს იყო დაუვიწყარი ორთაბრძოლა. უჩიათი შეუპოვრობით იბრძოლეს გამოცდილმა სპარტაკელებმა, ადვილად არ დათმეს თავა ახალბედა დინამოელებმაც: შერკინებაში ორი დღე დააღამეს, 180 წუთი დალიეს, მაგრამ ძვრაც ვერ უყვეს ერთმანეთს... პირველ დღეს: ჯერ „სპარტაკს“ მიჰყავდა 3:1, მერე თბილისელებმა ივარგეს, გახდა 3:3 და ბინდმა გაჰყარა მოასპარეზენი. მეორე დღეს ყველაფერი განმეორდა, მხოლოდ: ჯერ ჩვენებს

მიჰყავდათ 3:1, მერე სპარტაკელებმა ილონეს, ისევე გახდა 3:3 და მსაჯის სასტვენმა „გააშველა მოჩხუბარნი“. ორჯერ იყო 3:1, ორჯერ გახდა 3:3, ხან ერთი გავიდა წინ, ხან მეორე დაწინაურდა, არც ერთი გატყდა და არც მეორე. ეს იყო დაუვიწყარი ორთაბრძოლა.

და როცა, სათასო ასპარეზობის უღმობელმა ოლიმპიურმა კანონმა დამატებით 30 წუთი მოათხოვა, ნაბრძოლი ფესბურთელნი კვლავ მოიხმო მინდორზე, — „თერთმეტმა უცნობმა“ სარბიელზე სასწაული მოახდინა, ფრთები გამოისხა, მეტოქის კარს შეუტია, საჯარიმო მოედანს ბოლი ადინა, სპარტაკელთა კარის ბადე სამჯერ ზედიზედ შეარხია, 80 ათას მაყურებელს პირი დააღებინა და ტრიბუნებს ღვანდგარი დააწყებინა.

6:3!

ეს იყო გაუტეხავ მეტოქეთა დაუვიწყარი ორთაბრძოლა, ადამიანის მოურევნელი სიმძლავრის, ტოლდაუდები მხნეობის, დაუღვევლი სიჩაუქისა და გონებამახვილური ილათიანობის გასაოცარი სანახაობა.

4. „საუკუნო მატჩის“ ექო

თბილისის „დინამომ“ თასის მოპოვება ვერ შესძლო, მაგრამ ახალგაზრდული გუნდის ბრწყინვალე გამარჯვებამ მოსკოვის „სპარტაკის“ უკვე სახელმწიფოებრივ კოლექტივზე და შემდგომ ფინალში გასვლამ, დიდი შთაბეჭდილება მოახდინა.

თვალი გადავაკლოთ იმ დღეების ჟურნალ-გაზეთებს: „ყოფილი „ზიელების“ ბორის პაიჭაძის, გრიგოლ გაგუას, ვლადი-

მერ ჯორბენაძის, ვლადიმერ ბერძენაშვილის და სხვათა გადასვლამ „დინამოში,“ საქართველოს დედაქალაქის ეს უძველესი ფეხბურთელთა გუნდი ააღორძინა და ჩვენი ქვეყნის უძლიერეს კოლექტივთა რიგებში ჩააყენა“. — წერდა ქართული პრესა. „თბილისის „დინამოს“ სახათ, საბჭოთა ფეხბურთმა საიმედო ძალა შეიძინა“. — წერდნენ ლენინგრაძელი ჟურნალისტები. „210 — წუთიანი მეოთხედ-ფინალური მატჩი საბჭოთა ფეხბურთის ისტორიაში ოქროს ასოებით ჩაიწერება. ეს იყო რაღაც განუმეორებელი, განსაცვიფრებელი, ფენომენალური ფეხბურთი, რომლის მსგავსი ჯერ არ უნახავს მოსკოვს და, ალბათ, კიდევ დიდხანს ვერ იხილავს“. — წერდა ჟურნალი „ოგონიოკი“. „როცა ქართველი ფეხბურთელები მოედანზე გამოდიოდნენ, ისინი მოსკოველი მაყურებლებისათვის წარმოადგენდნენ, „თერთმეტ უცნობს“. როცა ქარველი ფეხბურთელები სტოვებდნენ მოედანს, ისინი 80 ათასი კაცისათვის წარმოადგენდნენ „თერთმეტ საოცრებას“, რომელთა წინააღმდეგ ბრძოლა წარმოუდგენლად ძნელია“. — წერდა „კრასნი სპორტი“. აღნიშნავდნენ ცალკეულ მოთამაშეებსაც: მეკარეებს ა. დოროხოვს და ნ.სალონიანს, მცველებს შ. შავგულიძეს და ე. ნიკოლაიშვილს, ნახევარმცველებს ვ. ჯორბენაძეს და ნ. ანიკინს, თავდამსხმელებს: მ. ბერძენიშვილს და მ. ასლამაზოვს, აღნიშნავდნენ მათ კარგ ფიზიკურ მომზადებას და მაღალ ტექნიკას...

განსაკუთრებული ქება-დიდება წილად ხვდა თბილისის „დინამოს“ ცენტრფორვარდს: „თბილისელების თავდასხმას ხელმძღვანელობს დაუღალავი და საშიში პაიჭაძე. უნდა ითქვას, რომ საბჭოთა კავშირის ფორვარდებიდან არც ერთს არ

შეუძლია ისე მოხერხებულად და სწრაფად დაამუშაოს ბურთი, როგორც პაიჭაძეს. ისე იოლად მოატყუოს თავისი დარაჯი, ბურთი ისე „მოჭრილად“ დაარტყას კარში, როგორც ეს შეუძლია პაიჭაძეს. ამაზე მეტყველებენ ის ბურთები, რომლებიც ყუმბარებივით გაგზავნა მოსკოველთა კარის ბაღეში პაიჭაძემ“.

5. „დიდი ურუგვაელები“

გაზაფხულზე დანთებული და შუაზაფხულში აგიზგიზებული ცეცხლი, ქართველმა ფეხბურთელებმა არც შემოდგომაზე გაანელეს. თასის ყისმათმა რომ უმტყუნათ. მოსვენება დაკარგეს, ახლა ჩემპიონობა აიჩემეს და პირველობას დაუმიზნეს...

თითო-ოროლა ურწმუნომ მაინც გამოჰყო ფეხი: მაგათ თასი ხომ არ ჰგონიათ პირველობა, ჩაფლავდებიანო. მაგრამ, კეცხნით არ მოსდიოდათ დინამოელებს და ნაცარქეპიობით: გულაც ჰქონდათ საგულეში, მუხლიც ჰქონდათ სამუხლეში, თავიც ჰქონდათ ქადილისა. „აწყვეტაზე“ იყო გუნდი: შურკა დოროხოვს თვალი ჰქონდა ელვაზე უმაღესი, შოთა შავგულიძე კაცს ძვირად გააქაჰანებდა საჯარიმოზე, გრაშა გაგუა და გვაჩი ჯორბენაძე ძნელად დასთმობდნენ შუა მოედანს, წინ პაიჭაძე დაგლეჯდა აბჯანდებს. ახლა კიდევ სომოვი, ახლა კიდევ პანინი, ახლა კიდევ ბერძენიშვილი, ახლა კიდევ... რა ვიცი, სულ ერთიმეორეზე უკეთესი ბიჭები იყვნენ. ერთი სიტყვით, ყველაფერი რიგზე იყო, იმათ წინ ეშმაკიც ველარ დაუღებოდა!..

ჰოდა, რაღა ბევრი გავაგრძელო, თეთრი კბილი და შავი კბალი სიცილის დროს გამოჩნდა: დაჩაგრეს მოსკოველები,

დაიბრავებს კიეველები, გააცურეს ფალავანთა ფალავნები, წაახდინეს მჭობნთა მჭობნი, და როცა ჩემპიონის კვარცხლბეკზე ცალა ფეხი შედგეს, უეცრად... აუტკივარი თავი აიტკიეს, ლენინგრადის მაჩანჩალა „კრასნაია ზარიასთან“ წააგეს (!), პირველობის მაძიებლებმა მესამე ადგილი იკმარეს და თითქმის ვანადღებულ ჩემპიონობას, ჩაიღურის წყალო დაალევეინეს.

არც 37-ში შეირცხვინეს პირი: თასის ფინალი მეორედ დალაწქრეს და წამყვან ხუთეულში ფეხი მოიკიდეს... ძაან დრო იყო! თბილისის „დინამო“, „დოროხოვი“, „შავგულიძე“, „გაგუა“, „ჯორბენაძე“ და „პაიჭაძე“, „პაიჭაძე“, „პაიჭაძე“ და „პაიჭაძე“-ლა ისმოდა სტადიონებზე...

იმათი შნო და ლაზათი ურწმუნოებმაც ირწმუნეს, იმათი ძალა-ილათი საქვეყნოდ აღიარეს, ქართველი ფეხბურთელები მსოფლიო „ვარსკვლავებს“ აღარეს, სამხრეთ-ამერიკელ „ჯადოქრებს“ ამსგავსეს და „დიდ ურუგვაელებად“ მონათლეს.

6. გაიოზ ჭეჭელავა

თუ 36-ში, ის დაუფიწყარი პირველი გამარჯვებანი „შავგულიძეებისა“ და „პაიჭაძეების“ წყებამ გაქედა, 37-ში მოპოვებულ წარმატებებში ახალმოსულთა „ბედნიერი“ ფეხი ცერაა. ძველებს ახლები შეეწივნენ და „დინამომ“ მხრები გაშალა, ჯანში იმატა. მთიანი სევანეთიდან მოფრინდა თვალისით სწრაფი თენგიზ გავაშელი, ზღვისპირეთიდან შეჰკრა კამარა ალიოშა ტყებუჩავამ, „ლოკომოტივიდან“ „გადმობარგდა“ გაიოზ ჭეჭელავა.

გაიოზ ჭეჭელავა... საფეხბურთო მინდვრების ამოუცნობი საიდუმლოება და ქართველი კაცის ილათიანობის ლამაზი ლე-

გენდა... გაიოზმა გარემარბობა დაიჩემა, მარჯვენა ფრთა აიჩრჩია, ჯერ გაუბედავი ნაბიჯი გადადგა, მერე თავი აიწყვიტა, ბურთი დაიყოლა, ხალხი აიყოლა, ტრიბუნები დასაბმელი გახადა და ბორის პაიჭაძეს ძმასავით მხარში ამოუდგა...

არა, არ არის შემთხვევითი... პაიჭაძეს გავიხსენებთ და ჯეჯელავა მოგვაგონდება... ბორის პაიჭაძესთან ერთად, გაიოზ ჯეჯელავამ ქართული სიკისკასისა და სიჩაუქის ყველაზე წარმტაცი სიმღერა თქვა.

7. საქართველოს საღმრთოებელი

ძველი წყობა დაიწუნეს, ინგლისური შეითვისეს, თავისი ცდაუმატეს, საბრძოლო გაშლა შეცვალეს და ფეხბურთში გადატრიალება მოახდინეს. ცენტრალური ნახევარმცველი დაცვაში გადაისროლეს, შუა მინდორზე ორი ნახევარმცველი იკმარეს, შუამარბები ოდნავ უკან დასწიეს, რიგები შეამჭიდროვეს, რგოლები შეადუღაბეს, დაცვა გააძლიერეს, შეტევა გაიადვილეს, თავისი კარი საიმედოდ ჩაკეტეს, სხვისი იოლად ასაღები გახადეს, მოთამაშეთა განლაგება ორ „ვ“ ს დაამგვანეს, გუნდის ბედი თერთმეტ ჯადოქარს მიანდეს და ძველ ფეხბურთს ომი გამოუცხადეს.

ახალი „იარაღი“ ჯერ შინაურებთან სცადეს. შეერკინენ კასტილიელებს და კატალონელებს, ასტურიელებს და ვალენსიელებს, ნავარელებს და არაგონელებს, მადრიდელებს და ბარსელონელებს, და მთელს ესპანეთში ტოლი ვერ იბოვეს. რაკი ხერხმა არ უმტყუნათ, ახლა გარეთ გაიხედეს, ევროპა მოიარეს, ყველა დააჩოქეს, ეს ამოდენა ქვეყანა ფეხბურთის

უნახავი გახადეს, და საფეხბურთო სამყაროში მეხივით გავარდა:

ბასკები!

37-ის შუა ზაფხულში, როცა ზარბაზნები აღვიძებდნენ ანდალუზიის ღამეებს, როცა ცეცხლი სწვავდა მურსიის ჰორიზონტს, როცა ზეცა დასტიროდა გრენადის მთა-გორებს, როცა სანგრები ღობავდნენ ველს ესტრემადურის, როცა ყუმბარებს უშენდნენ მადრიდის კარიბჭეს, როცა ინგრეოდა ვალიადოლიდი, როცა სახრჩობელებს დგამდნენ ბადახოსში, როცა ბორკილებს სჭედდნენ სარავოსში, როცა სამღერით კვდებოდნენ მონსორესში, როცა ბარიკადებზე დაჰქროდა დოლორესი და ბრძოლაში უხმობდა ესპანეთს, — ქორბულა ბასკონიის არწივები ჩვენს ქვეყანასაც ესტუმრნენ, გამარჯვებებით იარეს, მერე თბილისს ჩამოხედეს, და შეზრიალდა საქართველო:

ბასკები!

24 ივლისს, მთელი თბილისი შესახლდა სტადიონზე. რამდენიც იჭდა, ერთი იმდენი ფეხზე იდგა. ბასკების ეშხით, ისეთებიც მოვიდნენ, — თავის სიცოცხლეში რომ ფეხი არ შეეღვათ სტადიონზე, ფეხბურთი კოჭის გაგორება ეგონათ, და, რალა თქმა უნდა, „ინსაიდი“ „ოფსაიდისაგან“ ვერ გაერჩიათ...

30 ათასი მაყურებელი სტუმრების უბადლო ოსტატობის მოწამე გახდა. ბლასკომ „ცხრიანები“ ჩამოხსნა, ლანგარამ მოედანი მოქარგა, სილაურენმა და გოროსტიცამ „თავურების კონცერტი“ გამართეს და ავ-კარგის მცოდნე თბილისელმა გულშემატკივარმა სამუდამოდ დაიმახსოვრა ბასკების ცეცხ-

ლოვანი თამაში... მართალია, „მშრალზე“ დამარცხდნენ (0:2), დინამოელები ბასკების ღირსეული შეტოქენი იყვნენ თამაშის უკანასკნელ წუთამდე.

მეორე დღეს, გაზეთი „ფიზკულტურელი“ წერდა: „ნამდვილი ოსტატური თამაში გვაჩვენეს — მეკარე ა. ღოროხოვმა, მცველმა შ. შავგულიძემ, ნახევარმცველმა ვ. ჯორბენაძემ, თავდამსხმელებმა თ. გავაშელმა და ბ. პაიჭაძემ. ამ მატჩში, უკანასკნელის განსაკუთრებით კარგი თამაში იმის მაჩვენებელია, რომ ის ყალიბდება ბრწყინვალე მოთამაშედ“...

ბასკების ცენტრალურმა მცველმა ეჩიბარიამ განაცხადა: „მრავალი ქვეყანა მომივლია, ევროპისა და სამხრეთ-ამერიკის უძლიერეს გუნდებთან მითამაშნია, ერთმანეთს უმჯობეს ცენტრფორვარდებს შევკინებოვარ, მაგრამ პაიჭაძის მსგავსი არაფერი მინახავს... ეს არის ფიზიკურად ძლიერი, გასაოცარი სისწრაფით, არაჩვეულებრივი ტექნიკური ილეთებით და რაც მთავარია, მეტად ორიგინალური დრიბლინგით აღჭურვილი ფეხბურთელი... და თუ პაიჭაძის მრავალრიცხოვანი გარღვევები გოლით არ დაგვირგვინდა, ამაში „დანაშაული“ მხოლოდ მეკარე ბლასკოს მიუძღვის...“

...მატჩის შემდეგ, როცა მთაწმინდამ ბინდი მოისხა, მაშათა ღამემ დამალა, მტკვრის ხეობა ჩირალდნებად დაიღვარა და საღამოს თბილისმა პაექრობა შეჰბედა ვარსკვლავეთს, — გამარჯვებული ბასკები ქალაქის თავზე აიყვანეს და ძვირფას სტუმრებს ცაში დაკიდულ სასახლეში ნადიმი გაუმართეს.

პირველი სადღეგრძელო — ქვეყნად ხალხთა ძმობისა ითქვა. მეორე სადღეგრძელო — ესპანეთში რესპუბლიკელთა გამარჯვებისა შეისვა. მესამე სადღეგრძელო — სტუმრებმა

მოითხოვეს, ფეხზე წამოდგნენ, თასები მალლა შემართეს ბასკებმა და თავიანთი გულისნადები, გუნდის თავკაცს ეჩიბარიას ათქმევინეს: „ჩვენ გვინდა დღეგრძელობა ვუსურვოთ დიდი საბჭოეთის ამ პატარა კუთხეს, ამ მზით სავსე ქვეყანას, მიწით მცირე, მაგრამ დიდი წარსულის მქონე მშვენიერ საქართველოს, მამაც და ნიჭიერ ქართველ ხალხს, რომელმაც თავისი გმირი შვილების წყალობით საუკუნეთა ქართველებს გაუძლო, და რომელიც დღესაც ზრდის და კვლავაც გაზრდის ისეთ ჩაუქ ვაჟკაცებს, როგორიც არის, თუნდაც, ჩვენი დღევანდელი „მეტოქე“ მწვანე მოედანზე, ხოლო გულითადი მეგობარი, აქ, ამ შესანიშნავ ქართულ სუფრაზე—ბორის პაიჭაძე...“

8. „მოხეტიალე“ ცენტრფორვარდი

38-ში, ორ „ვ“-ზე გადავიდნენ, ბასკურ ყაიდაზე დაეწყვნენ, დაცვა გაასამკაცეს, ნახევარდაცვა გააორკაცეს, თავდასხმა მისწი-მოსწიეს, მაგრამ უცხო წყობას ალლო ერთბაშად ვერ აუღეს, თითქოს ხელ-ფეხი შეიკრეს, თავისებურად ვერ ინავარდეს, მუხლი ვერ გაილაღეს, ძველი წყობა დაივიწყეს, ახალი ვერ შეითვისეს და იმ ზაფხულს, მაინცდამაინც ვერ იყოჩაღეს ქართველმა ფეხბურთელებმა. და თუმცა, 38-შიაც კარგა ბევრი გამარჯვება მოიპოვეს, დოროხოვი მეკარეთა სამეუღლში შეიყვანეს, შავგულიძე პირველ მცველად აღიარეს, ბერძენიშვილი „პენალტის ჯადოქრად“ მიიჩნიეს, ჯორბენაძე „ვარსკვლავთა ჩამკეტად“ გამოაცხადეს, გავაშელის, ბერეჟნოის, პაიჭაძის სურათებმა გაზეთები ააჭრელეს, მე-6 ადგილი დიდი ვერაფერი შვილი იყო, მთელს კავშირში განთქმულ „დი-

დი ურუგვაელებისათვის“. ის ზაფხული ხინჯად დარჩათ თბილისელებს: გულშემატკივრებს და ფეხბურთელებს...

ქართული ფეხბურთის მესვეურებს კი საფიქრალი გამოუჩნდათ: საქმე მიხედვას მოითხოვდა, არადა საათივით აწყობილი გუნდი ხელსა და ხელს შუა წაუვიდოდათ. ძნელი ჰქონდათ სააზრი: ძველისაკენ დაბრუნება ხელს არ აძლევდათ, ახლის ათვისებაში ახლის მცოდნე სჭირდებოდათ. დასხდნენ, ითათბირეს, აქეთური თქვეს, იქითური თქვეს, ახალი მწვრთნელი გადაწყვიტეს, ყოვლისმცოდნე მოიკითხეს, ათი ერთად ურჩიეს, ათივე დაიწუნეს, ბოლოს ერთი აირჩიეს და რუსეთიდან ბუტუსოვი მოიწვიეს...

ყოჩალი კაცი გამოდგა ბუტუსოვი: ზამთარი არ იუქმეს, დღე და ღამე ივარჯიშეს, ორი „ვ“ ხუთი თითივით ისწავლეს, ბასკურ „ონს“ თბილისურიც დაუმატეს, „ადგილის ცვლა“ მოიგონეს, მეტოქეებს თავსატეხი მოუშადადეს და ახალ სეზონს დიდი გულით შეეგებნენ ქართველი ფეხბურთელები... გამარჯვებებით დაიწყეს, მოსკოვის გუნდებს თავ-გზა აუბნიეს, კიეველებს დავთრები აურიეს, დონბასელები ბრინჯივით დააბნიეს, ლენინგრადელები უთავბოლოდ არბენინეს, საფეხბურთო ოლიმპისაკენ ტრიუმფით გასწიეს, მერე უცებ ძველი „ავადყოფობა“ გაიხსენეს, დაუდევრობა გამოიჩინეს, „სუსტებთან“ ხელჩაქნევით ითამაშეს, აუტკივარი თავი აიტკიეს, ერთი-ორჯერ წაიბორძიკეს, პირველობა ხელიდან გაუშვეს, მერე წელი ისევ გაიმაგრეს, „ცლკას“ წაგებულნი თამაში მოუგეს და მეორე ადგილი დაისაკუთრეს.

ისე მიიწურა ზაფხული და გახუნდნენ საფეხბურთო მინდვრები, „ადგილის ცვლის“ საიდუმლოს ვერავინ მოურგო

ჯადოსნური გასაღები. პაიჭაძე, ჯეჯელავა და ხარბელია ერთ-მანეთს „კალათბურთული“ სისწრაფით უცვლიდნენ ადგილებს და ფეხბურთის ყველაზე გამჭირაბი სპეციალისტიც ვერ გაიგებდა, ვინ საიდან შეიჭრებოდა გრიგალივით, მოწინააღმდეგის გაოგნებულ მცველებში. დიდებული სანახავი იყო მაშინ თბილისელთა ცენტრფორვარდი! ხან ცენტრიდან უტევედა, ხან მარჯვნიდან იწყებდა იერიშს, ხან მარცხნიდან აცხრებოდა არაქათგამოცლილ მეურვეებს და იდგა მინდვრებზე მწვრთნელების, მცველების, მეკარეთა შიშნარევი ძახილი: ფრთხილად, პაიჭაძე!

„კრასნი სპორტმა“ აღტაცებული სტრიქონები უძღვნა ქართველ ცენტრფორვარდს: „საბჭოთა კავშირში არ ყოფილა და არც არის ისეთი „მოხეტიალე“ თავდამსხმელი, როგორც პაიჭაძეა. მასში თანაბრად არის შერწყმული: მოედნის გასაოცარი ხედვა, პარტნიორის არაჩვეულებრივი შეგრძნობა, იშვიათი გამძლეობა, დიდი სისწრაფე, ბრწყინვალე დრიბლინგი და ზუსტი, ძლიერი დარტყმები კარში. და, რაც მთავარია, თავმდაბლობა, კორექტულობა, სპორტსმენის მაღალი კულტურა. ბორის პაიჭაძეს არასდროს მიუღია მსაჯის უბრალო გაფრთხილება, რომ აღარაფერი ვთქვათ მოედნიდან გაძევებაზე, რაც არტთუ ისე იშვიათია ზოგიერთი ჩვენი „ვარსკვლავებისათვის“...

კიდევ ერთი ნიშანი ჰქონდა მებრძოლისა პაიჭაძეს: როცა ბურთს დაეუფლებოდა, მეურვეებთან პირისპირ შებმას კი არ გაუბრბოდა, არამედ იქით მიისწრაფვოდა, სადაც მცველთა ყველაზე დიდი თავშეყრა იყო და ჯიქური შეტევით, ენით აუწერელი არეულობა შეჰქონდა მათ რიგებში.

მ. უგვირგვინო ჩემპიონები

1939—40 წლების საფეხბურთო სეზონები ტყუპებივით გავდნენ ერთმანეთს. 39-ის ამბები 40-შიც გაიმეორეს ქართველმა დიდოსტატებმა: გაზაფხულზე „აიწყვიტეს“, ჩემპიონატს უთავეს, მთელ ზაფხულს ილიდერეს, შემოდგომაზე ნაბიჯი აირიეს, ჯერ ვოლგოგრადში იძლიენენ, მერე მოსკოვში დამარცხდნენ, პირველობა მოსკოველებს დაანებეს, გამარჯვებულებს ორი ქულით ჩამორჩნენ და ისევ მეორე ადგილზე გავიდნენ.

ჩემპიონატმა გადაიქუხა, მაგრამ გარდასულ ბრძოლათა ექო, კიდევ დიდხანს იდგა დაყრუებულ ტრიბუნებზე, ფერგაცლილ მინდვრებზე, მთელს ჩვენს ქვეყანაში. აღარ ცხრებოდნენ ეურნალ-გაზეთები, არ ელეოდათ საწერი ეურნალისტებს ახალ ფალავნებს — მოსკოვის დინამოელებს გუნდრუქს უკმევდნენ, „მუდმივ პრიზიორებს“ — თბილისის დინამოელებს დიფერამბებს უმღეროდნენ.. „ორჯერ ზედიზედ მეორე ადგილის დაკავება — ჩემპიონობას უტოლდება. ამიერიდან, ქართველი ფეხბურთელები არიან „უგვირგვინო“ ჩემპიონები,“ — აცხადებდა „ოგონიოკი“.

— ვის აძლევთ თქვენს ხმას? — მიმართავდა „კრასნი სპორტი“ თავის მკითხველებს, სეზონის უძლიერესი ფეხბურთელის გამოსავლინებლად, საგანგებოდ გამოცხადებულ კონკურსში, — ვინ მიგაჩნიათ სეზონის №1 ფეხბურთელად?

პაიჭაძე, — ამბობდნენ მოსკოველები, — „დიდი ურუგვაელების“ ყველგანმყოფი, „მოხეტიალე“ ცენტრფორვარდი..

პაიჭაძე, — აცხადებდნენ ლენინგრადელები, საბჭოთა ფეხბურთის პირველი სიდიადის ვარსკვლავი!..

პაიჭაძე, — პასუხობდნენ კიეველები, — ცეცხლოვანი ქართული ფეხბურთის მშვენიება და სიამაყე!..

„პაიჭაძე, — იწერებოდა ზეინკალი ვიქტორ სოლომატინი შორეული ვლადივოსტოკიდან, — მართალია, მე იგი არ მინახავს, არც საფეხბურთო სარბიელზე, არც ცხოვრებაში, და მხოლოდ რადიოგადაცემებით ვიცნობ, როცა ტრიბუნების გრიალში მის გვარს ახსენებენ, ასე მგონია, მთის არწივი დასტრიალებს მინდორს და ვგრძნობ, ტანში როგორ მივლის ქრუანტელი“.

თბილისში ხომ აღარ იყვნენ სიხარულით. კომპოზიტორები სიმღერებს უთხზავდნენ პაიჭაძეს, პოეტები ლექსებს უძღვნიდნენ პაიჭაძეს, მხატვრები ტილოებს ჰქმნიდნენ პაიჭაძეზე, კარიკატურისტები ცხრაკაცმოკიდებულს ხატავდნენ გარღვევაზე გასულ პაიჭაძეს.

დაპარგული წლები

1941 წლის სპორტული ზაფხული თავის სტიქიაში იყო: კანდელაკი ბეჭებზე აწყობდა მეტოქეებს, გოგლიძე ამხობდა საჭადრაკო მეფეებს, ჯაფარიძენი იპყრობდნენ მწვერვალებს, გორგასალიძე ნოკაუტით იგებდა რაუნდებს, გოკიელი ჯეირანივით ევლებოდა ბარიერებს, დუმბაძის ბადრო ქორივით დასტრიალებდა მოედნებს, პაიჭაძე და ჯეჯელავა აზანზარებდნენ სტადიონებს, რომ უეცრად... საბჭოეთის ლაევარდოვან ზეცას, საავდრო ღრუბლებმა შეჰბედეს...

ომის ხანძარმა ოთხ წელიწადს იმძვინვარა და კანდელაკების, გოგლიძეების, ჯაფარიძეების, გორგასალიძეების, გოკიე-

ლების, ღუმბაძეების, პაიჭაძეებისა და ჯეჯელავების ჩაუჭი
თაობის. მთელი საბჭოთა ახალგაზრდობის ოთხი ოქროს წე-
ლიწადი შეიწირა... ერთს რომ სიცოცხლე წაპვევარა, მეორეს
ახალგაზრდობა გაუხუნა... მხოლოდ 1944 წელს, როცა მამუ-
ლის მცველებმა მიხაკისფერი ქირისაგან სრულად გასწმინდეს
სამშობლო მიწა-წყალი და ოთხფეხა მაჭლაჯუნა თავისავე
ბუნაგში შეიმწყვდიეს, — ისევ გაიღვიძა საბჭოთა საფეხ-
ბურთო სამყარომ, განახლდა ნაომარი ქვეყნის სპორტული
ცხოვრების მაჯისცემა.

ჰანი, გიღი, გიორგი სააკაძევი!

ნავთლულის მხრიდან იკამარა, ცას გაეკრა დაქულა ღრუბ-
ლებს დაეკიდა... ფოლადის ქორმა ერთ ხანს მეტეხის თავზე
იტორტმანა, მერე ფრთებში ქარი ჩაიდგა, მტკვრის ხეობა
გაზომა, სახურავებს გუგუნნი დაატეხა, ქალაქს ზანზარი მოჰგ-
ვარა, გარეკახეთის შიშველი გორაკები დაიგო, აზერბაიჯანის
ხორშაკიან ველებს გადაევლო, ყარაბაღის ქვის შუბებს შეაჯ-
და და თბილისის დინამოელნი ირანის გზაზე დააყენა.

... იძრა ირანი, როცა ქართველი ფეხბურთელების ჩამოსვ-
ლის ამბავი გაიგო... დიდი ყარამანყანთელები არ არიან აქეხ-
ბურთში ირანელები, მაგრამ მაინც ერთ ტრაბახში იყვნენ —
დაუმარცხებლად ვერ წაგვივლენო „გურჯისტანის ბიჭები“.
აბა, ჩვენ ბიჭებს რაღა ეთქმოდათ, მოთმინებით ლევდნენ მო-
ლოდინს და ელიმებოდათ ულვაშებში — ალილო და ხვალეო...

ჰოდა, ვის რისი თავიცა ჰქონდა, მოედანზე გამოჩნდა:
„გურჯისტანის ბიჭებმა“ სარბიელზე ჩაუქრობელი ცეცხლი

დაანთეს, მასპინძლები სირბილით „ჭიპზე გახეთქეს“, ბურთები სულ „პანტაპუნტი“ ყარეს, ირანელთა ტრაბახი შირაზის ქარს გაატანეს და თეირანელი მობურთავენი მუხლებზე დააჩოქეს.

მაგრამ, თურმე ნუ იტყვიოთ, ირანელებს თადარიგში კიდევ ერთი გუნდი ჰყოლოდათ შემონახული ქართველებთან შესარკინებლად. შაჰის „საკუთარი“ გუნდი იყო. დამარცხების სიმწარე თავის დღეში არ ეგემა და მთელს ირანში „უძლეველის“ სახელი ჰქონდა გავარდნილი... ქართველები არ შეშინდნენ და იმ „უძლეველ“ გუნდსაც გაუსინჯეს ყუათი. კაცმა რომ სიმართლე თქვას, გუნდი იმდენად არ იყო ხიფათიანი, რამდენადაც „ამაჟდიეს“ სტადიონი. ზომაზე გრძელი იყო მინდორი: კარგა დიდხანს უნდა გერბინა, ერთი ბოლოდან მეორემდე ჩაგედწია. მაგრამ, ის მინდორიც ითარეშეს, ის გუნდიც მოთოკეს, პაიჭაძემ, ჭეჭელავამ, ახალბედა ღოღობერიძემ ირანელები საკუთარ თვალს არ დააჯერეს და „შაჰის ბიჭებს“ ისეთი დღე დააყენეს, — შაჰი, გიდი, საღ იყავ მაშინ, გიორგი სააკაძევ! — შაჰმა კაცი მიუგზავნა მინდორზე პაიჭაძეს: გუნდის თავო და კაპიტანო, ეგ სამი გოლი გვაკმარე, ყელს ნუ გამოგვჭრი, ხალხად გაგვიშვი ამ ქვეყანაზეო. აბა, რას იზამდნენ, სტუმრები იყვნენ და ხათრი აღარ გაუტეხეს მასპინძლებს. მაგრამ, ღმერთი გაუწყრა — თამაშის ბოლოს პაიჭაძეს — ორმოცდაათიოდე მეტრიდან „ბრმად“ დაარტყა და... ის ოხერი ბურთი, ირანელთა კარის ბადეში კი არ გაეხვია?!. მისცვივდნენ ბიჭები: ეგ რა ნამუსია, შენ გოლები გაგაქვს, ჩვენ კი თამაშს გვიშლიო. იფიცა პაიჭაძემ: ღმერთი, რაჯული, ალაღბედზე დავარტყი, ეს ერთი მივქარე, მეტს აღარ ვიზამო.

სამარცხენოდ დამარცხდა ირანის შაჰის „უძლეველი“ გუნდი, რომელსაც, წარმოდგინეთ, თურმე, ტოლი არ ჰყავდა მთელ იმოდენა სახელმწიფოში. სწორედ ამბობს ერთი ქართული ძველი ხალხური ანდაზა: თეირანს ქალი არ იყო, ვირს ვარდისახარს ეძახდნენო...

პატივსაცემი მხრიდან იკამარა, ცას გაეკრა და ქულა ღრუბლებს დაეკიდა... ფოლადის ქორმა ერთ ხანს შარუხას თავზე იტორტმანა, მერე ფრთებში ქარი ჩაიდგა, ხრიოკი ტაფობი გაზომა, მეჩეთების აფერადებულ გუმბათებს გუგუნნი დაატეხა, თეირანს ზანზარი მოჰგვარა, ფერეიდანის შიშველი გორაკები დაიგო, ადარბადაგანის უმადლო ველებს გადაეველო და გამარჯვებული ქართველები სამშობლოს გზაზე დააყენა.

„ფეხბურთის კარუჯო“

გუნდი მთელ ზაფხულს „ოქლაშვილობდა“. მდიდარს ართმევდა და ღარიბს აძლევდა, ლიდერებს უგებდა და მაჩანჩალებთან აგებდა... დაცვა თუ მხნეობდა, თავდასხმა „კოკლობდა“. ჩველავა ფეხს იტკივებდა და ბრძოლის ველზე ახალ მთვარესავით გამოჩნდებოდა, ხარბედიას ყავლი გასელოდა და მუხლი ღალატობდა, ბერეჟნოი „ხანში“ შესულიყო და „შტანგას ველარ ეკიდებოდა“, პანიუკოვს თვალი ატყუებდა და „შუტები“ არ უმართლებდა, ლოლობერიძე ჯერ არ დამწიფებულებოდა და ვერ ბასაობდა, პაიჭაძეც არ იყო „ფორმაში“ და ველარ პაიჭაძეობდა...

პირველმა ომის შემდგომმა საფეხბურთო სეზონმა დიდი გამარჯვებებით ვერ დაფერა ქართული ფეხბურთის დროშები. და წყენა არ დააკლო თბილისის „დინამოს“ ქომაგებს. სამარ-

თლიანი იყო გულშემატკივართა გულისწყრომა: ჩვენი დინამოელები მეოთხე ადგილს დასჯერდნენ და თასს მეოთხედ-ფინალშივე შეეშვნენ.

„რეაბილიტირების“ საშუალება მალე მიეცათ ქართველ ფეხბურთელებს. როცა ჩვენი ქვეყნის საფეხბურთო მოედნებს თოვლის თეთრი საბურველი გადაეფარა და რვა თვეს ნაბრძოლი გულშემატკივრები ზამთრის „ტბილ ძილს“ მიეცნენ — საბჭოთა კავშირის საუკეთესო გუნდები საზღვარგარეთ გაემგზავრნენ. მოსკოვის დინამოელებმა ინგლისი შეაზანზარეს, ცედეკელებმა იუგოსლავია შეაჯერეს, დედაქალაქის ტორპედოელებმა ბულგარეთი მოხიბლეს... ჩვენი ბიჭები რუმინეთს ესტუმრნენ...

„თბილისის „დინამო“ საბჭოთა კავშირის ერთ-ერთი უძლიერესი და ყველაზე პოპულარული გუნდია... შუდრა, კიკნაძე, ფროლოვი, ბერძენიშვილი, გაგუა, ჭეჭელავა, პანიუკოვი, პაიჭაძე — საერთაშორისო კლასის მოთამაშენი არიან... ქართველი ფეხბურთელების ჩამოსვლა, დიდი მოვლენაა ჩვენს სპორტულ ცხოვრებაში...“ — აცხადებდა რუმინული პრესა.

იმ გათოშილ დეკემბერში, თოვლ-ჭყაპსა და ქარბუქში, — სამჯერ შეერკინენ რუმინელებს ქართველი ფეხბურთელები. „ჩეფერეს“ წყვილი ბურთი შეუგდეს, „იუვენტუსს“ „საკალათბურთო“ ანგარიშით მოუგეს, „ტიმიშოარა“ „მშრალზე“ გაანადგურეს, სულ 17 გაიტანეს, მხოლოდ 6 გაუშვეს, რუმინელებს მუხლი მოაწონეს, ქართული სიჩაუქე აჩვენეს და, ბასკებისა არ იყოს, თავი სამუდამოდ დაახსოვს.

პაიჭაძემ, ჭეჭელავამ, პანიუკოვმა ფრთები ძველებურად გაშალეს და თავისი ბიჭობა სრულად აჩვენეს რუმინელებს.

„დაუღალავი პანიუკოვი — „შორსმსროლელი ქვემეხია“ და შეუმცდარი „სნაიპერი...“ თვალშეუვლები ჭეჭელა — ზღაპარია საკვირველებისა... ხოლო გრიგალივით. მოთარეშე პაიჭაძე — სასწაულმოქმედი, ჯადოქარი, და ფეხბურთის კარუშო...“ — ხაზგასმით აღნიშნავდა „გაზეტა სპორტურილორი“.

ბერძენის მეორედ ყვავილობა

45-ის ჩემპიონატში, ბორის პაიჭაძის უჩვეულო „ღუმელი“, ზოგმა — 30 წელს მიღწეული სახელგანთქმული დიდოსტატის „სპორტულ სიბერეს“ მიაწერა, ზოგმა — მომავალი გრგვინვის მომასწავებლად მიიჩნია. მეორეთა ვარაუდი გამართლდა: მოვიდა 1946 წელი და დადგა უამი ქართული ფეხბურთის ბერძენის მეორედ ყვავილობისა. და მართლაც, „მეორე ახალგაზრდობა“ დაუდგა უღმობელ „სპორტულ ხნოვანებაში“ შესულ ბორის პაიჭაძეს.

„ბორის პაიჭაძის სამი დარტყმიდან ერთი ყოველთვის გოლით თავდება, — წერდა „ოგონიოკი“ 1946 წელს, — მაგრამ იგი არა მარტო ზუსტი დარტყმის ოსტატია; არავის არ შეუძლია ბურთთან ერთად ისე გაიაროს მთელი მინდორი და გაარღვიოს თავდაცვის ყველა ხაზი, როგორც პაიჭაძეს. რაც არ უნდა ჩქარა გარბოდეს პაიჭაძე, ბურთი მას ყოველთვის წინ აქვს ნახევარი მეტრით, თითქოს ბურთი მის ნაბიჯებს უწყობს ფეხს. პაიჭაძისათვის პატარა ადგილია საემარისი: 1—2 მეტრის ფართობზე მას შეუძლია რამდენიმე მოთამაშე მოატყუოს...“

ასეთი იყო ბორის პაიჭაძე 1946 წელს, — როცა ინგ-

ლისის სტადიონებზე „ვეფხვად“ მონათლული ხომიჩი მისი ბურთების გამოღებას ვერ აუდიოდა საკუთარი კარიდან, როცა მის ერთ დანახვაზე კანკალებდნენ მეკარეები, როცა მის „დაკეტვაზე“ ოცნებობდნენ მცველები, როცა მისი „დარდით“ აღარ იყვნენ მწვრთნელები, როცა მასზე ფიქრში ათენებდნენ გულშემატკივრები.

ასეთი იყო ბორის პაიჭაძე 1946 წელს, — როცა ქართველმა ფეხბურთელებმა სხვადასხვა „მანქანებით“ პირველი ადგილი დაკარგეს, მესამე იყაბულეს, და თასის ფინალს მიაღწიეს.

ასეთი იყო ქართული ფეხბურთის ბერძუხა, ჟამი რომ ედგა მეორედ ყვავილობისა.

ბედის სიმღერა

დიდი იყო და სახელოვანი 1947 წელიც, თბილისის დინამოელთათვის. სტადიონების მწვანე მინდვრები გამარჯვებებით ჰქონდათ მოფენილი ტყავის ბურთის ქართველ ოსტატებს. განუუმეორებლად დიდებული და განსაცვიფრებელი იყო 30 წელს გადაბიჯებული ცენტრფორვარდის ბორის პაიჭაძის ვირტუოზული ხელოვნება. მიუხედავად „წლების სიმძიმისა“, ფეხბურთელისათვის საკმაო „ხანდაზმულობისა“, — საფეხბურთო მინდვრების ეს რაინდი, მაინც ჰაბუკურად გულანთებული, ტანაქლერილი და შემპართებელი, კვლავაც ამოუცნობ საიდუმლოებად რჩებოდა ჩვენი ქვეყნის დიდოსტატი მცველებისა და მეკარეებისათვის. საბჭოთა კავშირის უძლიერესი კოლექტივების მწვრთნელთა სადარდელი, სანუკვარი ოცნება, გადაუწყვეტელი ამოცანა, №1 პრობლემა — ისევ და ისევ, ამ

უწინდებურად ყველგანმყოფი, მოხეტიალე № 9-ის ნეიტრალიზება იყო.

მაგრამ, წლები მაინც წლებად რჩებოდნენ, და ეს ყველაზე მეტად თბილისელი დინამოელებისა და მათი თავკაცის გულშემატკივრებს აღონებდა. იმ ხანებში, ტრიბუნებზე, არცთუ ისე იშვიათად ისმოდა:

— ბერდება ჩვენი ბორია! კიდევ ერთი-ორი ზაფხული და ჩვენი ბორია ვეღარ ითამაშებს! ბორია რომ წავა, რალა გვეშველება!

რა იცოდნენ, — ამ მგლისმუხლა კაცს მოედანზე სიბერე არ ეწერა! სხვანაირად არც იქნებოდა: პაიჭაძე და სიბერე ერთი გზით ვერ ივლიდნენ... პაიჭაძე — იმთავითვე ხალხის გულში ჩასახლული ლეგენდა... ლეგენდის სიბერე კი, სად თქმულა, ვის გაუგია!

მაგრამ, რაც დრო-ყაჰმა ვერ დააკლო, ვერც ფეხი გაუცვიოთა; ვერც გული დაუცხრო, — ერთმა ბრმა შემთხვევამ შეუქსო: მუხლი მოუცარა და ბავშვობიდან დაჩემებული ბურთი და მოედანი უდროოდ დაატოვებინა.

1947 წლის ზაფხულში, ქართულ ფეხბურთს შავი დღე გაუთენდა... მოსკოვში, „ტორპედოსთან“, ცხარე სათასო ასპარეზობის დროს, პაიჭაძეს ფეხი მოსტენეს... და გამარჯვებათა ესტაფეტა, რომელიც ქართული ფეხბურთის დაბადების დღეებიდან ატარა, დიდოსტატს ხელიდან გავარდა...

პაიჭაძისეული ესტაფეტა

ქართველების გუნდი არ დარჩენილა უმეთაუროდ... ბრძოლაში დაჭრილი არწივი, მისივე საბუღარიდან წამოფრენილმა

მართვემ შეცვალა... შუა გზაზე დაგდებული ესტაფეტა სრულიად ახალგაზრდა ავთანდილ ლოლობერიძემ აიტაცა და გუნდის თავკაცობაც თვითონ იკისრა...

პაიჭაძისეული ესტაფეტა ავთანდილ ლოლობერიძემ 14 წელიწადს ნამუსიანად ატარა, დღევანდლამდე სახელიანად მოიტანა და ახალი თაობის დინამოელებს, „დიდი ურუგვაელების“ ღირსეულ ჩამომავალთ: შოთა იამანიძეს, გივი ჩოხელს, მიხეილ მესხს, სერგო კოტრიკაძეს და მათ სწორ-ტოლებს გადაულოცა.

კარგი არჩევანია! პაიჭაძისეული ესტაფეტა საიმედო ხელშია! პაიჭაძისეული ესტაფეტა გადაცემულია!

პაიჭაძის გახსენება

წელიწადი თოკივით გაჰყვა წელიწადს... თხუთმეტჯერ დაიფერნენ და გახუნდნენ სტადიონების სადიდოსტატო მინდვრები... ალაიანის შიშველი ველიდან სათარეშოდ აფრენილ შემოდგომის ქარს, თხუთმეტჯერ გაატანეს ფალავანთა ფალავნობას აღუვსებელი სურვილები, გაცრუებული იმედები და დამსხვრეული ოცნებები თბილისელმა გულშემატკივრებმა.

ჰო, თხუთმეტმა წელიწადმა დაანება თავი უკვდავ დროს. 1947 წლის შუა ზაფხულის იმ საბედისწერო დღიდან, როცა ბორის პაიჭაძემ ზანზარს უკანასკნელად მისცა ტრიბუნები და მუხლმოცარულმა, გულისტკივილით დასტოვა საბურთაო... ჰო, თბილისის კოხტა სტადიონის კოშკურებს მიღმა ბევრმა მტკვარმა ჩაიარა ქართული ფეხბურთის იმ მარცხიანი დღის შემდეგ.

და მაინც არ დაეხსნა საფეხბურთო სამყაროს ამ თოფის გავარდნასავით სახელის ქუხილიანი ექო... პაიჭაძის ამბავს დროის ავდარმაც ვერ შეჰბედა დავიწყების ნისლი, იგი ამბავი ადამიანის სიჩაუქის მაგალითად გაჰყვა თაობიდან თაობას და ჩვენს ღღეებამდე მოვიდა — ხოტბიანი, სიტყვა-ეყვნიანი. არსენას ლექსივით გაფრენილი, მაღალტქმინანი... როგორც უცხო რამ ზღაპარი...

მაგონდება: შარშან იყო... კარზე მომდგარ ზაფხულს მაისისათვის ცეცხლი წაეკიდებინა და უღღეურ თბილისურ გაზაფხულს სული გაპარვაზე ჰქონდა... მხედ იღვრებოდა კვირადღე... სიცხისაგან ადრე აშლილმა ქალაქმა, შუადღეზე თავი მოიგიჟიანა... „ქარიშხალას“ სტადიონმა ვაკეში ზღვა ხალხი შეყარა და ილიას პროსპექტზე ავტომანქანების ჯირითი გამართა... ერთი ამბავი იყო: თბილისი ერევანს ეთამაშებოდა... მეც, რა თქმა უნდა, იქით გავწიე... დიდი ვაი-ვაგლახის შემდეგ, რომელიც ერთ ჰაი-ჰუიან სათავგადასავლო მოთხრობასაც კი დაამშვენებდა, — ყველა დაბრკოლება დავძლიე და მეთე სექციის მეჩვიდმეტე რიგში „მოვყუჩდი“ ნაბრძოლ-ნაომარი... თამაშის... არა, ბრძოლის დაწყებას ბევრი აღარაფერი უკლდა... ქართველი და სომეხი მოასპარეზენი დაჭურვას ამთავრებდნენ და მინდორს სტოვებდნენ... და უცებ, პირთამდე დატენილი ტრიბუნების მატჩისწინა ლაგამოდებული გუგუნის, თავდაჭერილმა ჩურჩულმა შეცვალა... „პაიჭაძე... პაიჭაძე“... — სტადიონი აყირავდა თუ ეს ამოდენა ხალხი აიშალა... ჰო, ხალხი ფეხზე დგებოდა და ჩურჩული მისდევდა ტრიბუნებს... ათასობით თვალი სიყვარულით მიჰყვებოდა შუატანის, შუახნის იერიან ვაჟაკს, რომე-

ლიც მორიდებით მიიკვლევდა გზას თავისი ადგილისაკენ... ერთ წამს, ხალხმა თითქოს თბილისიც დაივიწყა და ერევანიც, ის გააფთრებული ორთაბრძოლაც, რამდენიმე წუთის შემდეგ რომ გაჩაღდებოდა, გორაკებით შემოზღვარულ ვაკის ამ პატარა ტაფობში...

ეს პატარა, შეიძლება უმნიშვნელო, ჩვეულებრივი ამბავიც, იქნებ ამიტომ გამახსენდა:

„დინამოს“ სტადიონს გულგრილად ვერ ჩავუვლი. შუბების ნაცნობი ტყე რომ დაიწყება, აუცილებლად შეეჩერდები, გული სხვანაირად შემითამაშდება, სუნთქვა შემეკვრება და ფეხბურთზე ლაი-ლაის საღერღელი ამეშლება. ჩვეულებად მაქვს — შევიდე სტადიონზე, ჯერ მის ეზოში გავისეირნო, მერე შევყვე უკაცურ ტრიბუნებს, თვალი დავადგა განაბულ მინდორს, გადავხედო დიდუბის მიჯნას, მზერა ვტყორცნო მთებზე ასულ ნაძალადევს, სტადიონის ჰაერი გადავცლაპო, ბოლოს გულშემატკივრების თავშეყრა მოვძებნო და იმათ ჰაი-ჰუის დავაყურო... იმ პარასკევსაც ჩავუარე რკინის ლობურებს. თამაშის სახსენებელიც არ იყო. ისე, ჩვეულებრივი დღე იდგა სტადიონზე, მშვიდი, უფეხბურთო. ცენტრალურ შესასვლელს რომ გავუსწორდი, შევნიშნე: ახალდაჩეკილ გულშემატკივრებს „საჭიდაო წრე“ შეეკრათ და „ღრეობა“ გაემართათ. ხელებს ისე შლიდნენ, სახეებზე ისეთი აღტაცება, ისეთი სასოება, ისეთი ნეტარება ეწერათ, უმაღლესი: თავიანთ „კერპებზე“ ეჭირათ სიტყვა. მეც დავინტერესდი, იმათ თავშეყრას შევუერთდი და ბაჭ-ბუჭებში გავერიე ამოდენა კაცი. „სტადიონის ძველი ბიჭი“ — მაშინვე მიცნეს, სახელდახელოდ „ალყა“ შემომარტყეს, „ღრეობის“ თემა შეცვალეს და

სიტყვა უფრო „აქტუალურ“ საკითხზე ჩამოაგდეს: ძველი ფეხბურთი სჯობს თუ ახალიო. მერე ერთი მეკითხება:

— მაგარი იყო პაიჭაძე?

— ოო, დიდი ფეხბურთელი იყო, ბიჭებო!

პასუხმა, სჩანს, არ დააკმაყოფილათ:

— არა, მაინც, რა იყო ასეთი პაიჭაძე?

რა იყო?!.. ეე, პაიჭაძე... პაიჭაძე... და გამახსენდა ჩვენი ფრთებცეცხლა პაიჭაძე...

ცოტა ხნის შემდეგ „აუდიტორია“ ხელში მეჭირა:

1939 წლის საფეხბურთო ჩემპიონატი მთავრდებოდა... „ცდკას“ ეთამაშებოდნენ ჩვენები... თუ მოვიგებდით, მეორე ადგილზე გავდიოდით, არა და, ყაიმი რომ ყაიშია, — მესამე ადგილზე გვისროდა... მთელი სტადიონი მეორე ადგილს აეტანა... აღარ იყო ყურთასმენა: აბა, გაიოზ და აბა, ბორია!.. მაგრამ რა გინდა! იმ დღეს, დოროხოვს, თვალი დალატობდა თუ რა იყო, ოთხი ბურთი შეუგდეს პირველ ტაიმში... ბიჭები შესვენებაზე მიდიან, მაგრამ, ვაი ამ შესვენებას — 1:4-ზე ვაგებთ თამაშს... აღარ გინდა „ამოქაჩევა“?!. გაგიყდა სტადიონი, დაიხოცა ხალხი... სიხარულით მეშვიდე ცაზე ასულმა სტუმრებმა კი, დეპეშა აფრინეს მოსკოვში — „გავიმარჯვეთ, მორჩა, გათავდა, მეორე ადგილი ჩვენიაო“...

— მერე, მერე? — აღარ მაცლიან ბიჭები.

მერე... მერე დაიწყო ის მეორე ტაიმი და აიწყვიტა პაიჭაძემ... რა დაავიწყებს კაცს, იმ ორმოცდახუთ წუთს... ისეთი ამბავი დატრიალდა, ხალხს თავი ტკბილ სიზმარში ეგონა... ხან მარჯვნიდან მივიდა პაიჭაძე, ხან მარცხნიდან, ხან შუა-დან — დაიფრინა მთელი „ცდკა“... თავის ბიჭებს სულ „ტყა-პა-ტყუპით“ აყრევიდა ბურთები... რაკი ერთი ანგარიში გათა-

ნაბრდა (!), თვითონ პაიჭაძე გავიდა კარდაკარ... ექვსი კაცის მოტყუება რომ არ იქმარა, ახლა მეკარეც მოატყუა და ცარიელ კარში ისეთი ძალით დაარტყა, ბაღე სამ მეტრზე მაინც გაიწეღა... ჰოდა, ავიღეთ ის მეორე ადგილი. ისეთი ამბავი ატყდა სტალიონზე, კაცს მეორედ მოსვლა ეგონებოდა... ზოგმა რომ მტრედი გააფრინა, ზოგმა ჰკუაც თან მიაყოლა, იმ დღეს ყველამ გააფრინა სიხარულით... „ცდკას“ მწვრთნელა ფოსტაში დარბოდა — „აშიბკა“ მოგვივიდა, დეპეშა უკან დაგვიბრუნეთო...

„აუდიტორიას“ შევატყე, თავი ზღაპარში ეგონა.

ეგ კიდევ არაფერი... 1946 წელია... უკანასკნელი მატჩი გვაქვს თბილისში... მოსკოვის „სპარტაკს“ ვეთამაშებით... მატჩი მთავრდება... ნოლით ნოლია... ჩქარა, თორემ ყელამდე საჭირო ქულა იკარგება და მერე, ვინ გასუნინებს სამეულში... ლამის წაიქცნენ ტრიბუნები და მინდორზე გაცვივდეს გამწვარებული ხალხი... დაილოცა გრიშა გავუა... იმოდენა ორომტრიალში, მაინც შენიშნა პაიჭაძე... დაინახა და ბორიას რომ უყვარდა, ისეთი „პასი“ მისცა... მარცხენა ფრთიდან დაიძრა პაიჭაძე... ჯერ ერთი მოატყუა, მერე ერთი სეგლინი ჰყავდათ მოსკოველებს, იმასაც „აჭამა“ გზადაგზა და „კორნერის“ ხაზზე გავიდა... ახლა სოკოლოვმა, ხოლოდკოვმა და კიდევ ერთმა მაღალმა ქერათმიანმა ნახევარმცველმა უყელეს გზა პაიჭაძეს... სათქმელად ადვილია, მაგრამ არ გინდა „კორნერის“ ხაზზე კიდევ სამი კაცი მოატყუო და საჯარიმო მოედანზე შეხვიდე... და მაშინ, კი, მართლაც უკისრებელი იყისრა პაიჭაძემ... ჯერ ნელა მიუახლოვდა მეურვეებს, მერე უცებ, ტანის განუმეორებელი, თავისებური, პაიჭაძისეური რხევით გაიგდო

ბურთი და ისე უცხოდ იილეთა, — თავგზადაკარგული მეტოქენი იმის მაგივრად, რომ თავს დასხმოდნენ, თითქოს რაღაც უნახავი ნახესო, აქეთ-აქით გაიქცნენ, ხოლო ამჟამობაში უკვე საჯარიმოზე შესულმა პაიჭაძემ, „დახურული“ კუთხიდან ზუსტი დარტყმით, ბურთი შორეული კუთხის „ცხრიანში“ გაახვია...

— ერთხელ, „კორნერიც“ შეაგდო, არა, ძია?! — მაწყვეტინებენ, საღდაც მაინც ლალატიან მეხსიერებას მიცოცხლებენ და თან ისე შემომცქერიან, თითქოს „ათას ერთი ლამისას“ ისმენდნენ.

ჰო, ერთხელ „კორნერიდანაც“ შეაგდო პაიჭაძემ... ეს არაჩვეულებრივი შემთხვევაც იმავე 1946-ში მოხდა... ღრუბლიანი, უქარო დღე იყო, ხეზე ფოთოლიც არ ირხეოდა არსად... მოსკოვის „ტორპედოსთან“ არა და არ გაიხსნა ანგარიში... ბოლოს, ჩვენების ერთერთი მწვავე იერიშის შემდეგ დაინიშნა კუთხური... წეროებივით ჩამწკრივდნენ კარის გასწვრივ ჩვენი ბიჭები... ჩამოაწოდა პაიჭაძემ... მაღალი ბურთი ნელა გადააფრინდა საჯარიმოს, ზემოდან გადასცდა ყველას და მეორე ძელს რომ გაუსწორდა, — პირი იბრუნა, შეუხვია, დაბარებულებით შებრძანდა კარის მაღლა. კუთხეში... ნაცადი მეკარე აკიმოვი, ორივე გუნდის მოთამაშენი ერთ ხანს პირდაღებულები იდგნენ და მომხდარს თვალს არ აჯერებდნენ...

— ეგ რა არის, — მესმის უცებ ზურგსუკან, — მე უკეთესს გეტყვით!

არ მესიამოვნა: ვილაცა იყო თავხედი, „ავტორიტეტს“ საქვეყნოდ მილახავდა და „ტრიბუნას“ მართმევდა. მოუვბრუნდი გაალმასებულნი და... გავშრი: ჩემს წინ ვინმე ბებერი გულშე-

მატკივარი, სახელად ვასო, გვარად კახიანი იღვა. რა მეთქმო-
და, — იმისი ხნისა ხომ ქვაც არა გდია სტადიონზე. უსიტყ-
ვოდ დავუთმე „ტრიბუნა“. სახელად ვასომ, გვარად კახიანმა
ჯერ ცერად შემომხედა, მერე დამცინავად გაიღიმა, მერე
„არქივი“ გადაქექა, ერთი „წარღვნისდროინდელი“ ამბავი გა-
მოქექა, მაშინვე გაასალა და ნაბიჭვრებს პირები დააღებინა:

— აი, ამ სტადიონზე, მხოლოდ მაშინ ეგეთი ტრიბუნები
და რამეები არ იყო... „ზიი“ და „დინამო“ თამაშობდნენ. ვინც
რომ მოიგებდა, მთელი თბილისის ჩემპიონიც ის იყო. ორივეც
მაგრები იყვნენ... „ზიიმ“ მოიგო 4:2 ... ბორიამ ითამაშა?!
ვაა!... ხალხი ამბობდა — „დინამოს“ ბიჭებს თავის დღეში
ალარ გააცივებთო... ორი ბურთი შეაგდო... ერთი ცენტრიდან
დააკერა და რაც მართალია, გაუმართლა... მეორე?! ვაა!..
მთელი „დინამო“ აცეკვა, მერე ყველა სათითაოდ დააწვინა და
ისე შეაგდო... მახლას, სხვანაირი ვინმე იყო პაიჭაძე“...

— მესხს ჯობდა, ძია? — დაიძახა ვილაცამ.

— ეეე, კარგი რა, შვილო!...

ბოლოთქვა

და ახლა, როცა ამ წიგნს უკანასკნელ წერტილს ვუმიზნებ,
მჯერა: თაობიდან თაობაში სამარადქამოდ იმოგზაურებს ქარ-
თული ფეხბურთის დიდების ესტაფეტა, რომელიც ატარებს
ყველასათვის საყვარელ სახელს. იგი ხან ჰგავს — ქუხილს
ულრუბლო, მოწმენდილ ცაზე, ხანაც — ალაზნის ჭალებში
ანაზღად მოვარდნილ ავდარს. იგი ხშირად თოფის გასროლა-
სავით ისმის:

— ბორის პაიჭაძე!

შინაარსი

წინათქმა	3
ონკიქედის მოჩვენება	4
ონკიქედური ს უ რ ა თ ე ბ ი	8
ფოთური ს უ რ ა თ ე ბ ი	18
პა, ბურთი და პა, მოედანი	31
საბრძოლო ნ ა თ ლ ო ბ ა	33
გამარჯობა თ ბ ი ლ ი ს ო	40
კვიცი გვარზე ხტისო	46
ცხოვრების ს ა გ ზ უ რ ი	48
„ე ვ რ ი კ ი ა“	50
დ ე პ ე შ ა	53
ზღვა თუ მწვანე მოედანი	59
თ ბ ი ლ ი ს შ ი	62
ოქროს წ ლ ე ბ ი	65
დაკარგული წლები	80
პაი, გიდი, გიორგი ს ა ა კ ა ძ ე ე	81
„ფეხბურთის კ ა რ უ ზ ო“	83
ბერძენის მეთრედ ყვავილობა	85
გედის ს ი მ ღ ე რ ა	86
პაიჭაძისეული ესტაფეტა	87
პაიჭაძის გ ა ხ ს ე ნ ე ბ ა	88
ბ ო ლ ო თ ქ მ ა	94



Миндия Ильич Мосашвили
Карузо футбола
(На грузинском языке)

Государственное издательство
«Сабчота Сакартвело»
Тбилиси — 1963

რედაქტორი ირ. ყიფიანი
ტექნიკური რედაქტორი შ. ძოწენიძე
კორექტორი ლ. შარვაშიძე

ხელმოწერილია დასაბეჭდად 12/VII-63 წ. ქალღმის ზომა 70×108¹/₃₂.
ნაბეჭდი თაბახი 4,11. სააღრ.-საგამომცემლო თაბახი 3,31.
საეცტორო თაბახი 3,17.
უე. 00506 ტირაჟი 5000. შეკვ. № 331.
ფასი 10 კაბ.

მე-4 სტამბა, თბილისი, მედქალაქი.
Типография № 4, Тбилиси, Медгородок.